

M'sieqv Dorn
Maaih Hnyouv
Hnangv
Ziouv



Fi^lipv^poi 2:5
1 Saa^mu^en 13:14

Zoc caux Porv nyei Mienh:
YauzSing caux Meixzunh Zeuz

Porv Mengh Nyei Waac

Baulo gorngv yiem Fi^{lipv}poi 2:5 “*Meih mbuo oix zuqc maaih hnyouv hnangv Giduc Yesu nyei hnyouv.*” Meih mbuo duqv naaiv buonv sou caux maaih hnyouv oix hoqc taux naaiv buonv sou weic meih mbuo benx yietc laanh **M’SIEQV DORN MAAIH HNYOUV OIX HNANGV ZIOUV, MAAIH HNYOUV HNAMV ZIOUV** - *maaih hnyouv oix zuotc Ziouv nyei nyungc zeiv.* Weic meih mbuo hnamv taux hoz nqaang fai nqa’haav hingv dongh mbuo nzuonx seix mi’aqv mv baac mienh hnangv haaix nor gorngv taux meih mbuo. Meih mbuo oix mienh gorngv “Naaic laanh mienh gengh maaih hnyouv hnangv Ziouv” fai “maaih hnyouv hnamv Ziouv”. Benx yietc laanh kuv nyungc zeiv bun ganh doic mienh zuotc. Weic meih mbuo oix benx kuv m’sieqv dorn zoux kuv sic yiem Ziouv nyei nza’hmien ei Ziouv zeix daaih nyei mouz deic, benx kuv sieqv bun meih mbuo nyei diex maac, kuv auv bun meih mbuo nyei nqox, benx kuv maa bun meih mbuo nyei fu’jueiv, kuv maa-buoc bun meih mbuo nyei nyaam fai kuv maa-diev bun meih mbuo nyei langh.

Kungx Tin-Hungh ganh hnangv haih goiv yienc mbuo nyei hnyouv bun mbuo nyei hnyouv hnamv Ninh, hanc ninh nyei eix, maaih hnyouv lorz ninh. Mv baac hnangv Baulo gorngv yiem Lomaa 12:1-2 nor “*Gorx-youz aac (fai dorh-nziex aac), Tin-Hungh ndongc naaic korv-lienh mbuo, yie ziouc tov! meih mbuo zorqv ganh fungx bun Tin-Hungh hnangv ziec nyei ga’naaiv nor, mv baac maaih maengc nyei, cing-nzengc nyei, dongh ninh a’hneiv nyei ga’naaiv. Hnangv naaiv zoux se horpc nyei, weic zien-zien nyei zaangc Tin-Hungh. Baamh mienh zoux sic maiv horpc Tin-Hungh, maiv dungx zuotc ninh mbuo nyei nyungc zoux. Mv baac oix zuqc bun Tin-Hungh goiv nzengc meih mbuo nyei hnyouv caux hnamv nyei javv, duqv siang-nyungc zeiv. Hnangv naaic meih mbuo haih hiuv duqv Tin-Hungh nyei za’eix, haaix nyungc se longx nyei, Tin-Hungh a’hneiv nyei, dunh yunh nyei za’eix.*”

Tin-Hungh zoux dongh kungx ninh ganh haih zoux nyei yiem mbuo nyei maengc, mbuo laanh laanh mienh ganh yaac oix zuqc ginv gan ninh, fux-sux ninh, ginv oix bun ninh goiv nzengc mbuo nyei hnyouv caux hnamv nyei sic. Da’yietv mbuo jiex gorn ginv sienx Yesu Giduc zoux mbuo nyei Ziouv, weic mbuo zieqv duqv ganh se zoux zuiz mienh qiemx zuqc Njoux Ziouv, mbuo longc mbuo nyei nzuih nyiemc, “Yesu zoux Ziouv,” mbuo yaac longc hnyouv sienx Yesu daic mingh, Tin-Hungh aengx bun ninh nangh daaih, mbuo ziouc duqv njoux aqv. (Lomaa 10:9). **Yiem naaiv buonv sou lengc jeiv nyei bun taux sienx Yesu Giduc nyei m’sieqv dorn,** Yiem Tin^{deic}douh, Tin-Hungh ziux ninh nyei fangx zeiv zeix m’jancg dorn daaih (Tin deic douh 1:26), *Ziouv Tin-Hungh aengx gorngv, “Nduqc laanh mienh ganh yiem hnangv se maiv horpc. Yie aengx oix zeix dauh daaih puix ninh, caux ninh zoux doic tengx ninh.”* (Tin^{deic}douh 2:18) Meih mbuo se jienv haic nyei mienh weic ninh zeix meih mbuo daaih, yiem Tin-Hungh mange, ninh oix meih mbuo benx kuv m’sieqv dorn tengx meih mbuo nyei nqox. Yiem Tin^{deic}douh mbuo buate nyungc-nyungc ga’naaiv Tin-Hungh gorngv hnangv ziouc cuotv daaih mv baac taux baamh mienh ninh longc ninh nyei buoz zeix mbuo. Ninh zorqv diuh m’jancg dorn nyei la’saengx mbungv zoux benx dauh m’sieqv dorn, aengx dorh daaih taux m’jancg dorn wuov (Tin^{deic}douh 2:21-22). Naaiv bun cing gorngv meih mbuo maaih jaa-zinh haic weic Ziouv zeix meih mbuo daaih.

Gorngv deix taux zoux nqox nyei mienh, meih mbuo nyei auv gengh jaix haic yaac maaih jaah zinh haic weic zuqc ninh mbuo benx Tin-Hungh nyei fuqv bun meih mbuo. Cong-mengh

sou 18:22 gorngv, “*Haaix dauh lorz duqv dauh auv se duqv longx nyei ga'naaiv yaac duqv Ziouv ceix fuqv.*” Se gorngv meih nyei auv maaih hnyouv hngangv Ziouv yaac maaih hnyouv hnamv Ziouv meih za'gengh duqv Ziouv nyei fuqv longc haic yiem naaiv norm seix zangc. Meih oix zuqc jangc jienv gorngv Tin-Hungh (TH) longc m'jangc dorn nyei la'saengx mbungv zoux m'sieqv dorn...ninh maiv zeix longc m'jangc dorn nyei zaux zeix, weic maiv zeix oix bun nqox caiv ninh mbuo nyei auv mangc piex auv mv baac ceix caux orn ninh mbuo. TH maiv longc m'nqorngv zeix weic maiv oix bun auv gunv ninh nqox mv baac oix auv mbuoqc ganh nyei nqox. Ninh maiv longc buoz zeix auv weic auv maiv zeiz zoux bou-mienh mv baac hngangv ging-sou gorngv nor, zoux tengx nqox nyei mienh. Se gorngv zoux nqox nyei mienh haih zieqv duqv gorngv ninh mbuo nyei auv se Tin-Hungh ceix daaih bun nyei fuqv, ninh mbuo haih orn caux nunz yaac ceix ninh mbuo nyei auv bun ninh mbuo maaih qiangx haih liepc hnyouv hngangv Ziouv. Ninh mbuo nyei auv ziouc haih benx yietc laanh kuv m'sieqv dorn tengx ninh mbuo yiem naaiv norm seix zangc, yaac duqv Cong-mengh sou 31 zang wuov nyungc auv, fai wuov nzangh auv.

Yiem naaiv buonv sou mbuo oix hoqc taux nyei domh hoc dauh se: ***M'sieqv dorn maaih hnyouv hngangv Ziouv fai hnamv Ziouv. Oix juangc jienv hoqc taux Ziepc Nyeic Zaang dongh bun m'sieqv dorn haih maaih hnyouv hngangv Ziouv.*** 1). M'sieqv Dorn Maaih Hnyouv Hngangv Ziouv, oix zuqc Maaih Hnyouv Ziepc Zuoqv Bun Ziouv. 2). M'sieqv Dorn Maaih Hnyouv Hngangv Ziouv, oix zuqc Maaih Hnyouv Ziangh Yiem Ziouv Nyei Waac fai bangc Ziouv nyei waac. 3). M'sieqv Dorn Maaih Hnyouv Hngangv Ziouv, oix zuqc Maaih Hnyouv Daux Gaux. 4). M'sieqv Dorn Maaih Hnyouv Hngangv Ziouv, oix zuqc Maaih Hnyouv Muangx Ziouv Nyei Waac 5). M'sieqv Dorn Maaih Hnyouv Hngangv Ziouv, oix zuqc Maaih Hnyouv Fu-Sux Tin-Hungh, Ganh Nyei Nqox, caux Hmuangv Doic. 6). M'sieqv Dorn Maaih Hnyouv Hngangv Ziouv, oix zuqc Maaih Hnyouv Mbuoqc Tin-Hungh caux Ganh Nyei Nqox. 7). M'sieqv Dorn Oix Maaih Hnyouv Hngangv Ziouv, oix zuqc Maaih Hnyouv Hnamv Tin-Hungh caux Mienh. 8). M'sieqv Dorn Maaih Hnyouv Hngangv Ziouv, oix zuqc Maaih Hnyouv Zieqv Duqv Benx Maa Nyei Jaa Zinh caux Maaih Hnyouv Buangv Nzengc Maa Nyei Hnamv 9). M'sieqv Dorn Maaih Hnyouv Hngangv Ziouv, oix zuqc Maaih Hnyouv Goux Jaa dingh **caux** Maaih Hnyouv Ceix Hmuangv Doic 10). M'sieqv Dorn Maaih Hnyouv Hngangv fai Hnamv Ziouv, oix zuqc Maaih Hnyouv Jorm Taux Tin-Hungh Nyei Gong. 11). M'sieqv Dorn Maaih Hnyouv Hngangv fai Hnamv Ziouv, oix zuqc Maaih Hnyouv Cau-Fim Taux Mienh. 12). M'sieqv Dorn Maaih Hnyouv Hngangv fai Hnamv Ziouv, oix zuqc Maaih Hnyouv Lorz Ndangc TH Nyei Jauv.

Se gorngv nqa'haav hingv Tin-Hungh bun qiangx nor, oix fiev buonv heuc “M'jangc dorn maaih hnyouv hngangv Ziouv” lengc jeiv nyei weic bun m'jangc dorn hoqc taux benx m'jangc dorn maaih hnyouv hngangv Ziouv nyei mienh oix zuqc hngangv haaix nor ziangh, hngangv haaix nor zuotc caux hngangv haaix nor zoux cingx bun Tin-Hungh nyei mbuox duqv njang-laangh, bun auv caux fu'jueiv hung hngangv heic taaih caux mbuoqc nyei mienh. Weic naaiv maiv zeiz gorngv kungx m'sieqv dorn qiex zuqc maaih hnyouv hngangv Ziouv, m'jangc dorn gauh qiex zuqc benx kuv Giduc mienh, kuv m'jangc dorn, kuv nqox, kuv dae nyei mienh.

Tov Tin-Hungh longc naaiv buonv sou tengx meih mbuo, ceix meih mbuo, orn meih yaac nunz meih mbuo bun meih mbuo gauh haih benx kuv m'sieqv dorn bun meih mbuo nyei diex maac, kuv auv bun meih mbuo nyei nqox, kuv nyam bun die maa, kuv maa bun meih mbuo nyei fu'jueiv, kuv maa buoc bun meih mbuo nyei nyam, kuv maac diev bun meih mbuo nyei laangh. Gauh longc jienv jixx tov Tin-Hungh haih bun meih mbuo maaih hnyouv hngangv Ninh yaac

hnamv ninh weic benx Ninh nyei kuv naamh nyuoz. Tov Singx Lingh njaaux meih mbuo bun meih mbuo haih bieqc hnyouv dongh Ninh oix meih mbuo hiuv nyei bun meih mbuo gengh maaih hnyouv oix ei jienv meih mbuo duqv hoqc nyei zoux weic bun Ziouv nyei mbuox haih duqv njang laangc yiem meih mbuo nyei maengc. Yie mbuo i hmuangv laengz zingh Tin-Hungh duqc qiangx buangh meih mbuo yiem naaiv buonv sou yaac duqv qiangx biux mengh taux Tin-Hungh nyei hnamv caux en yiem yie mbuo nyei maengc.

Yauzsing Caux Meixzunh Zeuz

© 2009 Yauzsing caux Meixzunh tov doqc caux hoqc nyei laanh laanh mienh tengx jienv zorc caux dimv “M’sieqv Dorn Maaih Hnyouv Hnangv Ziouv” naaiv buonv sou. Se gorngv haaix laanh mienh oix longc gunv dorh mingh aamx cuotv (copy) duqv nyei, se gorngv aamx nzengc ziangh buonv sou. Mv baac maiv haih aamx daaih maaic, weic zuqc yie mbuo i hmuangv nyei mauv se oix ceix m’sieqv dorn haih ziangh ei Tin-Hungh zeix ninh mbuo daaih nyei mouz deic.

**Da'Yietv Zaang: M'sieqv Dorn Oix Maaih Hnyouv Hnangv Ziouv Oix
Zuqc Maaih Hnyouv Ziepc Zuoqv Bun Ziouv**

Doqc Nyei Ging-Sou Yiem: Lugaa 10:38-42 “*Yesu caux ninh nyei sai-gorx mbuo yangh jauv mingh wuov zanc, ninh taux norm laangz. Wuov norm laangz maaih dauh m'sieqv dorn, mbuox heuc Maataa, a'hneiv zipv Yesu hitv ninh nyei biauv. Maataa maaih dauh nziez, mbuox heuc, Maa^li^yaa, zueiz, jienv Ziouv nyei zaux-hlen muangx ninh njaaux leiz. Maataa mbenc kaeqv, gong camv, la'nyauv haic, ninh ziouc daaih gorngv, “Ziouv aah! Meih hnamv duqv jiex eix nyei? Yie nyei nziez guangc bun yie ganh zoux gong hnangv. Tov mbuox ninh daaih tengx deix yie maah!” Ziouv dau, “Maataa aah! Maataa! Meih maaih camv-nyungc hoic meih hnyouv nzauh hnyouv huaang niaa. Mv baac horpc zuqc zoux nyei maaih nduqc nyungc hnangv. Gauh longx wuov nyungc Maa^li^yaa ginv liuz aqv, yaac maiv maaih haaix dauh zorqv duqv ninh nyei cuotv.”*

Gorngv Jiex Gorn Nyei Waac:

Ih hnoi mbuo oix zuqc ziangh buangv fai buangv hnyouv nyei ziangh. Mbuo yaac oix zuqc ziangh weic hnamv jienv taux ga'haav hingv fai hoz nqang nyei ziangh hoc. Se gorngv meih nzuonx seix mi'aqv mv baac ganh doic mienh hnangv haaix nor jangx taux meih, gorngv taux meih? Camv cin hnyangx jiex daaih maaih dauh mienh mbuox heuc Ndaawitv, Tin-Hungh gorngv ninh gengh maaih “hnyouv hnangv Ziouv.” (1 Saa^mu^en 13:14). Mbuo yiem hnyouv hnamv gorngv yie maiv haih hnangv ninh nor lorqc...mv baac mbuo oix zuqc jangx jienv ninh se maiv dunh yunh, ninh zoux dorngc, zoux zuiz hienx mienh nyei auv, daaix mienh nyei nqox...mbuo buatac ninh yaac nyiemc ninh zoux nyei zuiz. Tin-Hungh gorngv ninh se maaih hnyouv hnangv Ziouv ziouc bun mbuo maaih lamh hnamv nyei, maiv gunv jiex daaih nyei ziangh hoc mbuo nyei maengc se hnangv haaix nor, zoux jiex haaix nyungc, mbuo haih duqv siang jiex gorn weic mbuo sienx Yesu benx siang zeix daaih nyei mienh, loz nyei nyungc-nyungc jiex nzengc (2 Ko^lin^to 5:17). Mbuo hnangv haaix nor haih maaih ziepc zuoqv hnyouv? Hnangv Ndaawitv nor, mbuo haih maaih hnyouv ziepc zuoqv bun Ziouv se gorngv mbuo **ginv taaih Ninh, ginv gan Ninh, ginv jorm hnyouv bun Ninh.**

Porv Mengh Ging-Sou:

A. Ziepc zuoqv hnyouv bun Ziouv nyei mienh, Ginv Taaih Tin-Hungh nzunc-nzunc dongh maaih qiangx fai zuqc ginv nyei ziangh hoc (Lugaa 10:42)

1. Maa^li^yaa ginv horpc; ninh ginv muangx Yesu nyei waac caux Yesu jiu tong dongh ninh duqv, caux maaih qiangx nyei ziangh hoc. Yiem mbuo nyei maengc hnoi-hnoi mbuo zuqc ginv, nyungc nyungc mbuo ginv zoux nyei biux mengh haaix nyungc jaaix bun mbuo, haaix nyungc jienv bun mbuo. Nyungc zeiv, taux buoqc zangc nyei hnoi mbuo horpc zuqc juangc jienv buoqc zangc Tin-Hungh, mv baac se gorngv mbuo ginv mingh zoux ganh nyungc, naaiv biux mengh gorngv Tin-Hungh se maiv jienv bun mbuo, mbuo ginv nyei ziouc maiv taaih Tin-Hungh. Haaix nyungc jienv bun mbuo, jaaix bun mbuo, mbuo maaih ziangh hoc zoux wuov nyungc nyei.
2. Yiem Lugaa sou 10: 38-42, mbuo buatac Yesu yiem Maataa caux Maa^li^yaa nyei biauv. Maataa ginv zoux nyei se longc nyei sic, mv baac maiv taaih Yesu, ninh nqopv Maa^li^yaa nqemh maiv tengx ninh mbenc nyanc nyei jauv. Mv baac

Yesu gorngv, “*Gauh longx wuov nyungc Maa^{li}^yaa ginv liuz aqv, yaac maiv maaih haaix dauh zorqv duqv ninh nyei cuotv.*” (Lugaa 10:42)

3. Se gorngv haaix laanh mienh oix maaih ziepc zuoqc hnyouv bun Ziouv “*Yiem meih zoux nyei diuh diuh jauv oix zuqc nyiemc ninh, ninh ziouc dorh meih yangh horpc nyei jauv-louc*” (Cong-mengh 3:6) Nyiemc Ziouv maaih eix-leiz gorngv zieqv duqv Ninh se dongh haaix dauh, Ninh se Tin-Hungh, mbuo nyei Ziouv, yaac caux ninh jiu-tong yiem daux gaux caux doqc Ging-sou, liuz ei jienv zoux. Se gorngv meih ziepc zuoqv nyei hngangv naaiv nor zoux meih nyei maengc ziouc sung nyei yaac maaih laamh hnamv.
4. Meih maiv nyiemc Ziouv yaac maiv taaih Ziouv se gorngv meih nyei maengc fai zoux nyei sic hngangv jangx maiv maaih Tin-Hungh nor. Nyungc zeiv lungh ndorm zanc meih jiex sin daaih zoux naaiv zoux wuov liemh maiv maaih ziangh hoc dingh dangh fai maiv zorqv ziangh hoc caux Ziouv gorngv waac (daux gaux) fai muangx ninh nyei waac (doqc Ging-sou) zuov taux meih buangh zuqc sic cingx heuc ninh tengx meih. Meih maiv nyiemc ninh yiem meih zoux nyei nyungc nyungc jauv.

B. Ziepc zuoqv hnyouv bun Ziouv nyei mienh Hnoi-Hnoi fungx ganh bun Tin-Hungh (Lomaa 12:1)

1. Baulo gorngv weic Tin-Hungh korh lienh mbuo, ninh njoux mbuo, se gorngv mbuo sienx Yesu Giduc mbuo ziouc duqv njuoux. Weic Yesu njoux mbuo, mbuo oix zuqc guangc dongh ganh oix nyei, tiuv zoux dongh Ziouv oix nyei. Mbuo oix zuqc “*zorqv ganh fungx bun Tin-Hungh hngangv ziec nyei ga'naaiv nor, mv baac maaih maengc nyei, cing-nzengc nyei, dongh ninh a'hneiv nyei ga'naaiv. Hngangv naaiv zoux se horpc nyei, weic zien-zien nyei zaangc Tin-Hungh*” (Lomaa 12:1).
2. Mbuo oix zuqc fungx ganh, mienh maiv haih tengx fongc horc mbuo bun Tin-Hungh, mbuo oix zuqc zanc-zanc mbuoqc Tin-Hungh fungx mbuo nyei ziangh maengc, mbuo nyei ziangh hoc, mbuo nyei zingh ginx, mbuo nyei zingh nyeic, caux mbuo nyei zinh nyanh bun ninh. Oix zuqc zieqv duqv nyungc-nyungc ninh zeix daaih se weic Ninh. Mbuo bangc ninh ziangh caux bun qiex mbuo tauv.
3. Ziepc zuoqc hnyouv fungx ganh bun Ziouv nyei mienh zieqv duqv Ziouv nyei en zingh, ninh njoux mbuo yiem zuiz cuotv daaih, yaac yiem mienv cuotv daaih duqv bieqc mingh taux Tin-dorngh guoqv...oix zuqc zanc-zanc jangx jienv naaiv.
4. Tin-Hungh haih goux jienv ziepc zuoqv hnyouv hnoi-hnoi fungx ganh bun Ninh nyei mienh. Meih maaih naaiv nyungc hnyouv nyei fai? Fai meih zangc Tin-Hungh weic oix Ninh tengx naaiv tengx wuov meih fai? Fai meih zangc ninh weic zuqc meih zieqv duqv ninh nyei en, ninh nyei hnamv. Ninh gengh puix duqv!

C. Ziepc zuoqv hnyouv bun Ziouv nyei mienh jorm hnyouv Ziouv Tin-Hungh (Laauc Yaangh 3:15-16)

Mbuo baamh mienh haih maaih buo nzangh hnyouv bun Tin-Hungh. Tin-Hungh gorngv mbuox Lau^{ndi}^sie Jiu-Baang, “*Yie hiuv duqv meih zoux nyei gong, hiuv duqv meih maiv jorm yaac maiv namx. Feix duqv meih jorm fai maiv zei aeqv, namx. Mv baac, weic zuqc meih mbuo se un-un wuov, maiv jorm yaac maiv namx, yie oix liev meih cuotv yie nyei nzuih mingh*” (Lauuc Yaangh 3:15-16) Tin-Hungh hiuv duqv mbuo nyei hnyouv, mbuo hnamv nyei sic, mbuo mauv nyei, mbuo nyei muoz deic.

1. **Da'yietv**, mbuo haih hnyouv namx bun Tin-Hungh. Naaiv nyungc hnyouv maiv gunv maiv guen taux Tin-Hungh nyei jauv. Maiv maaih hnyouv a'hneiv, maiv maaih hnyouv hanc, fai cau-fim taux Tin-Hungh caux Tin-Hungh nyei sic.
2. **Da'nyeic**, mbuo haih maaih hnyouv un-un nor bun taux Tin-Hungh, maaih daanh Tin-Hungh nyei jauv mv baac maiv dangv jienv mienh gorngv daanh Tin-Hungh nyei jauv. Naaiv nyungc mienh caux haaix nyungc mienh yaac caux duqv horpc, caux Tin-Hungh mienh zoux Tin-Hungh nyei sic, caux maiv sienx nyei yaac zoux maiv sienx nyei sic.
3. **Da'faam**, mbuo haih zanc-zanc jorm hnyouv yiem Tin-Hungh. Maaih hnyouv oix hnavg Ziouv fai hnavv Ziouv nyei mienh oix zuqc jorm hnyouv taux dongh Tin-Hungh a'hneiv nyei sic. Naaiv nyungc mienh yie sienx gorngv meih duqv buangh jiex nyei yaac duqv buac jiex nyei. Ninh mbuo yiem maanc sic laengz zingh Ziouv, yaac buac zanc-zanc buoqc zangc Ziouv, maiv gunv buangh zuqc haaix nyungc sic yiem ninh mbuo nyei maengc, maiv buac ninh mbuo tuix bouc. Ninh mbuo jorm hnyouv Tin-Hungh gor, hnavg caeng nyei wuom mbueix nor, mienh buac ziouc zieqv duqv gorngv mbuo se Giduc nyei mienh weic mbuo jorm hnyouv taux Tin-Hungh a'hneiv nyei weic mbuo se benx Ziouv njoux nyei mienh.

Dorh Ging-Sou Nyei Eix-Leiz Daaih Longc Yiem Maengc:

1. Meih nyei hnyouv se hnavg haaix nor? Meih ziepc zuoqv bun Tin-Hungh nyei fai? Dongh maiv maaih mienh buac meih nyei ziangh hoc meih caux Zangc Diex hnavg haaix nor jiu tong? Meih jorm hnyouv taux Ziouv nyei gong nyei fai?
2. Weic meih zieqv duqv gorngv ganh se zuiz mienh, meih qiemx zuqc njoux Ziouv, meih duqv zipv Yesu Giduc daaih zoux meih nyei njoux Ziouv, meih hiuv duqv ninh njoux meih bun meih haih duqv yietc liuz nyei maengc yiem Tin-dorng. Meih a'hneiv caux jorm hnyouv taux ninh nyei en nyei fai?
3. Se gorngv meih sienx liuz Tin-Hungh aqv mv baac haiz hnavg jang Tin-Hungh leih meih go haic nor, meih oix zuqc hiuv dingc gorngv, Tin-Hungh hnavv meih camv haic, ninh bun ninh nyei Ndoqc dorn daaih njoux meih...Ninh yietc liuz maiv leih go meih. Se gorngv meih haiz Tin-Hungh leih go meih nor weic zuqc meih leih go Ninh, maiv zeiz ninh leih go meih. Se gorngv weic zuiz bun meih leih Tin-Hungh go nor, oix zuqc nyiemc ganh nyei zuiz, Tov Ziouv guangc zuiz bun (1 Yo^han 1:9 “*Se gorngv mbuo nyiemc mbuo nyei zuiz, Tin-Hungh se ziepc zuoqv nyei, baengh fim nyei, ziouc guangc mbuo nyei zuiz caux mbuo zoux nyei yietc zungv waaic sic, fioux mbuo cing-nzengc daaih*”.)
4. Laanh laanh m'sieqv dorn maaih hnyouv oix hnavg Ziouv, maaih hnyouv hnavv Ziouv nyei. Mbuo nyei maengc gengh kungx haic - se gorngv mbuo maiv duqv Tin-Hungh gunv mbuo nyei hnyouv. Maav gunv yiem seix zangc maaih nyungc-nyungc mv baac maiv maaih Tin-Hungh zoux Ziouv gunv, maengc gengh maiv maaih eix-leiz. Hnavg Yesu ganh gorngv nor, “*Haaix dauh duqv nzengc lungh ndiev nyei ga'naaiv mv baac zuqc guangc ninh nyei maengc, wuov dauh duqv haaix nyungc maaih lamh longc? (Maako 8:36)*
5. Tin-Hungh haih bun meih mbuo nyei hnyouv hnavg Ninh nyei hnyouv, hnavv dongh Ninh hnavv nyei, a'hneiv dongh Ninh a'hneiv nyei, buangv hnyouv dongh Ninh buangv hnyouv nyei. Se gorngv mbuo ziepc zuoqv bun hnyouv Ziouv yaac nyiemc ei Ziouv nyei za'eix.

**Da'Nyeic Zaang: M'sieqv Dorn Oix Maaih Hnyouv Hnangv Ziouv Oix Zuqc
Maaih Hnyouv Ziangh Yiem Ziouv Nyei Waac**

Doqc Nyei Ging-Sou: Yo[^]han 15:1-8 “*Yie se zien a'ngunc hmei. Yie nyei Die zoux goux huingx wuov dauh. Haaix diuh nquaah ziangh jienv yie yaac maiv ziangh biouv nor, ninh pitv guangc. Haaix diuh nquaah ziangh biouv, ninh aengx daav nqoi dueiv bun ziangh biouv gauh gitv. Yie njaaux nyei waac se hnangv daav hmei-nquaah dueiv nor, liuc leiz meih mbuo nyei hnyouv. Meih mbuo oix zuqc ziangh jienv yie, yie ziouc ziangh jienv meih mbuo. Hmei-nquaah maiv ziangh hmei-maac, nquaah maiv haih ziangh biouv. Meih mbuo yaac fih hnangv nyei. Se gorngv maiv ziangh jienv yie nor, meih mbuo maiv haih ziangh biouv. “Yie se a'ngunc hmei. Meih mbuo se a'ngunc nquaah. Haaix dauh ziangh jienv yie, yie yaac ziangh jienv ninh, wuov dauh ziouc ziangh biouv gitv aqv. Meih mbuo leih nqoi yie nor, meih mbuo maiv haih zoux haaix nyungc. Haaix dauh maiv ziangh jienv yie, ziouc hnangv diuh hmei-nquaah zuqc pitv guangc, nqaai mingh yaac zuqc nzauz daaih dapv douz-nzauc buov guangc mingh. Se gorngv meih mbuo ziangh jienv yie, yie nyei waac yaac ziangh jienv meih mbuo, meih mbuo tov haaix nyungc meih mbuo ziouc duqv wuov nyungc aqv. Se gorngv meih mbuo ziangh biouv gitv, meih mbuo ziouc bun mienh taaih yie nyei Die. Hnangv naaic meih mbuo ziouc benx yie nyei sai-gorx.*”

Doqc: Ye[^]le[^]mi 17:8 “*Ninh hnangv ndiangx zuangx jienv ndoqv-hlen, ndiangx nyei nzungh cuotv mingh taux wuom. Yuoqv nyei ziangh hoc ninh maiv gamh nziex, weic zuqc ninh nyei normh zanc-zanc maeng nyei. Haanz nyei hnyangx ninh yaac maiv nzauh, weic zuqc zanc-zanc ziangh biouv maiv dingh”*

Doqc: Singx Nzung 1:3 “*Ninh se hnangv diuh ndiangx zuangx wuov ndoqv-hlen, ziux ziangh hoc cuotv biouv, normh yaac maiv nqaai. Yiem ninh zoux nyei nyungc-nyungc duqv longx.”*

Gorngv Jiex Gorn Nyei Waac:

M'sieqv dorn maaih hnyouv hnangv Ziouv oix zuqc maaih hnyouv ziangh Ziouv nyei waac fai bangc Ziouv nyei waac. Bangc, fai ziangh, wuov joux waac nyei eix-leiz se gorngv yietc nyungc ga'naaiv laaix ganh nyungc ga'naaiv cingx daaih haih ziangh fai maaih maengc ziangh. Hnangv nquaah bangc hmei, hnangv hmei bangc ndau-wuom. Hnangv mbiauz bangc wuom, hnangv norqc bangc lungh qiex ziangh nor. Maaih hnyouv hnangv Ziouv nyei m'sieqv dorn oix zuqc zanc-zangc bangc Ziouv ziangh jienv yaac bangc Ziouv nyei waac dorh ninh mbuo nyei maengc. Ninh mbuo oix zuqc zieqv duqv gorngv ninh mbuo se laaix Ziouv nyei waac yungz maengc. Yesu ganh gorngv, “*Ging-Sou fiev jienv gorngv, ‘Mienh maiv zeiz kungx kaux nyanc hopv yungz maengc hnangv’*” (Lugaa 4:4). “*mv baac oix zuqc kaux Tin-Hungh gorngv nyei joux-joux waac*” (Matv[^]tai 4:4)

Porv Mengh Ging-Sou:

A. Maaih Hnyouv Ziangh Yiem Ziouv Nyei Waac nyei mienh oix zuqc Njiec Nzungh Yiem Ziouv nyei Waac

1. **Mbuo oix zuqc njiec nzungh yiem Ninh nyei waac** - Se gorngv maaih hnyouv hnangv Ziouv, maaih hnyouv bun Tin-Hungh zoux da'yietv yiem mbuo nyei maengc, mbuo oix zuqc njiec nzungh yiem Ziouv nyei waac. Hnangv ndiangx nyei nzungh se bingx jienv ndau ndiev mangc maiv buatc. Mbuo kungx buatc ndiangx hnangv mv baac maiv buatc nzungh, mv baac mbuo hiuv duqv ndiangx

wangc siangx weic nzungh henv longx. Nzungh duqv buonx longx nyei uix. Mbuo nyei maengc oix zuqc maaih nzungh njiec ndo yiem Ziouv nyei waac, Ziouv nyei waac yungz mbuo hnavg wuom yungz ndiangx zungh nor (Singx nzung sou 1:1-3 “*Maaih orn-lorqc nyei mienh se maiv muangx mienh waaic mienh nyei za'eix, maiv yangh zuiz-mienh nyei zaux-mbiec, yaac maiv caux huotv Tin-Hungh nyei mienh juangc jauv yangh. Daux nzuonx ninh a'hneiv Ziouv nyei leiz-latc, ziu yiex fei-fangv ninh nyei leiz. Ninh se hnavg diuh ndiangx zuangx wuov ndoqv-hlen, ziux ziangh hoc cuotv biouv, normh yaac maiv nqaai. Yiem ninh zoux nyei nyungc-nyungc duqv longx*)

2. **Nzungh se mangc maiv buac** - mbuo nyei sienx fim fai mbuo hnavg haaix nor maaih hnyouv oix hnavg Ziouv fai hnamv Ziouv se mangc maiv buac. Yie gorngv nyei se dongh maiv maaih mienh mangc meih nyei ziangh hoc, kungx Tin-Hungh buac nyei ziangh hoc meih hnavg haaix nor ziangh? Mienh mangc jienv meih nyei ziangh hoc, meih nyei beih zangc zoux nyei caux hnyouv hnamv nyei doit diuc nyei fai? Meih hiuv duqv meih ganh longx nyei. Se gorngv Tin-Hungh gorngv taux meih nyei maengc fai maaih laanh mienh bingx jienv longc fangx-nangh siou meih nyei maengc daaih bungx bun mienh camv mangc nor buac meih nyei maengc se hnavg haaix nor? (*Nyungc zeiv: Dorng zuangx nyei ziangh hoc meih gorngv nyei zoux nyei taaih Tin-Hungh yaac taaih meih nyei nqox nyei mv baac dongh maiv maaih mienh nyei ziangh hoc, yiem meih ganh nyei biauv nyei ziangh hoc meih corc taaih Tin-Hungh yaac taaih ganh nyei nqox nyei fai? Nyungc zeiv: Dorng zuangx meih daux gaux kuv-muangx gor, maiv maaih mienh nyei ziangh hoc meih ganh caux Zangc Diex gorngv waac daux gaux nyei fai?*) Oix zuqc njiec nzungh ndo yiem Ziouv nyei waac, hoqc ei, zuov mbuo buangh dongh mienh maiv mangc nyei ziangh hoc, mbuo nyei maengc hnavg haaix nor? Zuqc sic mbuo cingx haih ginv ei weic mbuo zungv ziangh jienv yiem ninh nyei waac aqv.
3. **Nzungh se dorh buonx bun ndiangx** - mv baac se gorngv mbuo maiv dorh buonx daaih yungz mbuo nyei maengc, mbuo maiv doqc ging-sou, daux gaux caux Ziouv gorngv waac mbuo nyei lindh wuonh ziouc maiv duqv buonx yungz hnavg nzungh maiv dorh buonx bun ndiangx, ndiangx ziouc nqai. Mbuo oix zuqc longc ziangh hoc ganh lengc jeiv caux Ziouv gorngv waac (daux gaux) yaac muangx Ziouv nyei waac (doqc ging-sou). Maiv dan doqc hoqc hnavg yaac oix zuqc ei jienv Ziouv nyei waac zoux.
4. **Nzungh siou liouh dongh ndiangx qiemx zuqc nyei**. Yiem Ye[^]laa[^]mi 17:7-8 gorngv, “*Kaux Ziouv nyei mienh, se za'gengh kaux ninh wuov deix, zungv oix duqv orn-lorqc. Ninh hnavg ndiangx zuangx jienv ndoqv-hlen, ndiangx nyei nzungh cuotv mingh taux wuom. Yuoqv nyei ziangh hoc ninh maiv gamh nziex, weic zuqc ninh nyei normh zanc-zanc maeng nyei. Haanz nyei hnyangx ninh yaac maiv nzauh, weic zuqc zanc-zanc ziangh biouv maiv dingh.*” Za'gengh kaux Ziouv nyei mienh maiv gunv m'jangc fai m'sieqv se hnavg ndiangx zuangx jienv ndoqv-hlen, ndiangx nyei nzungh cuotv mingh taux wuom, dorh wuom yungz ndiangx. Naaiv nyungc mienh maiv zuqc gamh nziex yuoqv, maiv zuqc gamh nziex haanz weic zuqc maaih wuom yungz. Se gorngv mbuo nyei maengc ziangh yiem Ziouv nyei waac maiv gunv buangh zuqc haaix nyungc, yuoqv fai

haanz, naanc zingh fai ging-borqc mbuo maiv zuqc nzauh weic maaih Ziouv nyei waac yungz jienv mbuo nyei lingh wuonh, liepc jienv mbuo nyei maengc.

B. Maaih Hnyouv Ziangh Yiem Ziouv Nyei Waac nyei mienh oix zuqc hiuv hngangv haaix nor haih njiec nzungh ndo:

1. M'sieqv dorn hngangv haaix nor haih njiec nzungh ndo yiem Ziouv nyei waac? Hngangv haaix nor maaih hnyouv hngangv Ziouv? Hngangv haaix nor haih liuc leiz ganh bun Ziouv nyei waac haih ziangh fai njiec nzungh ndo?
2. M'sieqv dorn oix njiec nzungh ndo yiem Ziouv nyei waac oix zuqc longc guenx ziangh hoc caux Ziouv jiu-tong. Maaih hnyouv oix nitv fatv Ziouv nyei mienh oix zuqc hoqc Ziouv nyei waac, zanc-zanc zorqv ziangh hoc daaih doqc ging-sou. Maiv zeiz lauh lauh hoqc fai doqc nzunc baav hngangv, mv baac oix zuqc hnoi-hnoi lorz qiangx hoqc. Mbuo laanh laanh mienh maaih ziangh hoc fih hngangv nyei (yietc hnoi se maaih 24 norm ziangh hoc bun meih caux yie), mv baac maiv zeix laanh laanh mienh longc duqv horpc ziangh hoc. Se gorngv haaix nyungc jienv fai jaaix bun mbuo nor mbuo maaih ziangh hoc zoux wuov nyungc nyei. Hoqc Ziouv nyei waac bun Ninh nyei waac njiec nzungh mbuo nyei maengc se jienv haic, mbuo oix zuqc lengc jeiv nyei zorqv ziangh hoc daaih hoqc caux doqc Ziouv nyei waac yungz mbuo nyei lingh wuonh hngangv nzungh dorh wuom daaih yungz ndiangx nor. Ndorm-ndorm nziouv nyei oix zuqc zorqv ziangh hoc caux Ziouv gorngv waac (daux gau) caux muangx ninh nyei waac (doqc ging-sou). Meih haih gorngv, "Yie maiv maaih ziangh hoc lorqc! Yie maiv kungx gor, zoux haaix nyungc yaac zoux maiv hingh." Se gorngv meih nyei maengc hngangv naaiv nor, meih gauh qiemx zuqc zorqv ziangh hoc daaih kaux Ziouv, tov Ziouv bun meih maaih qaqv zoux dongh meih oix zuqc zoux nyei gong. Weic meih maaih camv nyungc oix zuqc zoux meih gauh qiemx zuqc Ziouv nyei cong-mengh, Ziouv nyei qaqv, Ziouv nyei en.
3. M'sieqv dorn oix njiec nzungh ndo yiem Ziouv nyei waac oix zuqc longc ziangh hoc lengc bun ganh haih caux Ziouv jiu-tong. Se gorngv lungh nziouv meih maiv kungx jiex sin gauh nziouv deix, se gorngv lungh muonz zanc meih maiv kungx caux Ziouv jiu-tong daux gau caux doqc Ging-sou oix zuqc bueix gauh hmuangx deix, meih maiv haih maiv kungx gor liuz ziouc guangc dongh jienv jiex bun meih nyei maengc, dongh yungz meih lingh wuonh nyei hnaangx. Se gorngv meih gengh maiv maaih ziangh hoc caux Ziouv jiu tong mv baac meih maaih hnyouv oix hngangv Ziouv nyei mienh nor, meih oix zuqc zieqv duqv gorngv meih mbaaih dorngc jienv nyei jauv yiem meih nyei maengc: Tin-Hungh oix zuqc zoux da'yietc, Hmuangv doic da'nyeic, Gong da'faam... Wuov nyungc, caux Tin-Hungh jiu tong nyei jauv oix zuqc benx da'yietv nyei *jienv*.
4. Meih oix zuqc hiuv duqv meih nyei muoz deic, meih oix zuqc hnamv mangc gaax se gorngv yie maaih hnyouv oix hngangv Ziouv, maaih hnyouv hnamv Ziouv, yie oix zuqc hoqc Ziouv nyei waac. Nyungc zeiv, se gorngv meih maiv doqc jiex ziangh buonv ging-sou, meih nyei mauv se gorngv oix doqc nzengc yietc buonv Ziouv nyei waac yiem yietc hnyangx, fai meih oix ndorm-ndorm caux Ziouv gorngv waac liuz cingx daaih zoux dongh meih oix zuqc zoux nyei gong. Maiv dan daux gau nyanc hnaangx hngangv mv baac caux ninh gorngv waac, jiu tong.

C. Maaih Hnyouv Ziangh Yiem Ziouv Nyei Waac nyei mienh hiuv duqv gorngv Nzungh ndo ndiangx ziangh duqv wuonv

1. Se gorngv ndiangx nyei nzungh ziangh maiv ndo, ndiangx hlo deix hngangv zuqc nziaux buonc king mi' aqv weic zuqc ndiangx-nquaah gauh hniev dongh nzungh haih zangv duqv nyei. Maiv gunv gorngv buac ndiangx-normh maeng gor, nquaah yaac hlo ndaav mv baac nzungh ziangh maiv ndo nor maiv haih baav maiv jienv ndiangx. Weic naaiv nzungh, dongh mienh mangc maiv buac nyei, oix zuqc ziangh duqv wuonv. M'sieqv dorn maaih hnyouv hngangv Ziouv yaac maaih hnyouv ziangh yiem Ziouv nyei waac nyei mienh nyei maengc dongh mienh mangc maiv buac nyei maengc (yiem biau, ndeic, fai maiv maaih mienh mangc nyei ziangh hoc) oix zuqc wuonv yiem Ziouv nyei waac. Haih wuonv se weic zuqc duqv Ziouv nyei waac yungz, duqv Ziouv nyei waac yungz se weic doqc yaac ei Ziouv nyei waac.
2. Nyungc zeiv: Zinh ndangc zoux nzangv nyei zangc ginv yietc diuh ndiangx daaih zoux nzangv nyei hlang nyei dongc - dongh yiem nzangv gu'nyouz wuov. Ninh mbuo faaux mbong mingh lorz buac naaiv diuh ndiangx daaih nor, ninh mbuo biuv fai goix ga'hlen nyei ndiangx njang nzengc mingh. Liouh jienv naaiv diuh ndiangx lengc nyei yiem wuonv bun nziaux haih buonc mingh buonc daaih bun naaiv diuh ndiangx haih wuonv haih diev duqv nziaux nyei qaqv, zuov yietc hnyangx jiex liuz ninh mbuo ziouc goix daaih zoux hlang jiex nyei dongc yiem nzangv gu'nyouz wuov diuh ndiangx. Se gorngv mbuo nyei nzungh ndo mbuo ziangh duqv wuonv, Ziouv ziouc haih longc mbuo zoux dongh ninh liuc leiz ziangx dongh ninh paaiv mbuo zoux nyei.
3. Nzunc baav mbuo nyei maengc zuqc nziaux buonc mingh buonc daaih buangh zuqc camv nyungc sic, kuonx naanc nyei jauv, ging-borqc nyei jauv weic bun mbuo haih wuonv, haih njiec nzungh ndo, benx ndiangx dongh Ziouv haih longc zoux domh dongc yiem Ziouv nyei nzangv, Ziouv nyei gong.

Dorh Ging-Sou Nyei Eix-Leiz Daaih Longc Yiem Maengc:

1. Maaih Hnyouv Ziangh Yiem Ziouv Nyei Waac nyei mienh Lorc Ziangh Hoc yungx nzungh. Hngangv wuom yungz ndiangx-nzungh nor, mbuo mangc maiv buac mv baac se gorngv maiv maaih wuom nor ndiangx zungv nqai aqv...mbuo oix zuqc longc ziangh hoc cuotv mingh lengh nyei yungz mbuo nyei lingh wuonh yiem Ziouv nyei waac.
2. Mbuo maaih hnyouv hngangv Ziouv, hnamv Ziouv, lorz Ziouv nyei eix nyei mienh oix zuqc maaih hnyouv hnamv Ziouv nyei waac, doqc Ziouv nyei waac, dorh Ziouv nyei waac daaih zanx jienv hnyouv, ei jienv Ziouv nyei waac zoux yiem norm-norm dorngx, nyungc nyungc sic.
3. Mbuo oix zuqc maaih hnyouv bangc fai ziangh yiem Ziouv nyei waac, hngangv ndiangx quaah ziangh hmei-maac, yaac bun nzungh dorh buonx daaih yungz ndiangx nor, mbuo oix zuqc yiem mienh maiv mangc nyei ziangh hoc caux Ziouv jiu-tong dorh Ziouv nyei waac yungz maengc. Maiv zeiv aeqv mbuo haih nqai yiem mbuo nyei maengc, weic zuqc mbuo nyei Lingh wuonh ngorc lingh wuonh nyei hnaangx. Hngangv zinh ndangc maaih deix maa nor, kungx longc ziangh hoc uix ganh nyei fu'jueiv hngangv zoux gor ganh hnyouv sie. Maaih hnyouv hnamv Ziouv nyei

- m'sieqv oix zuqc uix ganh nyei lingh wuonh ndangc, liuz cingx daaih haih maaih jorm hnyouv uix mienh, tengx ganh liuz cingx haih tengx mienh.
4. Meih mbuo maaih hnyouv hnamv Ziouv, maaih hnyouv oix zoux ninh nyei gong nyei, hngangv mbuo nyanc hnaangx yungz sin nor, mbuo oix zuqc yungz mbuo nyei lingh wuonh weic doqc Ziouv nyei waac, ei Ziouv nyei waac zoux yiem norm-norm dornx nyungc-nyungc jauv liuz mbuo cingx gauh haih tengx mbuo nyei hmuangv doic caux mienh.

Da'faam Zaang: M'sieqv Dorn Oix Maaih Hnyouv Hnangv Ziouv Oix Zuqc Maaih Hnyouv Daux Gaux

Doqc Nyei Ging-Sou: Singx Nzung Sou 121:1-3 *Yie cau hmien mangc mbong, tengx yie wuov dauh oix yiem haaix daaih? Tengx yie wuov dauh se Ziouv, dongh Zeix Lungh Zeix Ndau Wuov Dauh. Ninh zungv maiv bun meih nyei zaux caaiv piatv, beu meih wuov dauh maiv njormh da'hnatv. Doqc Sing nzung 5:3* “O Ziouv aac, lungh ndorm meih muangx duqv haiz yie nyei qiex, lungh ndorm nziouv yie jough meih yaac zuov meih dau yie.”

Gorngv Jiex Gorn Nyei Waac:

Zien nor mbuo laanh laanh maaih hnyouv oix daux gaux caux mbuo nyei Ziouv gorngv waac nyei. Mv baac camv nyei mbuo maiv daux gaux, se gorngv mbuo daux gaux nor mbuo oix tov fai oix Ninh bun nyungc mbuo fai mbuo laengz zingh ninh dongh mbuo nyanc hnaangx nyei ziangh hoc. Naaiv se maiv zeiz dongh mbuo oix hoqc taux wuov nyungc daux gaux. Maaih hnyouv oix hnangv Ziouv nyei m'sieqv oix zuqc longc lengc jeiv nyei ziangh hoc caux ninh nyei Ziouv gorngv waac. Hnangv Baulo gorngv nor, “*Yaac oix zuqc maiv dingh liouh nyei daux gaux*” (1 Te[^]saa[^]lo[^]ni[^]gaa 5:17). Maaih mienh camv maiv daux gaux weic zuqc ninh mbuo maiv hiuv duqv hnangv haaix nor daux gaux. Yesu ganh nyei sai-gorx mbuo tov Ziouv njaux ninh mbuo daux gaux, “*Maaih hnoi Yesu yiem norm dornx daux gaux. Daux gaux liuz, maaih dauh ninh nyei sai-gorx gorngv mbuox ninh, “Ziouv aac, tov njaaux yie mbuo daux gaux hnangv Yo[^]han njaaux ninh nyei sai-gorx mbuo nor*” (Lugaa 11:1). Maaih deix gorngv yie mbuo maiv hiuv duqv oix zuqc hnangv haaix nor gorngv, maiv maaih waac camv caux Ziouv gorngv. Se gorngv caux Ninh maaih jiu-tong nor mbuo maaih camv nyungc nyei oix zuqc caux ninh gorngv taux. Se gorngv mbuo oix maaih jiu tong caux Zangc Diex oix caux ninh gorngv waac, mbuo oix zuqc zunv dingc hnyouv zorqv lengc jeiv nyei ziangh hoc caux Ziouv daux gaux weic zuqc daux gaux jiu tong nyei fuqv gengh longx haic bun mbuo.

Porv Mengh Ging-Sou:

A. Daux gaux tengx mbuo jaa caux Tin-Hungh haih jiu tong

1. Se gorngv mbuo oix maaih hnyouv hnangv Ziouv mbuo oix zuqc longc ziangh hoc hoqc, zuotc Ziouv nyei nyungc. Mbuo nyei Ziouv Yesu Giduc longc ziangh hoc camv nyei caux Zangc Diex gorngv waac daux gaux. Se gorngv mbuo zorqv lengc nyei ziangh hoc daaih caux mbuo nyei Ziouv gorngv waac, mbuo caux ninh gauh haih maaih jiu tong mbuo yaac gauh hiuv Ninh nyei za'eix. Se gorngv mbuo hnangv naaiv nor caux mbuo nyei Zangc Diex jiu tong daux gaux nor mbuo ziouc haih hlo yiem camv nyungc jauv.

2. Daux gaux tengx mbuo jaa haih maaih sienx fim, weic zuqc mbuo buac Ziouv dau mbuo nyei daux gaux waac. Nyungc nyungc mbuo tov nyei mbuo fiev cuotv daaih, se gorngv mbuo buac Ziouv dau nor mbuo yaac fiev jienv gorngv Ziouv hngv haaix nor dau, mbuo ziouc buac mbuo nyei Zangc Diex nyei qaqv. Mbuo yaac haih gauh sienx wuonv, jaa maaih sienx fim yiem Ziouv weic mbuo ganh nyei maengc duqv buac, mbuo ganh yaac zieqv duqv.
3. Daux gaux bun qiangx mbuo dorh mbuo nyei kouv naanc youh nzaauh mingh tutv njiec mbuo nyei Ziouv nyei nza'hmien. Hngv 1 Bide 5:7 gorngv nor, "*Oix zuqc zorqv yietc zungv youh-nzaauh guangc bun ninh weic zuqc ninh goux jienv meih mbuo.*"
4. Daux gaux njaaux taux mbuo gorngv Ziouv haaix zanc yaac yiem fatv mbuo nyei. Hngv Singx Nzung sou 46:1 gorngv nor, "*Tin-Hungh zoux yie mbuo ndaauh kaux nyei dorngx yaac zoux yie mbuo nyei qaqv. Yie mbuo haaix zanc buangh zuqc kouv naanc ninh yaac tengx.*" Se gorngv mbuo jaa longc ziangh hoc caux mbuo nyei Ziouv gorngv waac daux gaux mbuo jaa bieqc hnyouv gorngv Ninh zanc-zanc caux mbuo yiem. Maaih hnyouv caux Ziouv zanc-zanc jiu tong nyei mienh duqv hiuv duqv haiz Ziouv zanc zanc caux yiem.
5. Daux gaux njaaux mbuo gorngv mbuo maiv horpc zuqc gamh nziex maiv horpc zuqc namx hnyouv, Yesu gorngv mbuox ninh nyei sai-gorx mbuo, "*Yesu aengx longc naaiv diuh waac-beiv njaaux ninh nyei sai-gorx mbuo oix zuqc zanc-zanc daux gaux, maiv dungx hnyouv namx*" (Lugaa 18:1). Se gorngv mbuo buangh zuqc nyei nyungc-nyungc mbuo juix bun Ziouv nor, mbuo yietv buangh zuqc sic mbuo ziouc daux gaux, mbuo yaac bungz hnyouv Ziouv weic zuqc ninh dau jiex mbuo nyei daux gaux waac. Wuov nyungc mbuo ziouc maiv gamh nziex, maiv kuonx hnyouv mbuo buangh zuqc nyei.
6. Daux gaux yienc mbuo nyei maengc. Yienc mbuo hnamv dorngc nyei mingh hnamv duqv zuqc, yienc sienx fim mau mingh taux sienx fim wuonv, yienc mbuo bun mbuo haih hnamv duqv tong dongh mbuo buangh zuqc nyei. Yienc gamh nziex nyei sic mingh bun mbuo haih bungz hnyouv Ziouv.

B. Daux gaux tengx mbuo jaa oix zoux cing-nzengc

1. Daux gaux maiv daan yienc mbuo nyei maengc, yienc mbuo bieqc hnyouv nyei, mv baac yienc zoux zuiz nyei mingh zoux cing-nzengc. Mbuo nyei lingsh wuonh wange siangx, fai hlo yiem Ziouv, se gorngv mbuo jiex gorn zoux sic zuangv Ninh. "*Weic zuqc Ging-Sou gorngv, "Meih mbuo oix zuqc cing-nzengc weic zuqc yie se cing-nzengc nyei"* (1 Bide 1:16)
2. Daux gaux tengx mbuo zaah ganh nyei maengc, mangc gaax maaih haaix norm dorngx zoux maiv horpc Zangc Diex. Nyungc zeiv se mbuo gorngv waac huv fai niv, gorngv baeqc fai niv, nzorng mienh fai niv, qiex jiex mienh fai niv, mbuo oix zuqc nyiemc ganh nyei zuiz yaac guangc mienh zoux dorngc mbuo nyei zuiz. Maiv ze aeqv Tin-Hungh maiv muangx mbuo daux gaux nyei waac. Hngv Singx nzung sou 66:18 gorngv nor, "*Se gorngv yie sueih zuiz yiem yie nyei hnyouv, Ziouv zungv maiv muangx yie.*" Weic naaiv mbuo daux gaux nyei ziangh hoc mbuo oix Tin-Hungh haiz mbuo, mbuo ziouc zaah ganh nyei hnyouv, nyiemc ganh zoux nyei zuiz, yaac guangc mienh zoux dorngc mbuo nyei zuiz. (1 Yo^han 1:9 *Se gorngv mbuo nyiemc mbuo*

neyi zuiz, Tin-Hungh se ziepc zuoqv neyi, baengh fim neyi, ziouc guangc mbuo neyi zuiz caux mbuo zoux neyi yietc zungv waaic sic, fioux mbuo cing-nzengc daaih.)

3. Daux gaux neyi ziangh hoc mbuo oix zuqc nyiemc mbuo neyi zuiz, yaac oix zuqc guangc mbuo zoux neyi zuiz. Zanc-zanc ging jienv hnyouv faix fim neyi maiv dungx zoux haaix nyungc dongh Ziouv maiv horpc hnyouv neyi mv baac oix zuqc zoux dongh Ziouv a'hneiv neyi.

C. Daux gaux tengx mbuo haih bungz langc yiem Ziouv caux ginv duqv horpc

1. Nyungc nyungc sic dongh mbuo buangh zuqc neyi, mbuo hnanv haaix nor ginv? weic haaix nyungc mbuo ginv dongh mbuo ginv neyi, zoux dongh mbuo zoux neyi?
2. Maaih hnyouv hnanv Ziouv neyi m'sieqv dorn, dongh maaih hnyouv daux gaux neyi m'sieqv dorn oix zuqc daux gaux caux Tin-Hungh caa-laangh ndangc ninh ginv zoux neyi. Nyungc nyungc oix zuqc daux gaux ndangc. Maiv dungx ginv zoux fai maiv zoux, mingh fai maiv mingh, oix fai maiv oix, weic minc zinh neyi sic, mv baac oix zuqc ginv zoux ei Ziouv neyi waac.
3. Se gorngv mbuo daux gaux ndangc mbuo zoux neyi nyungc-nyungc nor, tengx mbuo haih ginv duqv horpc yaac bun qiangx mbuo maaih ziangh hoc hnamv taux mbuo oix zuqc ginv fai zoux neyi sic. Mbuo ziouc maiv huang-huang zang-zang neyi zoux. Mbuo zoux neyi, ginv neyi, yaac gauh haih horpc Ziouv neyi hnyouv. Liemh zeih ginv neyi se camv neyi maiv doix diuc Ziouv oix mbuo zoux neyi.

D. Daux gaux tengx mbuo haih caux mienh gauh yiem duqv njiec (gauh horpc)

1. Se gorngv mbuo maaih hnyouv hnanv Ziouv mbuo ziouc maaih hnyouv daux gaux, lengc jeiv neyi daux gaux weic mienh. Se gorngv mbuo daux gaux weic haaix laanh mienh maaih eix-leiz gorngv mbuo maaih hnyouv hnamv taux yaac cau-fim taux ninh mbuo.
2. Mbuo maiv haih dongh dangh hnamv taux ganh neyi nza'hmien buonc caux mienh neyi nza'hmien buonc. Se gorngv mbuo hnamv neyi duqv se oix caux Tin-Hungh horpc mbuo yaac oix mienh haih duqv caux Tin-Hungh horpc hnyouv. Mbuo jiex gorn hnamv taux mienh neyi nza'hmien buonc. Weic naaiv mbuo maiv haih tengx mienh daux gaux se gorngv mbuo nzorng fai maiv oix wuov laanh mienh. Se gorngv meih caux haiv laanh mienh maiv njiec fai maiv horpc, jiex gorn daux gaux weic wuov laanh mienh, meih ziouc jiex gorn haih duqv Ziouv yienc meih neyi hnyouv.
3. Mbuo maiv haih nzorng dongh mbuo tengx daux gaux neyi mienh. Yesu ganh gorngv heuc mbuo tengx mbuo neyi win-wangv daux gaux. (*Matv[^]tai 5:44 Mv baac ih zanc yie gorngv mbuox meih mbuo, oix zuqc hnamv meih mbuo neyi win-wangv. Zoux doqc meih mbuo wuov deix, oix zuqc tengx ninh mbuo daux gaux*)
4. Mbuo cau-fim taux mbuo tengx daux gaux neyi mienh. Se gorngv mbuo maaih hnyouv hnanv Ziouv, oix zuqc maaih hnyouv daux gaux, daux gaux weic mienh dongh nzorng mbuo neyi mienh tengx mbuo neyi hnyouv maiv im yaac tengx mbuo maiv hnamv taux ganh neyi nza'hmien buonc mv baac mienh neyi ziouc bun mbuo caux mienh gauh njiec gauh horpc, gauh baengh orn neyi yiem.

E. Daux gaux tengx mbuo gauh haih buangv hnyouv yiem Ziouv

1. Mbuo laanh laanh mienh maaih ziangh hoc haiz maiv buangv hnyouv mbuo neyi maengc fai mbuo duqv neyi, duqv buangv neyi fai duqv zipv neyi. Mbuo haiz

- hnavg jangx mbuo nyei maengc se kuei haic mbuo. Mbuo nyei hnyouv haiz oix maaih fai benx hnavg deix-bung mienh fai langx zong mienh
2. Mbuo oix zuqc fungz nyungc nyungc bun Ziouv. Mbuo oix zuqc bieqc hnyouv gorngv se gorngv Tin-Hungh maiv bun meih duqv nyei fai maaih nyei se maaih eix-leiz gorngv meih maiv qiex zuqc.
 3. Mbuo nyei Ziouv gengh longx haic yiem mbuo nyei maengc. Mbuo buatc ziex nzunc Ziouv liuc leiz taux yie mbuo qiex zuqc nyei. Maiv zeiz yie mbuo oix nyei mv baac dongh qiex zuqc ninh gengh ziepc zuoqv hnyouv nzie jienv hnavg Singx Nzung 84:11 gorngv nor, *“Ziouv Tin-Hungh se mba’hnoi caux torngv-baaih, ninh ceix en caux njang-laangc. Maiv maaih haaix nyungc longx nyei, Ziouv ngaengc jienv maiv ceix bun zoux horpc nyei mienh.”*
 4. Se gorngv mbuo buatc Ziouv dau mbuo nyei daux gaux waac mbuo ziouc gauh haih bungz hnyouv Ninh se gorngv ga’haav hingv mbuo qiex zuqc nyei. Mbuo haih bungz hnyouv Ziouv weic zuqc Singx Lingh zoux gong yiem mbuo nyei maengc bun mbuo zieqc duqv gorngv Tin-Hungh gengh ei jienv ninh nyei waac zoux. Se gorngv nyungc nyungc mbuo daux gaux ndangc, mbuo ginv nyei ei jienv Ziouv nyei waac, mbuo ziouc haih bungz laangh nyei yiem Ninh nyei nza’hmien.

Dorh Ging-Sou Nyei Eix-Leiz Daaih Longc Yiem Maengc:

1. Mbuo hnavg haaix nor haih maaih hnyouv hnavg Ziouv, maaih hnyouv daux gaux? Jiex gorn fiev meih daux gaux nyei waac caux meih daux gaux tov nyei. Se gorngv meih buatc Tin-Hungh dau nor, meih fiev jienv Ziouv hnavg haaix nor dau weic bun meih haih jangx duqv Ziouv nyei en.
2. Longc ziangh hoc lengc nyei caux Ziouv gorngv waac daux gaux, yiem maanc sic daux gaux caux Ziouv gorngv waac (E^{fe}so 6:18). Se gorngv daux gaux se jienv bun meih mbuo ziouc maaih yaac zorqv ziangh hoc caux Ziouv daux gaux nyei. Mbuo yaac horpc zuqc zorqv ziangh hoc daux gaux nyei.
3. Laanh tengx laanh daux gaux, daux gaux weic mbuo nyei win-wangv caux jienv, se gorngv meih tengx ninh mbuo daux gaux nor meih maiv haih nzorng ninh mbuo, meih yaac haih baeng guangc im nyei nzungh cuotv meih nyei hnyouv.
4. Mbuo laanh laanh mienh oix bun Ziouv gunv mbuo nyei maengc, mbuo nyei hnyouv. Mbuo yaac oix caux ninh juangc jauv yangh oix yangh nitv fatv Ziouv nyei, mbuo haih caux ninh gorngv waac daux gaux, ndoqv njiec mbuo nyei hnyouv yiem Ninh nyei nza’hmien. Maiv gunv meih yiem haaix norm dorngx meih haih caux Ziouv daux gaux. Maiv gunv yiem biauv yiem ndeic, yiem lingh, yiem huoz, fai yiem ndie-sai nyei biauv. Jiex gorn daux gaux maiv gunv longc biao buon fai yietc norm ziangh hoc, mbuo mauv nyei se oix longc ziangh hoc caux mbuo Zangc Diex gorngv waac, bun mbuo maaih qiangx yiem ninh nyei nza’hmien, mbuo gauh haih maaih sienx fim yiem Ninh. Bun qiangx mbuo dorh mbuo buangh zuqc nyei kuonx naanc mingh mbuox ninh, bun qiangx mbuo jangx jienv gorngv mbuo nyei Ziouv zanc-zanc yiem fatv mbuo nyei, bun mbuo maiv zuqc gamh nziex, bungx hnyouv nyei ginv ei Ziouv nyei za’eix. Se gorngv mbuo longc ziangh hoc caux Ninh daux gaux, Ninh oix yienc mbuo nyei maengc, mbuo nyei hnyouv caux mbuo hnavg haaix nor ziangh nyei. Maaih hnyouv hnavg Ziouv nyei m’sieqv dorn, maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv daux gaux.

**Da'feix Zaang: M'sieqv Dorn Oix Maaih Hnyouv Hnangv Ziouv Oix Zuqc
Maaih Hnyouv Muangx Ziouv Nyei Waac**

Doqc Nyei Ging-Sou: Gong-zoh 13:22 *“Tin-Hungh tuix Saulo cuotv mingh, nqa'haav orn Ndaawitv zoux ninh mbuo nyei hungh. Tin-Hungh gorngv taux Ndaawitv. Ninh gorngv, ‘Yie buatec Jetc^si nyei dorn, Ndaawitv, horpc yie nyei hnyouv haic. Ninh yaac oix yiem maanc sic ei jienv yie nyei za'eix zoux”*

Gorngv Jiex Gorn Nyei Waac:

Tin-Hungh gorngv ninh buatec *“Ndaawitv, horpc yie nyei hnyouv haic, ninh yaac oix yiem maanc sic ei jienv yie nyei za'eix zoux”* Mbuo yaac buatec Saulo maiv muangx nzengc Ziouv nyei waac ziouc zuqc Tin-Hungh tuix ninh cuotv maiv duqv zoux hungh (1 Saa^mu^en 13). Mbuo buatec yiem 1 Saa^mu^en sou, maaih camv nzunc Saulo maiv muangx Ziouv nyei waac, deix baav ninh muangx deix maiv muangx deix; mv baac ninh maiv muangx nzengc. Nzunc baav ninh baac-baac zoux doix dekc Ziouv nyei waac. Yiem naaiv deix i laanh hungh Ndaawitv caux Saulo mbuo buatec taux i nyungc hnyouv. Ndaawitv maaih hnyouv hnangv Ziouv muangx Ziouv, Saulo zoux beih nzangc hnangv hnyouv maiv muangx. Ndaawitv zoux ei Ziouv, Saulo zoux ei ganh, Ndaawitv lorz Ziouv nyei za'eix, Saulo kungx hnamv taux ninh ganh nyei nza'hmien buonc. Maiv gunv gorngv Ndaawitv maaih ziangh hoc maiv muangx Tin-Hungh, ninh zoux dorngc nyei, mv baac ninh nyiemc ninh zoux nyei zuiz, yaac tov Ziouv guangc ninh nyei zuiz. Saulo zoux dorngc nyei mv baac ninh maiv nyiemc yaac maiv guangc ninh zoux nyei zuiz. Tin-Hungh bun qiangx naaiv deix i laanh mienh zoux hungh dorh ninh nyei I^saa^laa^en mienh, mv baac ninh mbuo ginv maiv fih hnangv. Ndaawitv maaih hnyouv hnangv Ziouv, Saulo hnyouv maiv nyiemc Ziouv. Mbuo laanh laanh mienh haih ginv yaac haih zuotc haih hnangv Ndaawitv maaih hnyouv muangx Ziouv nyei waac nyei.

Porv Mengh Ging-Sou:

A. Hnangv haaix nor zoux horpc Ziouv nyei hnyouv fai muangx Ziouv nyei waac.

1. Muangx Ziouv nyei waac se *“zoux yietc mou yietc setv dongh Tin-Hungh gorngv nyei, maiv zoux gauh camv yaac maiv zoux gauh zoqc. Zoux dongh ninh heuc mbuo zoux wuov zanc, maiv siepv yaac maiv zaih. Zoux yaac buangv hnyouv buangv eix nyei maiv ngopv, kungx a'hneiv nyei hnangv”*.
2. Muangx Ziouv nyei waac duqv Ziouv ceix nyei fuqv, maiv muangx Ziouv nyei waac oix buangh zuqc sic. Se gorngv Ziouv jiex gorn dorh meih nyei hnyouv mv baac meih maiv oix ei, meih jiex gorn hnyouv namx caux ngaengc taux Tin-Hungh nyei waac. Meih ziouc jiex gorn leih go Tin-Hungh. Se gorngv meih oix meih nyei hnyouv zanc-zanc nyiemz fingv jiex daaih nor, meih oix zuqc zanc-zanc muangx Tin-Hungh nyei waac. Meih jaa nitv Ziouv fatv gauh hungh heic bun meih muangx ninh.
3. Hnangv Tin-Hungh buatec Ndaawitv nyei hnyouv, ninh yaac mangc mbuo nyei hnyouv. Ninh oix buatec mbuo maaih hnyouv ziepc zuoqv nyei muangx ninh nyei waac. Muangx waac nyei hnyouv se mau nyei, Tin-Hungh haih zorc haih njaaux.
4. Maaih camv nzunc yiem mbuo nyei hnyouv mbuo oix zoux horpc, oix muangx Ziouv nyei, mv baac mbuo maiv hiuv duqv oix zuqc hnangv haaix nor zoux cingx horpc. Se gorngv mbuo maiv hiuv dinge maiv dungx zoux, dingh jienv daux gauh tov Ziouv dorh, doqc Ging-sou mangc gaax Ziouv nyei waac hnangv haaix nor gorngv, yaac

naaic gan longx Tin-Hungh nyei mienh mangc gaax horpc zuqc hngangv haaix nor zoux. Cong mengh sou 3:6 gorngv heuc mbuo oix zuqc bangc Ziouv muangx Ziouv, *“Yiem meih zoux nyei diuh diuh jauv oix zuqc nyiemc ninh, ninh ziouc dorh meih yangh horpc nyei jauv-louc.”*

5. Maaiah hnyouv hngangv Ziouv nyei m'sieqv dorn, maaiah hnyouv ziepc zuoqv bun Ziouv, maaiah hnyouv bangc fai ziangh yiem Ziouv nyei waac, maaiah hnyouv daux gaux, yaac maaiah hnyouv muangz Ziouv nyei waac

B. Hngangv haaix nor dingh dongh mbuo zoux dorngc nyei jauv:

1. Se gorngv haaix zanc mbuo maiv hiuv duqv dingc gorngv horpc fai maiv horpc Ziouv, mbuo ziouc oix zuqc dingh. Mbuo haih hngangv naaiv nor zoux weic mbuo liuc leiz mbuo nyei hnyouv, bun hnyouv haih muangx caux zipv Ziouv nyei waac. (Nyungc zeiv – se gorngv maaiah laanh mienh gorngv waac huangv nyei mienh, haaix zanc ninh haiz ninh ganh jiex gorn gorngv nyei waac pien zien nyei sic nor, ninh oix zuqc hoqc duqv guon ganh nyei nzuih. Se gorngv ninh maaiah qiex jiex nyei hnyouv, haaix zanc yietc haiz hnyouv jiex gorn qiex jiex ziouc mingh lengh nyei daux gaux tov Ziouv.
2. Mbuo oix zuqc nyiemc mbuo zoux dorngc nyei. Weic Yesu Giduc daic yiem ziepc nzangc jaax daic caux panh naangh daaih ninh nyei nziaamv nzaaux nzengc mbuo nyei zuiz dongh mbuo sienx Ninh wuov zanc. Mbuo sienx liuz mv baac maaiah ziangh hoc mbuo zoux dorngc Ziouv. Mbuo yaac oix zuqc nyiemc mbuo nyei zuiz (1 Yo^han 1:8-9). Se gorngv meih nyiemc meih nyei zuiz yaac guangc, maiv zoux jienv mingh Tin-Hungh yaac guangc meih nyei zuiz. Cong-mengh sou 28:13 gorngv, *“Haaix dauh buang jienv ninh ganh nyei zuiz maiv haih duqv longx, mv baac haaix dauh nyiemc ganh zoux dorngc nyei zuiz aengx guangc nqoi, ziouc duqv Tin-Hungh korv-lienh.”*

C. Hngangv haaix nor nyiemc mbuo zoux dorngc nyei zuiz

1. Se gorngv meih muangx Ziouv nyei mv baac maiv muangx nzengc ninh yiem meih zoux nyei sic se hngangv Saulo nor (1 Sa^mu^en 15 Sau^lo maiv muangx nzengc Ziouv nyei waac). Naaiv yaac maaiah eix-leiz gorngv meih maiv muangx Tin-Hungh nyei waac. Meih oix zuqc goiv hnyouv guangc meih zoux nyei daaih ei Ziouv nyei za'eix.
2. Se gorngv mbuo nyiemc mbuo zoux nyei zuiz, Ziouv zungv guangc mbuo zoux nyei. Mv baac se gorngv mbuo zoux nyei zuiz dorngc mienh mbuo yaac oix zuqc mingh tov mienh guangc mbuo nyei zuiz. Se gorngv mbuo dorngc Tin-Hungh hngangv nor mbuo yaac maiv zuqc mbuox mienh taux mbuo zoux nyei zuiz, mbuo oix zuqc longc cong-mengh weic maaiah deix mienh hiuv duqv mbuo zoux jiex nyei zuiz maiv gunv mbuo nyiemc liuz guangc maiv zoux aqv mv baac mienh haih dorh daaih zoux waac huv gorngv.
3. Nyiemc baac zuix liuz oix zuqc gan longx Tin-Hungh weic zuqc mbuo nyei win-wangv mienv nyei hungh Saadaan maiv oix mbuo gan longx Ziouv, ninh ziouc dorh ziex nyungc daaih nduov fai yuoqc. Nzunc baav Tin-Hungh zungv guangc mbuo nyei zuiz mi'aqv mv baac mienv nyei hungh maiv kangv bun mbuo la'kuqv. Ninh zanc-zanc bun mbuo jangx jienv, dorh mbuo zoux jiex nyei zuiz dongh Tin-hungh zungv guangc liuz aqv daaih ndoh jienv mbuo. Mbuo ziouc haix hngangv jangv maiv

zic duqv zoux naaiv zoux wuov weic Tin-Hungh nor. Mbuo oix zuqc jangc jienv Baulo gorngv nyei waac yiem Fi[^]lipv[^]poi 3:13-14 “*Gorx-youz aac, yie maiv zeix funx yie zorqv duqv mi'aqv. Yie kungx zoux nduqc nyunge hnangv. Jiex daaih nyei sic yie la'kuqv nzengc mi'aqv, longc qaqv hungx jienv wuov ndaangc mingh, baeng zaqc tiux taux zorqv duqv zingh nyeic nyei dornx, se dongh Tin-Hungh heuc yie kaux Giduc Yesu mingh yiem gu'nguaaic duqv nyei zingh nyeic.*”

Dorh Ging-Sou Nyei Eix-Leiz Daaih Longc Yiem Maengc:

1. Muangx Ziouv nyei waac nyei m'sieqv dorn zoux yietc mou yietc setv Tin-Hungh gorngv nyei...maiv camv yaac maiv zoqc, zoux dongh Ninh heuc zoux wuov zanc zoux yaac buangv hnyouv buangv eix nyei. Muangx Ziouv nyei waac se benx yietc norm gorn ndoqv bun mbuo haih maaih hnyouv hnangv Ziouv. Meih hnangv Ndaawitv nor ei nzengc Ziouv nyei za'eix nyei fai? Fai meih ei deix maiv ei deix? Tin-Hungh lorz mienh dongh maaih hnyouv muangx ninh nyei mienh. Naaiv gorngv duqv zuqc meih nyei hnyouv nyei fai? Meih nyei mauv, muoz deic, caux maengc se doix diuc ninh nyei za'eix nyei fai? Meih ganh oix zuqc zaah mangc gaax meih nyei hnyouv, meih zoux nyei sic, mangc gaax haaix norm dornx fai haaix nyunge sic oix zuqc goiv yienc, maaih haaix nyunge zuiz dongh meih zoux nyei maiv maaih mienh hiuv mv baac kungx Tin-Hungh hiuv hnangv dongh meih oix zuqc nyiemc nyei?
2. Nzamc Leiz-Latc 28 Muangx waac duqv nyei fuqv, maiv muangx waac zuqc zioux. Yo[^]han 14:15,21-24 Yesu gorngv, “se gorngv meih mbuo hnamv yie, meih mbuo ziouc ei jienv yie nyei lingc zoux.” Jangx jienv: “...kungx sienx hnangv yaac maiv ei jienv zoux se maiv lamh longc...” (Yaagorpc 2:17, 20)
3. Maaih hnyouv hnangv Ziouv nyei m'sieqv dorn maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv dauv gaux, yaac maaih hnyouv muangz Ziouv nyei waac.

Da'Hmz Zaang: M'sieqv Dorn Oix Maaih Hnyouv Hnangv Ziouv Oix Zuqc Maaih Hnyouv Fu-Sux Tin-Hungh, Fu-Sux Ganh Nyei Nqox, caux Fu-Sux Hmuangv Doic

Doqc Nyei Ging-Sou: Matv[^]tai 20:28 Yesu gorngv, “*Hnangv yie, Baamh Mienh nyei Dorn nor, yie maiv zeiz daaih oix mienh fu-sux yie. Yie daaih fu-sux mienh yaac siev yie nyei maengc weic zuoqc mienh camv nzuonx.*”

Gorngv Jiex Gorn Nyei Waac:

Sienc Yesu Giduc nyei mienh, fai gan Yesu nyei mienh maaih eix-leiz gorngv mbuo zuotc ninh nyei zaux-mbiec nyei mienh. Ziouv hnangv haaix nor zoux mbuo yaac hnangv wuov nor zoux. Mbuo gorngv mbuo zoux “Yesu Mienh” maaih eix leiz gorngv mbuo oix maaih hnyouv hnangv Ziouv. Ninh hnangv haaix nor mbuo yaac oix zuotc jienv hnangv wuov. Yesu heuc mbuo oix zuqc maaih hnyouv fu-sux Ninh, yaac fu-sux ninh nyei mienh. Maaih fu-sux nyei hnyouv jiex gorn yiem mbuo ganh nyei maengc, dongh lengh nyei ziangh hoc mbuo zorqv daaih fuh sux Ziouv, mbuo nyei fu-sux nyei maengc yaac liouc cuotv jiex gorn yiem mbuo ganh nyei biau. Maaih hnyouv hnangv Ziouv nyei m'sieqv dorn aac, meih

mbuo oix zuqc zieqv duqv gorngv Tin-Hungh zeiz meih mbuo daaih yaac paaiv meih mbuo tengx meih mbuo nyei nqox. Se gorngv meih ganh nyei nqox caux meih juangc jienv biauv meih ganh maiv haih fu-sux ninh, meih fungc haih fu-sux mangc maiv buatc, ziangh nyei nyei wuov dauh Tin-Hungh. Fih hnavg nyei se gorngv meih maiv maaih hnyouv fu-sux zeiz meih wuov dauh Tin-Hungh meih fungc haih fu-sux meih nyei nqox dongh longc meih nyei mienh. Weic naaiv maaih hnyouv hnamv Ziouv nyei m'sieqv dorn oix zuqc fu-sux Ninh da'yietv, liuz fu-sux ganh nyei nqox caux hmuangv doic. Gorngv taux fu-sux, yie oix zuqc hnavg haaix nor fu-sux?

Porv Mengh Ging-Sou:

A. Zoux auv nyei mienh (doqc E^{fe}so 5:22)

1. M'sieqv dorn maaih hnyouv hnavg Ziouv se dongh m'sieqv maaih hnyouv fu-sux nyei mienh. M'sieqv dorn maiv gunv maiv gaengh dorng jaa fai dorng liuz jaa haih fu-sux Tin-Hungh nyei. Mv baac dorng jaa nyei m'sieqv dorn maaih ninh mbuo nyei nqox zuqc fu-sux.
2. Maaih fu-sux nyei hnyouv da'yietv bun Tin-Hungh liuz ziouc jiex gorn yiem ganh nyei biauv zong, se gorngv meih maaih nqox meih oix zuqc jiex gorn fu-sux ninh. Tin-Hungh zeiz m'sieqv dorn daaih tengx ninh mbuo nyei nqox (mangc Tin deic douh 2:18 *“Ziouv Tin-Hungh aengx gorngv, “Nduqc laanh mienh ganh yiem hnavg se maiv horpc. Yie aengx oix zeiz dauh daaih puix ninh, caux ninh zoux doic tengx ninh.”* Maaih hnyouv hnavg Ziouv nyei m'sieqv dorn oix zuqc jiex gorn bieqc hnyouv gorngv “yie se Tin-Hungh paaiv daaih weic tengx yie nyei nqox”. Tengx nyei eix-leiz se gorngv meih maaih buonc juangc jienv ndaam, nyunc caux weic zoux ei Ziouv nyei za'eix, benx doix (hnavg ngongh cie nor), benx orn, ceix, caux nunz nyei mienh.
3. Se gorngv meih jaa fu-sux Tin-Hungh meih ziouc haih jaa fu-sux ganh nyei nqox. Se gorngv meih zieqv gorngv Ziouv paaiv meih daaih tengx meih nyei nqox, ziouc haih koi meih nyei m'zing bun meih zieqv duqv Ziouv nyei eix meih ziouc haih ei Tin-Hungh zeiz meih nyei muoz deic, meih yaac gauh haih ginv ei Tin-Hungh nyei mouz deic tengx meih nyei nqox.

B. Zoux nqox nyei mienh (E^{fe}so 5:25)

1. Ging-sou gorngv nqox oix zuqc hnamv ganh nyei auv hnavg ganh nyei sin yaac zuqc siev maengc weic ganh nyei auv weic zuotc Yesu zoux nyungc zeiv.
2. Zoux nqox nyei mienh oix zuqc hnamv taux auv nyei nza'hmien buonc. Nqox yaac oix zuqc hnamv mangc gaax oix zuqc hnavg haaix nor fu-sux ganh nyei auv. Nqox oix zuqc da'yietv fu-sux Tin-Hungh, da'nyeic ninh nyei auv, da'faam ninh nyei fu'jueiv, liuz cingx taux ninh zoux nyei gong.
3. Zoux nqox nyei mienh yaac oix zuqc hnamv mangc, yaac naaic gaax ganh yie zoux nyei se tengx ceix yie nyei hmuangv doic fai torngv caux caeqv hmuangv doic.
4. Bide heuc zoux nqox nyei mienh oix zuqc korv-lienh ganh nyei auv, taaih ganh nyei auv. (1 Bide 3:7 *Meih mbuo zoux nqox nyei mienh yaac oix zuqc fih hnavg nyei hiuv duqv korv-lienh ganh nyei auv, weic zuqc m'sieqv dorn gauh mau m'jangc dorn. Yaac oix zuqc taaih auv weic zuqc ninh mbuo caux meih mbuo fih hnavg nyei duqv Tin-Hungh ceix bun nyei en, se duqv nzipc yietc liuz nyei maengc. Oix zuqc hnavg naaiv nor zoux weic maiv bun haaix nyungc laanh meih mbuo daux gaux nyei waac.*)

5. Baulo heuc zoux nqox nyei mienh oix zuqc hnamv ninh mbuo ganh nyei auv. *Ko^lo^si 3:19 “Zoux nqox nyei mienh aah! Oix zuqc hnamv ganh nyei auv, yaac maiv dungx zoux doqc ninh.”* Se gorngv haaix laanh nqox ginv hnamv ninh ganh nyei auv yaac taaih ganh nyei auv wuov laanh mienh maaih buangv hnyouv buangv eix nyei auv. Maiv maaih haaix nyungc bun m’sieqv dorn gauh buangv hnyouv yiem naaiv seix zangc se gorgnv ninh hiuv duqv ninh mbuo nyei nqox hnamv ninh, yaac zoux sic biux mengh ninh mbuo nyei nqox taaih ninh mbuo. Daux nzuonx naaiv nyungc m’sieqv gauh haih mbuoqc, gauh haih taaih, gauh haih fu-sux ninh mbuo nyei nqox caux hmuangv doic.

C. Zoux sic biux mengh meih fu-sux Tin-Hungh

1. Se gorngv meih maiv gaengh maaih nqox meih haih liuc leiz meih nyei hnyouv hnavg Ziouv, Da’yietv fu-sux Tin-Hungh, liuz fu-sux mienh. Mbuo fu-sux mienh biux mengh taux Tin-Hungh nyei hnamv yaac horpc Ziouv nyei hnyouv.
2. Fu-sux kungx oix zuqc zoux sic weic Tin-Hungh, fu-sux Tin-Hungh maaih eix-leiz gorngv meih zanc-zanc yiem Ziouv nyei nza’hmien muangx ninh ei ninh.
3. Baulo yiem Gaa^laa^tie 5:13 gorngv, *“Zuangx gorx-youz aac, Tin-Hungh heuc meih mbuo daaih zoux bungx nqoi nyei mienh. Meih mbuo duqv bungx nqoi mv baac maiv dungx weic naaiv sueih ganh ei ganh nyei hnyouv hanc zoux. Daux nzuonx oix zuqc laanh hnamv laanh ziouc laanh fu-sux laanh.”*
4. M’sieqv dorn maaih hnyouv hnavg Ziouv hnavg Matv^tai 6:33 gorngv nor, *“Gauh longc jienv jiex, meih mbuo oix zuqc bun Tin-Hungh zoux Ziouv gunv meih mbuo ndaangc, yaac oix zuqc ei nzengc ninh nyei eix, naaiv deix yietc zungv nyei ga’naaiv ninh ziouc jaa tipv bun meih mbuo.”* Se gorngv mbuo bun Ziouv gunv mbuo nyei maenge, yaac ei nzengc Ziouv nyei eix, mbuo zoux nyei sic, hnamv nyei jauv, mingh nyei dorngx maiv gunv faix fiuv sic fai niv mbuo ziouc hnavg Baulo gorngv yiem 1 Ko^lin^to 10:31 *“Weic naaiv, maiv gunv meih mbuo nyanc fai hopv fai zoux haaix nyungc, yietc zungv oix zuqc zoux weic bun mienh taaih Tin-Hungh.”*
5. Hnamv Bide gorngv nor, Tin-Hungh bun mbuo nyei zingh nyei mbuo oix zuqc longc daaih fu-sux Tin-Hungh caux mienh *“Dauh dauh duqv zipv Tin-Hungh nyei zingh nyeic yaac oix zuqc goux longx. Haaix dauh zipv haaix nyungc zingh nyeic oix zuqc longc tengx zuangx mienh. Haaix dauh zunh doz oix zuqc za’gengh douc Tin-Hungh nyei waac. Haaix dauh cuotv fim tengx mienh oix zuqc longc Tin-Hungh bun daaih nyei qaqv fu-sux. Hnavg naaic meih mbuo zoux nyei nyungc-nyungc ziouc bun mienh dengv Yesu Giduc nyei mbuox ceng Tin-Hungh. Yesu Giduc yietc liuz maaih njang-laangc, maaih qaqv taux maanc gouv maanc doic. Aamen”*

D. Zoux sic biux mengh meih fu-sux meih nyei nqox

1. Yie hnavg haaix nor haih fu-sux yie nyei nqox? Maaih deix gorngv meih maiv hiuv duqv yie nyei nqox, maiv hiuv duqv ninh dongh haaix nyungc mienh. Se gorngv meih hiuv nor, maiv haih gorngv heuc yie fu-sux ninh saah? Se gorngv meih maaih hnyouv oix hnavg Ziouv yaac hnamv Ziouv nor oix zuqc tov TH tengx...se gorngv meih maaih kuv nqox se gauh hungh heic bun meih fu-sux ninh, mv baac maiv zeix laanh laanh m’sieqv dorn nyei nqox se benx kuv m’jangc dorn, kuv nqox, fai kuv dae. Maiv gunv ninh mbuo se dongh haaix nyungc mienh, Tin-Hungh paaiv meih tengx ninh, weic meih ginv fai laengz longc meih nyei nqox biux mengh gorngv meih ginv

fu-sux ninh. Meih ginv fu-sux fai maiv fu-sux, ginv ei Ziouv paaiv nyei fai maiv ei se yiem meih ganh. Mv baac m'sieqv dorn maaih hnyouv hnangv Ziouv oix zuqc ginv fu-sux.

2. Meih haih fu-sux meih nyei nqox weic meih zoux nyei nyungc-nyungc meih hnamv taux ninh nyei nza'hmien buonc. Meih naaic gaax ganh, yie zoux nyei tengx fai torngv fai hoic zuqc yie nyei nqox? Yie zoux fai gorngv nyei bun mienh taaih fai mangc piex yie nyei nqox? Yie tengx goux ninh nyei zingh ginx nyei fai? Maiv zeix gorngv ninh zoux zuiz meih yaac tengx ninh bingx. Ninh zoux zuiz meih oix zuqc mbuox ninh taux ninh nyei zuiz weic meih hnamv ninh maiv oix ninh zuqc dingc zuiz, zoux hoic hmuangv doic. Mv baac ninh nyei doic fai yiem zuangx mienh camv nyei dorngx meih caux ninh gorngv nyei waac biux mengh meih taaih ninh fu-sux ninh nyei fai? Meih ganh hiuv nyei.

Dorh Ging-Sou Nyei Eix-Leiz Daaih Longc Yiem Maengc:

1. Fu-sux Tin-Hungh fai fu-sux mienh se hungh heic gorngv mv baac aqc duqv zoux nyei. Mv baac se gorngv mbuo fu-sux mbuo nyei Ziouv Tin-Hungh mbuo yaac fu-sux mbuo ganh nyei nqox, mbuo gengh duqv camv nyungc nyei fuqv. Weic zuqc Tin-Hungh paaiv meih tengx meih nyei nqox, maiv maaih haaix laanh mienh haih fu-sux meih nyei nqox, meih nyei hmuangv doic – cuotv liuz meih ganh.
2. Maaih hnyouv fu-sux se yietc nyungc mbiuv gorngv mbuo se benx Giduc nyei mienh weic mbuo zuotc Yesu Giduc, ninh gorngv *“yie maiv zeiz daaih oix mienh fu-sux yie. Yie daaih fu-sux mienh yaac siev yie nyei maengc weic zuoqc mienh camv nzuonx”* (Matv^{tai} 20:28). Mbuo oix zuqc maaih hnyouv hnangv Giduc Yesu nyei hnyouv (Fi^{lipv}^{poi} 2:5).
3. Mbuo oix zuqc naaic gaax ganh, yie hnangv haaix nor fu-sux Tin-Hungh? Yie hnangv haaix nor fu-sux yie nyei nqox caux hmuangv doic? Yie longc yie nyei ziangh hoc dongh Tin-Hungh bun nyei ziangh hoc zoux haaix nyungc? Yie zoux nyei se maaih yietc liuz nyei jaa zinh nyei fai?
4. Da'yietc mbuo laanh laanh oix zuqc ginv yaac dingc hnyouv gan Tin-Hungh fu-sux ninh. Da'nyeic mbuo oix zuqc ginv tengx ginv fu-sux mbuo nyei nqox caux hmuangv doic. Se gorngv meih mbuo hnangv naaiv nor zoux ziouc haih liouc Tin-Hungh nyei fuqv yaac maaih qiangx fu-sux taux ga'hlen nyei mienh. Mbuo zoux nyei nyungc nyungc oix bun Ziouv duqv njang-langc.
5. Maaih hnyouv hnangv Ziouv nyei m'sieqv dorn maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv daux gaux, maaih hnyouv muangx Ziouv nyei waac, yaac oix zuqc maaih hnyouv fu-sux Tin-Hungh caux ganh nyei nqox.

**Da'luoqc Zaang: M'sieqv Dorn Oix Maaih Hnyouv Hnangv Ziouv Oix
Zuqc Maaih Hnyouv Mbuoqc Tin-Hungh caux Ganh Nyei Nqox**

Doqc Nyei Ging-Sou: E[^]fe[^]so 5:21-22 “*Meih mbuo oix zuqc laanh mbuoqc laanh weic zuqc meih mbuo lomh nzoih taaih Giduc Meih mbuo zoux auv nyei mienh aah! Meih mbuo oix zuqc mbuoqc ganh nyei nqox hnangv meih mbuo mbuoqc Ziouv Yesu wuov nor*”.

Gorngv Jiex Gorn Nyei Waac:

Se gorngv mbuo maaih hnyouv fu-sux Tin-Hungh caux mbuo nyei nqox, mbuo yaac oix zuqc zieqv duqv gorngv Tin-Hungh oix mbuo mbuoqc Ninh yaac mbuoqc mbuo nyei nqox. Heuc yietc laanh mienh mbuoqc ganh laanh mienh se maiv zeiz hungh heic. Mbuoqc wuov joux waac se hungh heic gorngv aqc duqv ei. Naaiv joux waac nyei gorn fai eix-leiz yiem zoux baeng nyei waac zorqv cuotv daaih longc. Yiem naaiv Ging-sou se gorngv taux hnangv zoux baeng nyei mienh nyiemc ei fai muangx ganh laanh fai zorqv ganh mingh yiem ganh laanh nyei ga'ndiev. Maiv gunv zoux auv mienh fai zoux nqox mienh fai lunx fai gox nyei mienh Ziouv nyei waac mengh mengh nyei gorngv *Meih mbuo oix zuqc laanh mbuoqc laanh weic zuqc meih mbuo lomh nzoih taaih Giduc* (E[^]fe[^]so 5:21). Mbuo qiemx zuqc yaac horpc zuqc mbuoqc weic zuqc maaih mbuoqc nyei hnyouv se hnangv Ziouv. Lengc jeiv sienx Giduc nyei mienh, oix zuqc hoqc mbuoqc ganh nyei nqox, se gorngv meih nyei nqox hnamv meih taaih meih ninh yaac maiv heuc meih zoux dongh maiv horpc Tin-Hungh nyei za'eix nyei. Tin-Hungh nyei mienh horpc zuqc maaih hnyouv laanh mbuoqc laanh, maaih hnyouv laanh taaih laanh, maiv dan kungx gorngv m'sieqv dorn mv baac yietc zungv Tin-Hungh nyei naamh nyouz. Mv baac gorngv taux dorng jaa nyei jauv, weic Tin-Hungh oix bun hmuangv doic cingx haih maaih yietv maaih nyeic nyei yiem. Ziouv cingx paaiv auv mbuoqc ganh nyei nqox. Hmuangv doic haih maaih horpc fiem dongh eix nyei yiem. Baulo gorngv yiem 1 Ko[^]lin[^]to 11:3 “*Mv baac yie oix meih mbuo hiuv duqv, Giduc zoux dauh dauh m'jangc dorn nyei m'nqorngv. Nqox yaac zoux auv nyei m'nqorngv, Tin-Hungh yaac zoux Giduc nyei m'nqorngv*”

Weic nqox zoux auv nyei m'nqorngv *maiv zeiz* gorngv auv maiv haih caux jienv nqox ca'laangh fai cuotv za'eix weic zuqc maaih cong-mengh nyei auv nyei nzuih gorngv cong-mengh waac (Cong-mengh sou 31:26). Maaih haaix laanh maaih cong-mengh taaih ganh nyei auv hnamv ganh nyei auv nyei mienh maiv muangx ninh gorngv nyei waac? Nqox zoux m'nqorngv nyei eix leiz se gorngv caux auv ca'laangh liuz muangx liuz auv nyei za'eix, dauh gaux liuz, ninh oix zuqc ginv. Zouv m'nqorngv se maiv zeiz gorngv zunc fai apv mienh. Mv baac ninh zieqv duqv gorngv ninh zoux nyei ninh oix zuqc ndaam-dorng bun Ziouv. Se gorngv mbuo maaih gamh nziex Tin-Hungh, hnamv Tin-Hungh, taaih mbuo nyei nqox nor, mbuo nyei ngox yaac hnamv yaac taaih mbuo. Naaiv nyungc nqox longx yaac hungh heic bun maaih hnyouv hnangv Ziouv nyei m'sieqv mbuoqc.

Porv Mengh Ging-Sou:

A. Zoux auv nyei mienh oix zuqc ganh ginv mbuoqc

1. Zoux auv nyei mienh ganh oix zuqc ginv. Se gorngv meih ginv maiv mbuoqc meih nyei nqox maaih eix-leiz gorngv meih ginv maiv muangx Tin-Hungh nyei waac. Weic zuqc ging-sou mengh nyei njaaux heuc *Meih mbuo zoux auv nyei mienh aah! Meih mbuo oix zuqc mbuoqc ganh nyei nqox hnangv meih mbuo mbuoqc Ziouv Yesu wuov nor*(E[^]fe[^]so 5:22). Se gorngv meih mbuo mbuoqc Yesu Giduc nyei mienh nor

- gauh hungh heic bun meih mbuo mbuoqc meih mbuo nyei nqox. Se gorngv meih mbuo maaih kuv nqox dongh taaih Tin-Hungh hnamv meih mbuo nyei nor aengx gauh hungh heic mbuoqc. Maiv gunv meih mbuo nyei nqox maiv benx kuv m'jangc dorn, kuv dae fai niv, cuotv liuz ninh heuc meih mbuo zoux nyei dorngc Tin-Hungh nyei waac, ninh nyei lingc meih mbuo oix zuqc mbuoqc ninh.
2. Zoux auv nyei mienh aac, se gorngv meih maiv ginv mbuoqc meih nyei nqox nor maiv maaih haaix laanh haih apv duqv meih, mv baac meih piatv Tin-Hungh ceix nyei fuqv bun meih weic meih maiv zieqv duqv Ziouv paaiv nyei waac bun meih. Se gorngv haaix laanh m'sieqv maiv mbuoqc ganh nyei nqox nor nzengc-nzengc ninh yaac maiv mbuoqc Tin-Hungh. Se gorngv mbuo mbuoqc Tin-Hungh, dongh mbuo mangc maiv buatc, mbuo nyei nqox mbuo hnoi hnoi buatc jienv, mbuo fungc maiv mbuoqc ninh?
 3. Maaih hnyouv hnangv Ziouv nyei m'sieqv oix zuqc maaih hnyouv nyunc bun nqox zoux m'nqorngv dorh hmuangv doic, maaih hnyouv mbuoqc yaac zieqv duqv ganh nyei nqox. Baulo gorngv heuc mbuo oix zuqc mbuoqc *jorm hnyouv fu-sux Tin-Hungh nyei mienh. Gorx-youz aac, yie kuinx meih mbuo oix zuqc mbuoqc naaiv nyungc mienh caux yietc zungv juangc gong zoux nyei mienh (1 Ko^{lin}to 16:16).*

B. Zoux auv nyei mienh oix zuqc buoqc ganh nyei nqox

1. *Meih mbuo zoux auv nyei mienh aah! Meih mbuo oix zuqc mbuoqc ganh nyei nqox hnangv meih mbuo mbuoqc Ziouv Yesu wuov nor (E^{fe}so 5:22).* Ging-sou maiv heuc auv mbuoqc dongh auv taaih nyei mienh fai tongx nimc nyei mienh fai maaih mengh hoc caux mienh ceng nyei mienh. Ziouv gorngv heuc auv mbuoqc ganh nyei nqox. Zoux auv nyei mienh aac, nzunc baav meih mbuo buatc hnangv jaang gauh hungh heic bun meih mbuo mbuoqc meih mbuo nyei doic nyei nqox, meih mbuo zorqv mienh nyei nqox daaih beiv mangc taux meih mbuo ganh nyei ngox, liuz meih buatc aqc duqv bun meih mbuo mbuoqc ganh nyei nqox...maiv dungx laic duqv hungh heic heuc mbuoqc ganh nyei nqox zungv aqc.
2. Meih mbuo zoux auv nyei mienh, se gorngv meih mbuo nyei nqox maiv sienx Yesu Giduc Bide gorngv *“Meih mbuo zoux auv nyei mienh yaac fih hnangv nyei oix zuqc mbuoqc ganh nyei nqox. Hnangv naaic, haaix dauh nqox maiv gaengh sienx Tin-Hungh nyei doz, ninh nyei auv zoux nyei sic ziouc bun ninh oix sienx, liemh maiv zuqc kuinx yietc joux. Weic zuqc nqox buatc yiem auv zoux nyei nyungc zeiv maaih hnyouv taaih yaac cing-nzengc nyei”* (1 Bide 3:1-2). Meih mbuo mbuoqc ganh nyei nqox se benx yietc nyungc longx nyei nyungc zeiv bun taux maiv gaengh sienx nyei nqox. Maaih deix baav maiv sienx Tin-Hungh nyei mienh buatc ninh mbuo nyei auv zoux sic bun ninh mbuo maiv oix hiuv duqv Tin-Hungh weic ninh mbuo mingh hoqc mv baac nzuonx biauiv daaih maiv buatc yienc haaix nyungc. Se gorngv meih mbuo nyei nqox maiv gaengh sienx, meih mbuo gunv zoux nyungc zeiv longx nyei yaac mbuoqc ninh - se gorngv ninh heuc meih mbuo zoux nyei maiv doic-dekc Ziouv nyei waac. Se gorngv ninh heuc meih mbuo zoux nyei se zuiz, meih mbuo haih gorngv longx nyei mbuox ninh gorngv, *“yie hnamv yie nyei Ziouv Tin-Hungh maiv oix zoux maiv horpc ninh nyei hnyouv”* wuov nyungc meih mbuo horpc zuqc maaih hnyouv zoux horpc ganh nyei nqox nyei hnyouv nyei, se gorngv ninh buatc meih zoux caux gorngv nyei maengc doix diuc, zaih dangh nziouv zanc, ninh buatc Tin-Hungh nyei hnamv yiem meih nyei maengc. Ninh yaac oix hiuv duqv mbuo nyei Tin-Hungh.

3. Meih mbuo zoux auv nyei mienh oix zuqc mbuoqc ganh nyei nqox maiv gun ninh mbuo sienx fai maiv sienx Tin-Hungh. Mbuo maaih hnyouv mbuoqc ganh nyei nqox se zunh doz gauh mbui deix mbuo haih zanh zanc ngopv jienv ninh fai apv ninh caux mbuo mingh buoqc zangc. Zoux auv nyei mienh jangx jienv maiv zeiz nyungc nyungc nqox gorngv heuc zoux mbuo ziouc mbuoqc. Se gorngv nqox heuc meih mbuo zoux nyei dorngc Tin-Hungh meih mbuo oix zuqc mbuoqc Tin-Hungh eix Ging-sou nyei waac zoux, se gorngv ngox heuc meih mbuo zoux nyei dorngc hungh jaa meih mbuo oix zuqc ginv dongh horpc Ziouv nyei waac (nyungc zeiv gorngv meih nyei nqox maiv sienx, ninh oix meih mingh tengx ninh maiz diuv fai niv, fai heuc meih zoux zaqc pienx ga'naaiv fai niv...maaih camv nyungc zeiv nyei yie sienx gorngv meih mbuo ganh bieqc hnyouv nyei)

C. Zoux auv nyei mienh oix zuqc hnavg haaix nor mbuoqc

1. Zoux auv nyei mienh oix zuqc mbuoqc ganh nyei nqox *hnavg meih mbuo mbuoqc Ziouv Yesu wuov nor (E^{fe}so 5:22)*. Meih mbuo mbuoqc nqox weic Ziouv Yesu. Hnavg Ging-sou gorngv nor, “*Maiv gunv zoux haaix nyungc, oix zuqc buangv hnyouv zoux hnavg zoux weic Tin-Hungh, maiv zeiz zoux weic mienh.*” (*Ko^{lo}si 3:23*) Mbuoqc ganh nyei nyei nqox se benx yietc nyungc dongh mbuo oix zuqc buangv hnyouv zoux hnavg zoux weic Tin-Hungh nor.
2. Yiem E^{fe}so 5:24 gorngv, *Jiu-baang hnavg haaix nor mbuoqc Giduc, auv yaac oix zuqc hnavg wuov nor yiem maanc sic mbuoqc ninh nyei nqox*. Hnavg haaix nor mbuoqc se gorngv sienx Giduc nyei m'sieqv yiem maanc sic mbuoqc Tin-Hungh nor, gauh hungh heic bun ninh mbuo yiem maanc sic mbuoqc ninh ganh nyei nqox. Tov Tin-Hungh bun qaqv caux en mbuo bun mbuo haih hnamv, taaih, fu-sux caux mbuoqc ganh nyei nqox.
3. Weic haaix nyungc maaih m'sieqv dorn camv nyei maiv oix mbuoqc ganh nyei nqox? Ging-sou gorngv weic zuqc ninh mbuo gamh nziex, ninh mbuo gamh nziex se gorngv yie mbuoqc yie nyei nqox nor, ninh oix ei ninh nyei hnyouv maiv ei yie nyei hnyouv. Bide gorngv, *Zinh ndaangc gan longx Tin-Hungh, sienx kaux ninh wuov deix m'sieqv dorn hnavg naaiv nor zornz nzuic. Ninh mbuo mbuoqc ganh nyei nqox gunv, hnavg Saalaa muangx Apc^{laa}ham nor, heuc Apc^{laa}ham zoux ninh nyei ziouv. Se gorngv meih mbuo zoux horpc yaac maiv gamh nziex haaix nyungc, meih mbuo ziouc zoux ninh nyei sieqv.* (1 Bide 3:5-6)
4. Mienh gamh nziex weic zuqc ninh mbuo maiv maaih sienx fim. “*Yesu naaic saigorx, “Meih mbuo weic haaix diuc gamh nziex? Meih mbuo corc maiv sienx kaux yie?”* (*Maako 4:40*) Sienx fim caux mbuoqc se maaih haaix nyungc jiu tong? Se gorngv mbuo maaih sienx fim yaac bungz hnyouv Ziouv gorngv nyei waac, mbuo bungz hnyouv gorngv mbuo ei Ninh nyei waac mbuoqc mbuo nyei nqox. Mbuo yaac sienx gorngv Tin-Hungh hiuv duqv ninh gorngv nyei, mbuo bungz hnyouv ninh nyei waac ziouc mbuoqc ganh nyei nqox hnavg ninh nyei waac gorngv nor. Tov Tin-Hungh mbuo mbuo jaa maaih sienx fim yiem Ninh (*Lugaa 17:5*) bun mbuo haih muangx ninh nyei waac mbuoqc mbuo nyei nqox.
5. Yiem Tidatc sou 2:4-5 gorngv, “*Hnavg naaic, ninh mbuo haih njaaux auv-jaanx hnamv nqox caux fu'jueiv, haih gunv duqv ganh, maaih hnyouv cing-nzengc, zaangv longx jaa-dingh, zoux longx bun mienh yaac mbuoqc ganh nyei nqox weic maiv bun mienh maaih dorngx gorngv doqc Tin-Hungh nyei doz.*” Ei naaiv deix

ging-sou njaaux nyei nor, mbuoqc nqox nyei jauv se maiv zeiz gorngv weic nqox se zic duqv mbuo fai puix duqv mbuo mbuoqc. Mbuo mbuoqc se weic Tin-Hungh paaiv mbuo yaac heuc mbuo mbuoqc. Ninh bun qaqv mbuo haih mbuoqc, ninh yaac taaih dongh taaih ninh nyei mienh dongh ei jienv ninh nyei waac nyei mienh. Yiem 1 Saa^{mu}en 2:30 gorngv, “*Weic naaiv Ziouv, I^{saa}laa^{en} nyei Tin-Hungh, gorngv, ‘Yie laengz jiex waac gorngv meih nyei zeiv-fun caux meih nyei ong-taaix-ngaeqv nyei zeiv-fun oix duqv yietc liuz bieqc cuotv yiem yie nyei nza'hmien fu-sux yie.’ Mv baac ih zanc Ziouv gorngv, ‘Yiem naaiv mingh maiv bun hnanv naaic aqv. Taaih yie wuov deix, yie oix taaih ninh mbuo. Mangc piex yie wuov deix, ninh mbuo zungv zuqc mangc piex.’*”

Dorh Ging-Sou Nyei Eix-Leiz Daaih Longc Yiem Maengc:

1. Maaih hnyouv hnanv Ziouv nyei m'sieqv dorn, maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv daux gaux, maaih hnyouv muangx Ziouv nyei waac, oix zuqc maaih hnyouv fu-sux Tin-Hungh caux ganh nyei nqox yaac maaih hnyouv mbuoqc Tin-Hungh caux ganh nyei nqox.
2. Mbuo mbuoqc ganh nyei nqox benx zingh ginx mbuox mienh gorngv mbuo sienx Tin-Hungh nyei waac, mbuo ei Tin-Hungh nyei waac, mbuo mbuoqc Tin-Hungh nyei waac.
3. Oix maaih hnyouv hnanv Ziouv oix zuqc mbuoqc Ziouv yaac mbuoqc ganh nyei nqox. Laanh laanh m'sieqv dorn ganh oix zuqc dingc hnyouv ginv mbuoqc ganh nyei nqox. Jangx jienv oix zuqc taaih ganh nyei nqox, mbuo haih mbuoqc weic zuqc mbuo taaih Hnanv Baulo gorngv nor, “*Auv yaac oix zuqc taaih ganh nyei nqox*” (E^{fe}so 5:33) Naaic gaax ganh, yie zoux nyei sic bun yie nyei nqox naaic yie zoux bun Ziouv Yesu nyei fai? Mbuo hnanv haaix nor dau mbuo nyei nqox? Maaih deix m'sieqv dorn maiv gun nqox gorngv longx fai ciouv m'daaih dau fih hnanv nyei. Meih hnanv haaix nor dau biux mengh meih hnanv haaix nor taaih. Yie buatc jiex m'sieqv dorn dongh maiv taaih ninh nyei nqox nyei mienh, ninh ngopv ninh nyei nqox, ninh guaix ninh nyei nqox, ninh pienx bun ninh nyei nqox, ninh fan ninh nyei nqox, dorn mienh camv mv baac ninh caux ninh nyei nqox nzaeng faix fiuv sic. Ninh nyei nqox gorngv waac maiv jomc ninh nzaeng jienv gorngv. Haaix laanh mienh maiv buatc jiex naaiv nyungc m'sieqv dorn? Nzunc baav mbuo guon jienv nzuih se benx taaih nyei jauv. Hnanv Cong mengh sou gorngv nor “*Liemh mienh hngongx mienh sekv nzieqc, maiv ko lo, ziouc funx maaih cong-mengh, ninh nqapc jienv nzuih maiv gorngv waac ziouc funx guai.*” (Cong mengh 17:28).
4. Meih nyei nqox se dongh meih yietc seix yiem naaiv norm baamh gen horpc zuqc tengx nyei mienh, maiv gunv ninh se hnanv haaix nor, dongh haaix nyungc mienh, dongh haaix nzangh mienh, ninh se benx Tin-Hungh nyei fuqv bun meih. Tin-Hungh bun meih nyei nqox meih bun meih haih caux ninh haih juangc hlo yiem Ziouv. Bun meih haih hoqc nyunc taaih Ziouv weic meih taaih meih nyei nqox, hoqc mbuoqc Ziouv weic meih mbuoqc meih nyei nqox, hoqc fu-sux Ziouv weic meih fu-sux meih nyei nqox, hoqc ziepc zuoqv hnyouv bun Ziouv weic meih ziepc zuoqv hnyouv bun meih nyei nqox. Meih yiem naaiv seix zangc haih mbuoqc ganh nyei nqox ziouc haih mbuoqc Zangc Diex. Se gorngv meih maiv maaih ngox Tin-Hungh bun qiangx meih ceix meih nyei hnyouv liepc meih nyei hnyouv daaih mbuoqc Tin-Hungh nyei mienh. Meih maaih hnyouv mbuoqc ganh nyei nqox biux mengh meih maaih hnyouv ei Ziouv nyei waac mbuoqc Ziouv taaih Ziouv.

**Da’Cietv Zaang: M’sieqv Dorn Oix Maaih Hnyouv Hnangv Ziouv Oix
Zuqc Maaih Hnyouv Hnamv Tin-Hungh, Hnamv Ganh nyei Ngox caux
Fu’jueiv**

Doqc Nyei Ging-Sou: Matv[^]tai 22:35-38 “*Ninh mbuo nyei guanh maaih dauh njaaux leiz nyei fin-saeng oix nduov Yesu gorngv dorngc waac. Ninh ziouc naaic gaax, “Fin-Saeng aac, yietc zungv Leiz-Latc, haaix diuh gauh longc jienv jiex?” Yesu dau, “Oix zuqc longc nzengc hnyouv, longc nzengc za’eix, longc nzengc cong-mengh hnamv Ziouv, meih nyei Tin-Hungh. Naaiv se hlo jiex, gauh longc jienv jiex nyei leiz aqv.”*

Gorngv Jiex Gorn Nyei Waac:

Yiem Tidatc Baulo gorngv mbuox hnyangx-jeiv gox nyei m’sieqv dorn oix zuqc zoux sic puix sienx Tin-Hungh nyei mienh, maiv dungx gorngv waac-huv, maiv dungx hengx hopv diuv. Ninh mbuo kungx oix zuqc njaaux longx nyei sic hnangv wuov nyungc ninh mbuo ziouc haih njaaux auv-jaanx hnamv nqox caux fu’jueiv (Tidatc 2:3-4). Naaiv biux mengh nyei gorngv Tin-Hungh zoux da’yietv yiem m’sieqv dorn nyei maengc liuz ninh mbuo nyei nqox se zoux da’nyeic. Naaiv yaac biux mengh gorngv gox nyei m’sieqv dorn oix zuqc zoux sic puix sienx Tin-Hungh nyei mienh, zoux nyungc zeiv longc njaaux lunx nyei m’sieqv dorn hnangv haaix nor liuc leiz hnyouv gan longx Tin-Hungh, maaih hnyouv hnangv Tin-Hungh. Maaih nqox nyei m’sieqv dorn oix zuqc hoqc hnamv ninh mbuo nyei nqox. Maaih camv nyei m’sieqv dorn gorngv yie hnamv yie nyei nqox nyei lorqc. Mv baac meih hnangv haaix nor hnamv? Tin-Hungh hnamv mbuo maiv gunv mbuo maiv zic duqv, maiv puix duqv, maiv horpc zuqc mv baac weic ninh nyei en caux hnyouv ndauv ninh hnamv mbuo. Mbuo oix zuqc hnamv mbuo nyei nqox, bun ninh maaih jaa zinh, a’hneiv mbuo nyei nqox, mbuo oix zuqc ceix caux orn mbuo nyei nqox, mbuo nyei nqox horpc zuqc benx mbuo nyei jienv jiex, longx jiex nyei doic. Mbuo hiuv duqv gorngv mbuo oix zuqc hnamv Tin-Hungh yaac hnamv mienh weic zuqc ging-sou yiem 1 Yo[^]han 4:19 gorngv, “*Mbuo hnamv Tin-Hungh yaac hnamv mienh weic zuqc Tin-Hungh hnamv mbuo ndaangc.*” Mbuo hoqc camv nyei taux hnangv haaix nor hnamv Tin-Hungh mv baac mbuo maiv hoqc taux hnangv haaix nor hnamv ganh nyei nqox. Se gorngv mbuo oix benx m’sieqv dorn maaih hnyouv hnangv Ziouv caux hnamv Ziouv nor, maiv daan hnamv Tin-Hungh mbuo nyei Ziouv hnangv mbuo yaac oix zuqc hoqc hnamv ganh nyei nqox.

Porv Mengh Ging-Sou:

A. Mbuo ginv Hnamv Tin-Hungh

1. Yiem Nzame Leiz Latc 6:5 Tin-Hungh gorngv mbuox ninh ginv daaih nyei I[^]saa[^]laa[^]en mienh, “*Oix zuqc longc nzengc hnyouv, longc nzengc za’eix, longc nzengc qaqv hnamv Ziouv, meih mbuo nyei Tin-Hungh*” Hnangv haaix nor longc nzengc hnyouv? Longc nzengc hnyouv maaih haaix nyungc eix-leiz? Maaih eix-leiz gorngv bun nzengc hnyouv Tin-Hungh maiv liouh yietc deix. “Hnyouv” wuov joux waac yiem ging-sou se gorngv taux bieqc hnyouv nyei dorngx, fiem-fingx caux qaqv, caux mouz deic...mbuo zoux haaix nyungc zoux dongh mbuo zoux nyei.
2. Yiem Siang-ngaengc waac maaih laanh mienh oix nduov Yesu gorngv dorngc waac. “*Ninh ziouc naaic gaax, “Fin-Saeng aac, yietc zungv Leiz-Latc, haaix diuh gauh longc jienv jiex? Yesu dau, “Oix zuqc longc nzengc hnyouv, longc nzengc za’eix,*

longc nzengc cong-mengh hnamv Ziouv, meih nyei Tin-Hungh. Naaiv se hlo jiex, gauh longc jienv jiex nyei leiz aqv.” (Matv[^]tai 22:35-38)

3. Mbuohngv haaix nor hnamv Tin-Hungh, oix zuqc longc nzengc hnyouv (hnamv ninh longc nzengc nyungc-nyungc dongh meih maaih nyei haih nyei, hnamv ninh gauh camv jiex nyungc nyungc, zunv dingc hnyouv hnamv ninh nduqc dauh yaac guangc nyungc-nyungc dongh jienv bun mbuo nyei). Longc nzengc za'eix (fai maengc, maaih eix-leiz gorngv hnamv ninh camv gor laengz siev maengc weic ninh, longc maengc zoux ninh nyei gong, ziangh weic ninh). Longc nzengc cong-mengh (mbuoqc ninh nyei eix, dongh meih hiuv ninh nyei leiz meih mbuoqc ninh ei ninh, longc Ninh bun meih nyei cong-mengh taaih Ninh) yaac longc meih nyei qaqv maiv gunv meih zoux nyei se zoux weic bun mienh haih taaih Ziouv.
4. Yesu gorngv *“Se gorngv meih mbuo hnamv yie, meih mbuo ziouc ei jienv yie nyei lingc zoux”* (Yo[^]han 14:15) Mbuo haih biux mengh mbuo nyei hnamv weic mbuo muangx Ziouv nyei waac. Ei Ziouv nyei lingc fai waac se nyungc nyungc zorngh zengx gorngv mbuo hnamv Ninh. Weic mbuo hnamv mbuo ziouc ei ninh nyei za'eix, hnamv mienh, siev ganh nyei maengc, ndaam jienv ganh nyei ziepc nzangc jaax hnoi-hnoi ganh Yesu mingh. Hnangv muangx waac caux hnamv domh mienh nyei fu'jueiv muangx caux ei domh mienh gorngv nyei. Domh mienh heuc ninh mbuo zoux nyei ninh mbuo maiv ngopv mv baac ganv jienv zoux. Fih hnangv nyei Tin-Hungh nyei naamh nyouz yaac oix zuqc hnangv naaic hnamv Tin-Hungh liuz yaac hnamv Mienh. Yiem 1 Yo[^]han 5:2-3 *“Mbuo hnangv naaiv nor hiuv duqv mbuo hnamv Tin-Hungh nyei naamh nyouz, se weic zuqc mbuo hnamv Tin-Hungh yaac ei jienv ninh nyei lingc zoux. Mbuo hnamv Tin-Hungh se hnangv naaiv. Mbuo ei jienv ninh nyei lingc zoux. Ninh nyei lingc yaac maiv aqc duqv gan.”*

B. Mbuo ginv hnamv mbuo nyei nqox

1. **Baulo gorngv mbuox** hnyangx-jeiv gox nyei m'sieqv dorn oix zuqc zoux sic puix sienx Tin-Hungh nyei mienh, maiv dungx gorngv waac-huv, maiv dungx hengx hopv diuv. Ninh mbuo kungx oix zuqc njaaux longx nyei sic hnangv. Wuov nyungc ninh mbuo ziouc haih njaaux auv-jaanx hnamv nqox caux fu'jueiv (Tidatc 2:3-4).
2. Maaih hnyouv hnangv Ziouv nyei m'sieqv dorn oix zuqc ginv fai liuc leiz hnyouv hnamv ganh nyei ngox, tengx ganh nyei ngox.
3. Yesu gorngv da'nyeic longc jienv jiex nyei lingc se *“Da'nyeic diuh yaac fih hnangv nyei, ‘Oix zuqc hnamv mienh hnangv hnamv ganh nor.”* (Matv[^]tai 22:29) Se gorngv da'yietc longc jienv jiex nyei lingc se hnamv Tin-Hungh, da'nyeic longc jienv jiex se hnamv mienh, meih nyei nqox se nitv meih fatv jiex nyei mienh. Se gorngv mbuo ganh maiv hnamv mbuo nyei nqox mbuo aqc duqv haih hnamv ga'hlen mienh. Weic naaiv ginv hnamv ganh nyei nqox se jienv haic.

C. Mbuo hnangv haaix nor hnamv mbuo nyei nqox

1. Maaih hnyouv hnangv Ziouv nyei m'sieqv dorn oix zuqc zieqv duqv gorngv ganh nyei nqox yiem jienv jiex wuov laanh mienh yiem naaiv baamh gen (Jangx jienv Tin-Hungh zoux da'yietc liuz mbuo nyei nqox). Mbuo nyei nqox se gauh jienv mbuo nyei domh mienh, mbuo nyei doic, mbuo nyei langz zong mienh, fai mbuo nyei muoz doic fai ganh nyei fu'jueiv. Weic naaiv yiem Tin[^]deic[^]douh Tin-Hungh gorngv, *“Weic naaiv m'jangc dorn dorng jaa, leih ninh nyei diex maac, caux jienv ninh nyei*

- auv gapv daaih. Ninh mbuo ziouc benx yietc dauh mi'aqv.*” Zoux nqox nyei mienh yaac oix zuqc zieqv duqv gorngv se gorngv ninh dorng jaa nor, ninh nyei auv se zoux da'yietv jienv jiex wuov laanh mienh yiem ninh nyei maengc cuotv liuz Tin-Hungh. Mbuo nyei domh mienh se jienv nyei bun mbuo, mv baac mbuo nyei auv gauh jienv jiex – naaiv se ei Ziouv nyei waac. Yietc norm nyungc zeiv yiem yie mbuo ganh nyei maengc se hngangv naaiv: Yie nyei diex-maac mbuo ganh yiem, maiv lauh jiex daaih maaih hnoi nor ninh mbuo heuc daaih oix yie mbuo mingh ninh mbuo nyei biau v nyanc hngangx mv baac yie maiv yiem biau v. Meix gorngv mbuox yie nyei maa ninh naaic dangh yie liuz cingx dau ninh mbuo gorngv haih mingh fai maiv haih mingh. Yie nyei maa gorngv, “Aav, daaih nyanc hngangx hngangv, hngangv haaix nor oix zuqc naaic aev.” Mv baac Meix naaic weic ninh oix biux mengh gorngv yie (Yauzsing) se jienv bun ninh, ninh oix zoux weic taaih ninh nyei nqox hnamv taux ngox nyei nza'hmien buonc zauh heix yie maiv kungx fai. Yie a'hneiv ninh naaic yie weic zuqc biux mengh gorngv ninh cau-fiem taux yie nyei ziangh hoc nyei.
2. Maaih hnyouv hngangv Ziouv nyei m'sieqv dorn oix zuqc ginv longc ziangh hoc caux ganh nyei nqox jiu tong caa'laangh, naaiv yaac biux mengh yietc nyungc gorngv meih hnamv ninh. Maaih ziangh hoc mbuo qiemx zuqc naaic mbuo ganh nyei dae maa, maaih ziangh hoc naaic mbuo nyei zunh doz mienh, fai jiu-baang mienh nyei mv baac gauh longc jienv jiex ndangc mbuo ginv fai zoux haaix nyungc oix zuqc longc ziangh hoc caux ganh nyei nqox gorngv horpc, weic oix benx i hmuangv nyei ginv maiv zeix kungx auv fai nqox ganh nyei ginv fai za'eix.
 3. Maaih hnyouv hngangv Ziouv nyei m'sieqv dorn oix zuqc ginv daux gaux weic meih nyei ngox hnoi hnoi, naaiv se yietc nyungc mbuo haih biux mengh Tin-Hungh nyei hnamv. Yaagorpc gorngv, *Hngangv naaic, meih mbuo laanh oix zuqc nyiemc zuiz bun laanh, laanh oix zuqc tengx laanh daux gaux. Meih mbuo nyei baengc ziouc longx mi'aqv. Kuv mienh daux gaux, ninh daux gaux nyei waac maaih qaqv yaac lingh haic* (Yaagorpc 5:16). Tengx ganh nyei nqox daux gaux weic ninh nyei maengc, ninh zoux nyei gong, bun ninh haih hlo yiem Ziouv, bun ninh haih jorm hnyouv Ziouv. Se gorngv nqox maiv sienx Yesu nyei mienh nor meih horpc zuqc daux gaux tov Ziouv njoux ninh, bun ninh haih goiv hnyouv guangc zuiz daaih sienx Yesu Giduc. Meih longc ziangh hoc, longc hnyouv daux gaux weic meih nyei nqox nyei fai? Se gorngv meih zanc-zanc daux gaux weic meih nyei ngox nor, meih haih jiex gorn gauh haih zoux kuv auv bun ninh, zoux hnyouv ndauv bun ninh, zoux longx bun ninh. Tin-Hungh yaac jiex gorn yienc meih nyei hnyouv bun meih buatac meih nyei nqox hngangv Tin-Hungh buatac nor, yaac haih hnamv ganh nyei nqox hngangv Tin-Hungh hnamv ninh nor.
 4. Maaih hnyouv hngangv Ziouv nyei m'sieqv dorn oix zuqc maaih hnyouv tengx ganh nyei nqox, naaiv yaac biux mengh yietc nyungc gorngv meih hnamv ninh. M'sieqv dorn maaih ziex nyungc haih tengx, weic zuqc Tin-Hungh ganh gorngv ninh zeix mbuo daaih weic tengx m'jangc dorn. *Ziouv Tin-Hungh aengx gorngv, “Nduqc laanh mienh ganh yiem hngangv se maiv horpc. Yie aengx oix zeix dauh daaih puix ninh, caux ninh zoux doic tengx ninh.”* (Tin deic douh 2:18) Hnamv mangc gaax meih hngangv haaix nor gauh haih tengx meih nyei nqox?
 5. Maaih hnyouv hngangv Ziouv nyei m'sieqv dorn oix zuqc maaih hnyouv liuc leiz ganh nyei nqox, naaiv yaac biux mengh yietc nyungc gorngv meih hnamv ninh. Mbuo hngangv haaix nor liuc leiz mbuo nyei nqox? Da'yietv liuc leiz ganh bun nqox, liuz

- leiz ganh nyei zornq zuqv, liuc leiz biau v zong nyei jauv, liuc leiz nyanc hopv, liuc leiz zipv nyei dongh mbuo maiv buac ninh ziangh hnoi nyei fai dongh ninh mingh go nyei dorngx nzuonx fai dongh mbuo duqv buac ninh wuov norm ziangh hoc.
6. Maaih hnyouv hnamv Ziouv nyei m'sieqv dorn caux maaih hnyouv hnamv ganh nyei nqox nyei m'sieqv dorn zieqv duqv Tin-Hungh nyei en caux fuqv dongh Tin-Hungh ceix bun ninh mbuo nyei, ninh mbuo nyei nqox. Maaih camv nyungc meih haih zoux biux mengh meih hnamv meih nyei nqox. Da'yietv nyungc se meih hnamv Tin-Hungh, liuz meih hnamv mienh. Meih nyei nqox se zoux da'yietv dauh mienh dongh meih horpc zuqc hnamv. Meih oix zuqc benx yietc laanh auv dongh nqox zanc-zanc jangx jienv dongh ninh zuqc cuotv biau v nyei ziangh hoc, bun ninh a'hneiv mangc maiv duqv taux biau v dongh ninh cuotv jauv nyei ziangh hoc.
 7. Maaih hnyouv hnamv Ziouv nyei m'sieqv dorn caux maaih hnyouv hnamv ganh nyei nqox nyei m'sieqv dorn oix zuqc maaih hnyouv zoux horpc ganh nyei nqox, hiuv duqv ganh nyei nqox qiemx zuqc nyei, hiuv duqv haaix nyungc nqox maiv oix nyei, maiv gunv faix fiux sic fai. Se gorngv meih hnavg naaiv zoux nor meih nyei nqox gengh zieqv duqv gorngv meih gengh cau-fiem taux ninh weic zuqc faix fiuv sic taux ninh meih zungh hiuv. Mangc gaax ninh hnavg haaix nor dau dongh meih zoux nyei...
 8. Maaih hnyouv hnamv Ziouv nyei m'sieqv dorn caux maaih hnyouv hnamv ganh nyei nqox nyei m'sieqv dorn oix dau longx ganh nyei nqox. Nzunc baav meih nyei nqox naaic longx nyei mv baac naaic dorngc ziangh hoc fai buac meih maiv kungx jienv mv baac naaic jienv meih mingh, meih ciouv ciouv nyei dau ninh fai? Fai maiv gunv hnavg haaix nor weic meih hnamv Ziouv caux meih nyei nqox meih dau longx nyei ninh. Mbuo laanh laanh maaih qiangx dau ciouv, dau doqc, dau dorngc nyei mv baac meih nyei maengc dau longx gauh camv dau ciouv fai?
 9. Maaih hnyouv hnamv Ziouv nyei m'sieqv dorn caux maaih hnyouv hnamv ganh nyei nqox nyei m'sieqv dorn oix hiuv duqv yaac lorz qiangx ceng ganh nyei nqox yaac laengz zingh ganh nyei nqox. Yietc nyungc meih haih zoux biux mengh mengh meih ceng meih nyei nqox se maiv gorngv haaix nyungc daanh ninh yiem zuangx mienh nyei nza'hmien fai yiem meih mbuo nyei m'sieqv dorn doic nyei nza'hmien. Haaix zanc maaih qiangx buac ninh zoux kuv sic maiv dungx la'kuqv laengz zingh. Nyungc zeiv oix zuqc laengz zingh weic ngox goux longx hmuangv doic.

Dorh Ging-Sou Nyei Eix-Leiz Daaih Longc Yiem Maengc:

1. Siensex Yesu Giduc nyei m'sieqv dorn hiuv duqv gorngv ninh mbuo *Oix zuqc longc nzengc hnyouv, longc nzengc za'eix, longc nzengc cong-mengh hnamv Ziouv, meih nyei Tin-Hungh.*
2. Siensex Yesu Giduc nyei m'sieqv dorn yaac hiuv duqv gorngv ninh mbuo oix zuqc hnamv mienh hnavg hnamv ganh nor, nitv ninh mbuo fatv jiex wuov laanh mienh se ninh mbuo nyei nqox. Se gorngv meih mbuo maaih nqox maiv hiuv Tin-Hungh fai maiv taaih Tin-Hungh nor gengh gauh aqc duqv bun meih mbuo taaih, mv baac meih mbuo zuqc gin v hnamv ninh.
3. Meih mbuo nyei nqox horpc zuqc benx jienv jiex wuov laanh mienh yiem meih mbuo nyei maengc yiem naaiv seix zangc cuotv liuz Tin-Hungh hnavg. Weic naaiv mbuo zoux nyei oix zuqc biux mengh gorngv mbuo za'gengh hnamv mbuo nyei nqox.

Hnamv nqox nyei auv daux gaux weic ninh ganh nyei nqox, liuc leiz ninh ganh nyei nqox, zoux horpc ninh ganh nyei nqox, goux ninh ganh nyei nqox, dau waac longx nyei bun ninh nyei nqox. Se gorngv meih hnavg naaiv nor zoux nor, meih za'gengh biux mengh mbuox meih nyei nqox gorngv "Yie hnamv meih". Meih zoux nyei gorngv gauh mbui meih haih gorngv mbuox ninh nyei. Yie hiuv duqv meih hnamv meih nyei nqox nyei, naaiv se benx camv nyungc za'eix bun meih gauh jaa hnamv ninh gauh camv jienv faaux.

4. Maaih hnyouv hnavg Ziouv nyei m'sieqv dorn maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv daux gaux, maaih hnyouv muangx Ziouv nyei waac, oix zuqc maaih hnyouv fu-sux Tin-Hung caux ganh nyei nqox yaac maaih hnyouv mbuocq Tin-Hung caux ganh nyei nqox, maaih hnyouv hnamv Tin-Hung yaac hnamv ganh nyei nqox.

Da'Betv Zaang: M'sieqv Dorn Maaih Hnyouv Hnavg Ziouv Oix Zuqc Maaih Hnyouv Zieqv Duqv Benx Maa Nyei Jaa Zinh caux Maaih Hnyouv Buangv Nzengc Maa Nyei Hnamv

Doqc Nyei Ging-Sou: Cong-mengh 1:8 *Yie nyei dorn aah! Oix zuqc muangx meih nyei die kuinx nyei waac, yaac maiv dungx guangc meih nyei maa njaaux nyei jauv."*

Doqc Tidatc 2:4 *"Hnavg naaic, ninh mbuo haih njaaux auv-jaanx hnamv nqox caux fu'jueiv"*

Gorngv Jiex Gorn Nyei Waac:

Bun taux benx maa nyei m'sieqv dorn: maiv maaih haax nyungc gong dongh meih haih zoux nyei yiem naaiv seix zangc maaih jaa zinh ndongc benx maa nyei gong. Yiem Tidatc 2:4; Baulo gorngv mbuox zoux maa nyei mienh maiv dan hnamv ganh nyei nqox hnavg mv baac hnamv fu'jueiv benx hnamv fu'jueiv nyei mienh, maaih hnyouv a'hneiv benx maa, maaih hnyouv buangv nzengc maa nyei hnamv, dorch fu'jueiv gan Ziouv nyei waac. Oix zuqc buatc maaih nyei fu'jueiv benx Tin-Hung nyei fuqv bun daaih, maiv zeix hoic mbuo nyei mienh, mbuo ziouc maaih hnyouv oix caux ninh mbuo, njaaux ninh mbuo, dorch ninh mbuo. Mbuo buatc mengh nyei, m'sieqv dorn maaih hnyouv hnavg Ziouv oix zuqc hnamv Tin-Hung da'yietv, liuz hnamv ganh nyei nqox, liuz hnamv ganh nyei fu'jueiv. Naaiv buatc hnavg jang hung heic nyei nor, mv baac mangc ndo nyei eix-leiz gorngv taux hnamv Tin-Hung ceix nyei fuqv hnavg Singx Nzung sou 127:3 gorngv nor, "Naamh nyouz se Ziouv bun nzipc nyei buonc, yungz daaih nyei fu'jueiv benx ninh nyei zingh nyeic." M'sieqv dorn maaih hnyouv hnavg Ziouv nyei mienh oix zuqc maaih hnyouv zieqv duqv benx maa nyei jaa zinh, mbuo hnavg haax nor haih zieqv duqv?

Porv Mengh Ging-Sou:

A. Maaih hnyouv zieqv duqv benx maa nyei jaa zinh

1. Maaih hnyouv zieqv duqv benx maa nyei jaa zinh nyei mienh maaih hnyouv daux gaux weic ganh nyei fu'jueiv. Naaiv gengh longx jiex nyei zingh nyeic laanh laanh zoux maa nyei mienh haih bun ganh nyei fu'jueiv. Ndorm-ndorm daux gaux weic mbuo nyei fu'jueiv, bun ninh mbuo haih gan longx Tin-Hung, haih taaih Ninh, ei Ninh nyei waac zoux, maaih hnyouv lorz Ziouv nyei za'eix. Daux gaux tov Tin-

Hungh beu jienv mbuo nyei fu'jueiv, bun mbuo haih dorh ninh mbuo hlo daaih ziangh weic Ziouv.

2. Maaih hnyouv zieqv duqv benx maa nyei jaa zinh nyei mienh maaih buangv nzengc maa nyei hnamv, hnyouv ndaauv, maaih hnyouv liuc leiz ganh nyei fu'jueiv, bun ninh mbuo maiv zuqc ngorc, maaih nzengc nyei lui houx zuqv, tengx ninh mbuo fioux nzengc sin zangc, dongh ninh mbuo sin zangc qiemx zuqc nyei maa yaac longc ninh nyei banh zeic lorz daaih bun, hhangv Cong-mengh waac 31:21 gorngv *“Duih sornng nyei ziangh hoc ninh maiv nzauh ninh nyei biauv zong mienh, weic zuqc ninh nyei ziangh biauv mienh maaih lui-siouv zuqv”*
3. Maaih hnyouv zieqv duqv benx maa nyei jaa zinh nyei mienh oix zuqc maaih a'hneiv nyei hnyouv. Se gorngv zoux maa nyei mienh buangv hnyouv buangv eix nyei yiem ninh nyei maengc, a'hneiv nyei ziangh (maiv maaih eix-leiz gorngv nyungc-nyungc yiem ninh nyei maengc se duqv longx nyei mv baac ninh ginv a'hneiv nyei ziangh). Naaiv nyungc mienh nyei biauv gengh maaih a'hneiv nyei yiem. Maaih fu'jueiv nyei mienh weic haaix nyungc oix zuqc a'hneiv? Weic zuqc maaih mienh camv maiv haih maaih “fuqv jueiv”. Singx Nzung sou 113:9 gorngv, *“Ninh bun maiv haih maaih gu'nguaaz nyei m'sieqv dorn duqv biauv yiem, bun ninh duqv fu'jueiv ziouc orn-lorqc. Oix zuqc ceng Ziouv.”* Mbuo oix zuqc a'hneiv duqv buatc mbuo nyei fu'jueiv maiv gunv mbuo ziangh hnoi zoux gong ndongc haaix kouv mbuo buatc mbuo nyei fu'jueiv mbuo oix zuqc a'hneiv weic mbuo zieqv duqv Tin-Hungh nyei en bun mbuo. Maiv gunv fu'jueiv hhangv haaix nor, Ziouv heuc mbuo hnamv ninh mbuo (Tidate 2:4). Maiv buatc mbuo nyei fu'jueiv mbuo jangx gor, buatc nyei ziangh hoc mbuo a'hneiv nyei fai? Mbuo maiv zuqc gorngv haaix nyungc...mbuo nyei fu'jueiv buatc mbuo nyei hmien ninh mbuo hiuv nyei. Zoux maa nyei mienh maaih qiangx camv nyei njaaux ganh nyei fu'jueiv. Ninh mbuo caux fu'jueiv yiem gauh camv, fu'jueiv buatc maa a'hneiv ninh mbuo gauh maaih lamh dorngx kaux.
4. Maaih hnyouv zieqv duqv benx maa nyei jaa zinh nyei mienh maaih hnyouv fu-sux maaih hnyouv tengx, maaih hnyouv bun taux ninh ganh nyei fu'jueiv. Sienx Giduc nyei mienh oix zuqc fu-sux Tin-Hungh, zoux auv nyei mienh liemh nqox zuqc fu-sux, zoux maa nyei mienh liemh fu-jueiv zuqc fu-sux. Mbuo orn, mbuo ceix, mbuo njaaux, mbuo kuinx, mbuo nunz, mbuo muangx ninh mbuo. Mbuo laanh laanh jangx duqv mbuo ganh nyei maa, jangx taux ninh hhangv haaix nor korh lienh mbuo, dorh mbuo, bieqc hnyouv mbuo, mbuo ih zanc benx maa nyei mienh yaac oix ceix mbuo nyei fu'jueiv bun ninh mbuo jangx taux mbuo nor, jangx taux longx nyei sic. (Mbuo maaih deix jangx taux mbuo nyei maa nor mbuo gorngv yie nyei maa m'daaih maiv kungx gor, maiv longc ziangh hoc caux yie fai dorh yie. Maiv gunv meih mbuo nyei maa longx fai maiv longx bun meih, meih haih ginv zoux longx bun meih nyei fu'jueiv weic meih oix maaih hyouv hhangv Ziouv.)

B. Maaih hnyouv buangv nzengc maa nyei hnamv

1. Zoux maa nyei mienh, longx jiex nyei zingh nyeic meih haih bun meih nyei fu'jueiv se hnamv ninh mbuo. Dorh meih mbuo nyei fu'jueiv daaih buoqc zangc Tin-Hungh.
2. Maaih maa nyei hnamv nyei mienh maiv dorh ninh mbuo nyei fu'jueiv nyei mengh mingh zunh, fu'jueiv zoux dorngc nyei oix zuqc njaaux zoux horpc, zoux longx nyei oix zuqc ceng, maiv zeiz dorh mingh gorngv bun zuangx mienh. Zoux maa nyei mienh maiv dan horpc zuqc gorngv cong-mengh nyei waac hhangv mangc Cong-

- mengh sou 31:26. Ninh nyei nzuih gorngv cuotv nyei se kuinx, orn, nunz yaac njaaux ninh fu'jueiv maaih hnyouv hnangv Ziouv. Ninh yaac horpc zuqc ceix caux liuc leiz dornx fai biau v bun fu'jueiv haih zuotc. (Nyungc zeiv se gorngv biau v forqv yaac mangc duqv jiex nyei maa, ninh mbuo nyei fu'jueiv yaac mangc duqv jiex fih hnangv).
3. Maaih diuh nzung nyei eix-leiz gorngv taux maa nyei hnamv za'gengh jaaix, weic maa zanc-zanc goux longx hmuangv doic, maiv maaih haaix dauh nyei hnyouv hnangv maa nyei hnyouv ndauv, maa gengh korh lienh mbuo, maa maiv douh ganh duqv longx, maa hnamv taux fu'jueiv nyei nza'hmien buonc. Naaiv nyungc maa za'gengh maaih hnyouv hnangv Ziouv Yesu Giduc yaac maaih hnyouv hnamv Ziouv.
 4. Mbuo mangc Ging-sou se mbuo buatc maaih camv nyei benx kuv maa dongh hnamv ninh mbuo nyei fu'jueiv; maaih camv nyei benx waaic nyei maa maiv liuc leiz taux ninh mbuo nyei fu'jueiv heuc fu'jueiv zoux waaic sic. Mbuo buatc Saa^mu^en benx yietc dauh kuv douc waac mienh weic ninh nyei maa maaih maa nyei hnamv, maaih hnyouv hnamv Tin-Hungh, laengz bun ninh zoux Ziouv nyei gong, maiv gunv zuqc leih hmuangv doic go. Ninh nyei maa maiv haih maaih fu'jueiv, ninh tov Ziouv bun ninh haih maaih, *“Ninh ziouc laengz jie z ngaengc waac gorngv, “Nernh Jiex nyei Ziouv aah! Se gorngv meih mangc yie, meih nyei m'sieqv bou nyei naanc zingh, yaac jangx yie, maiv la'kuqv yie, meih nyei m'sieqv bou nor, meih yaac ceix dauh dorn bun yie, meih nyei m'sieqv bou, yie oix fungx ninh bun meih weic yietc seix. Yie yietc liuz yaac maiv teix ninh nyei m'nqorngv.”* (1 Saa^mu^en 1:11) Ninh daux gaux nyei Ziouv dau ninh bun ninh duqv dauh dorn heuc Saa^mu^en, naaiv dauh dorn guangc liuz nyorx corc faix nyei ninh dorh naaiv dauh dorn mingh tengx sai-mienh zoux gong leih ninh mbuo biau v go nyei, Hannaa gorngv *“Yie daux gaux weic oix duqv naaiv dauh fu'jueiv. Ziouv yaac ziux yie tov nyei waac ceix bun yie. Weic naaiv yie cingx daaih dorh ninh daaih fungx bun Ziouv. Ninh yietc seix benx Ziouv nyei mi'aqv.”* (1 Saa^mu^en 1:27-28). Maaih maa nyei hnamv maaih hnyouv hnangv Tin-Hungh nyei maa oix zuqc zieqv duqv gorngv mbuo maaih nyei fu'jueiv se Tin-Hungh nyei fuqv, Tin-Hungh nyei, mbuo se zoux goux nyei mienh hnangv oix zuqc bun Ziouv longc dongh mbuo duqv nyei fu'jueiv ei Ziouv nyei za'eix. Longx nyei maa hnamv Tin-Hungh yaac dorh ganh nyei fu'jueiv gan longx Tin-Hungh, waaic nyei maa njaaux fu'jueiv zoux waaic, mangc Matv^tai 14:1-12 mbuo buatc maaih laanh Helotv hungh longc ninh nyei youz nyei auv He^lo^ndietc (dornge Lewi 18:16; 20:21) Naaiv laanh m'sieqv dorn benx waaic nyei maa, weic ninh ganh zoux nyei zuiz, Yo^han zanc-zanc gorngv mbuox Helotv, *“Meih maiv maaih leiz longc He^lo^ndietc zoux auv”* Naaiv dauh auv ziouc ciex jiex oix daix Yo^han. Taux Helotv nyei sih nyietv-hnoi, He^lo^ndietc nyei sieqv yiem zuangx kaeqv mienh nyei nza'hmien cangx heix. Helotv gengh a'hneiv haic ziouc laengz waac bun wuov dauh sieqv, *“Maiv gunv meih oix longc haaix nyungc, yie laengz bun meih aqv.”* Naaiv dauh sieqv ziux ninh nyei maa mbuox nyei waac gorngv, *“Tov ih zanc zorqv tengx mienh jiex wuom nyei leiz wuov dauh Yo^han nyei m'nqorngv an jienv torqv-sienx dorh daaih bun yie oc.”* Helotv ziouc paaiv mienh mingh wuov loh hngaqv ndutv Yo^han nyei m'nqorngv. Ninh mbuo zorqv m'nqorngv daaih an jienv torqv-sienx bouh daaih bun wuov dauh sieqv. Sieqv yaac jiu bun ninh nyei maa.” Mbuo buatc maa maaih hnyouv zoux waaic nyei maaih hnyouv nduov maaih hnyouv heuc ganh nyei sieqv zoux waaic sic.

C. Maaih hnyouv a’hneiv ganh nyei maengc

1. Maaih hnyouv a’hneiv ganh nyei maengc nyei mienh maiv daan zieqv duqv Tin-Hungh nyei en zingh hngang mv baac haih liouc ninh nyei a’hneiv bun taux ninh ganh nyei fu’jueiv.
2. Maaih hnyouv a’hneiv ganh nyei maengc fai maengc dongh Tin-Hungh ceix bun nyei mienh gengh gauh maaih orn lorqc weic zuqc ninh mbuo ginv orn lorqc maiv gunv ninh mbuo buangh zuqc nyei. Hngangv Baulo gorngv nor, *“Meih mbuo oix zuqc kaux Ziouv Yesu zanc-zanc maaih orn-lorqc. Yie aengx gorngv nzunc, oix zuqc orn-lorqc maah!”* (Fi^{lipv}poi 4:4)
3. Meih a’hneiv meih benx Yesu nyei mienh nyei fai? Meih a’hneiv duqv longx nyei nqox nyei fai? Meih a’hneiv meih maaih nyei fu’jueiv nyei fai? Meih nyei fu’jueiv hiuv duqv meih a’hneiv ninh mbuo nyei fai? Ninh mbuo yietv buatac meih nyei ziangh hoc meih nyei hmien hngangv haix nor? Zoux maa nyei mienh gengh gong camv haic, mv baac meih longc ziangh hoc caux meih nyei fu’jueiv jiu-tong njaaux ninh mbuo taux Tin-Hungh nyei fuqv caux en nyei fai? Zoux maa nyei mienh se gorngv ganh maiv a’hneiv ganh nyei maengc se aqc duqv a’hneiv Tin-Hungh, a’hneiv ganh nyei nqox caux fu’jueiv nyei.
4. Maaih hnyouv a’hneiv ganh nyei maengc nyei m’sieqv dorn, auv fai maa nyei mienh hiuv duqv haaix nyungc jienv, haaix nyungc maiv jienv. Maiv dungx dorh maiv jienv nyei sic daaih zoux jienv, liuz dorh jienv nyei sic daaih zoux maiv jienv. Jienv jiex se oix zuqc bun Tin-Hungh gunv yaac zoux Ziouv yiem meih nyei maengc, da’nyeic jienv nyei se meih nyei nqox, da’faam se meih nyei fu’jueiv, liuz cingx njiec taux meih zoux nyei nyungc nyungc gong.

Dorh Ging-Sou Nyei Eix-Leiz Daaih Longc Yiem Maengc:

1. Tov Tin-Hungh bun mbuo haih zieqv duqv gorngv benx maa nyei jaa zinh, bun mbuo maaih hnyouv hnamv mbuo nyei fu’jueiv, tengx mbuo nyei fu’jueiv daux gaux, dorh ninh mbuo ei jienv Ziouv nyei waac bun ninh mbuo haih benx dorn fai sieqv dongh Tin-Hungh a’hneiv nyei.
2. Maa nyei jaa zinh gengh jaaix haic, mbuo hnamv taux mbuo ganh nyei maa mbuo jangx taux ninh mbuo hngangv haaix nor dorh mbuo, njaux mbuo, ceix mbuo. Maiv zeiz gorngv laanh laanh mienh maaih naaiv nyungc maa, mv baac se gorngv meih mbuo benx m’sieqv dorn nyei mienh, duqv zoux auv nyei mienh, duqv zoux maa nyei mienh meih mbuo maaih qiangx jiex gorn haih yienc meih mbuo oix benx haaix nyungc maa nyei mienh, ginv benx buangv nzengc hnyouv ganh nyei maengc nyei maa fai?
3. Yiem Ging sou mbuo buatac zoux maa nyei jaa zinh, buangv hnyouv ganh nyei mengc nyei maa zoux nyei gong tengx duqv ziex doic fu’jueiv caux fun faqv. Hngangv Baulo gorngv taux Ti^{mo}^tai nyei sienx fim nor, *“Yie jangx zuqc meih zien-zien nyei sienx, hngangv zinh ndaangc meih nyei daa gux, Lo^{itc}, caux meih nyei maa, Yunitv, zien-zien sienx wuov nor. Yie sienx dingc meih ih zanc yaac hngangv wuov nor sienx.”* (2 Ti^{mo}^tai 1:5) Yiem Ti^{mo}^tai nyei maengc mbuo buatac ninh sienx wuonv Tin-Hungh se weic ninh ganh ginv mv baac mbuo buatac ninh nyei daa-gux nyei nyungc zeiv, mbuo yaac buatac ninh nyei maa zuotc jienv ninh nyei daa-gux nyei nyungc zeiv. Maaih hnyouv hngangv Ziouv nyei maa, oix zuqc hnamv taux hoz nqaang nyei ziangh

- hoc, mienh gorngv meih gengh maaih maa nyei hnamv, maaih maa nyei hnyouv, hnavg Baulo gorngv taux Lo[^]itc nor, weic meih sienx longx, meih nyei fu'jueiv yaac zuotc meih, meih nyei fun yaac zuotc meih fai mienh oix gorngv maiv dungx zuotc meih? Meih ganh oix zuqc ginv.
4. Maaih hnyouv hnavg Ziouv nyei m'sieqv dorn maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv daux gaux, maaih hnyouv muangx Ziouv nyei waac, oix zuqc maaih hnyouv fu-sux Tin-Hungh caux ganh nyei nqox yaac maaih hnyouv mbuoqc Tin-Hungh caux ganh nyei nqox, maaih hnyouv hnamv Tin-Hungh yaac hnamv ganh nyei nqox. Oix zuqc maaih hnyouv zieqv duqv benx maa nyei jaa zinh caux maaih maa nyei hnamv.

Da'Juov Zaang: M'sieqv Dorn Maaih Hnyouv Hnavg Ziouv Oix Zuqc Goux **Jaa dingh caux Maaih Hnyouv Ceix Hmuangv Doic**

Doqc Nyei Ging-Sou: Cong-mengh waac 14:1 “*Cong-mengh nyei m'sieqv dorn ceix jiez ninh nyei jaa-dingh, mv baac hngongx nyei m'sieqv dorn longc ninh ganh nyei buoz caeqv njiec.*”

Doqc Cong-mengh waac 31: 10-31 “*Haaix dauh haih lorz duqv ziangh horngh nyei auv? Ziangh horngh nyei auv gauh jaaix jiex la'bieiv-jaaix. Ninh nyei nqox kaux duqv zuqc ninh, yaac maiv ndortv buonv aqv. Ninh yietc seix zoux longx bun ninh nyei nqox, yietc liuz maiv zoux haaix nyungc hoic. Ninh lorz ba'gi yungh biei caux la'maah, a'hneiv longc buoz zoux gong. Ninh hnavg zoux saeng-eix nyei nzangv nor, wuonc ninh nyei nyanc hopv yiem go nyei daaih. Lungh maiv gaengh njang ninh jiez sin daaih mbenc nyanc hopv bun hmuangv doic, yaac paaiv gong bun ninh nyei m'sieqv bou. Ninh samx mangc lings deic yaac maaz daaih. Ninh longc ganh nyei buoz zornc daaih nyei nyaanh zoux huingx zuangx a'ngunc biouv. Ninh cuotv qaqv zoux gong jienh, yaac bun ninh nyei buoz henv. Ninh hiuv duqv ninh zoux daaih nyei huox maaih jaax-zinh, ninh lungh muonz buov dang zoux gong lauh nyei. Ninh weic ganh baeng suix yaac weic ganh ndatv ndie. Ninh cuotv fim nzie mienh jomc mienh, yaac sung buoz tengx dangx-donx mienh. Duih sorng nyei ziangh hoc ninh maiv nzauh ninh nyei biauv zong mienh, weic zuqc ninh nyei ziangh biauv mienh maaih lui-siouv zuqv. Ninh zoux dimc coux nyei ndie, yaac longc la'maah ndie-muonc caux setv luoqc nyei ndie zoux ganh nyei lui-houx. Ninh nyei nqox caux buonv-deic mienh gox zueiz zingh gaengh nyei ziangh hoc, zuangx mienh hiuv duqv ninh nyei nqox. Ninh longc la'maah ndie-muonc zoux lui-houx maaic, yaac fungx la'sin maaic bun saeng-eix mienh. Ninh maaih qaqv yaac duqv mienh taaih, ninh yaac jatv hoz nqaang nyei hnoi-nyieqc. Ninh nyei nzuih gorngv cong-mengh waac. Ninh yaac longc suonc nyei hnyouv njaaux. Ninh zaangv longx ninh nyei jaa-*

dingh, maiv qopv jienv buoz yiem. Ninh nyei fu'jueiv jiez daaih gorngv ninh maaih fuqv, ninh nyei nqox yaac ceng ninh gorngv, "Maaih ziangh horngh nyei m'sieqv dorn camv nyei, mv baac meih gauh ziangh horngh jiex." Mienh maaih yuoqc fei mv baac haih jaav nyei. Nzueic nyei jauv yaac haih jiex. Mv baac taaih Ziouv nyei m'sieqv dorn puix duqv ceng. Tov bun ninh duqv zingh nyeic ziux ninh nyei buoz zoux nyei gong, yaac bun ninh zoux nyei gong yiem wuov zingh gaengh duqv mienh ceng.

Gorngv Jiex Gorn Nyei Waac:

Maaih hnyouv hngangv Ziouv nyei m'sieqv dorn lengc jeiv zoux auv, zoux maa nyei mienh horpc zuqc zieqv duqv gorngv ganh nyei biau se benx yietc norm dorngx dongh mbuo nyei hmuangv doic haih duqv ceix yaac duqv goux. Benx dorngx dongh mbuo yiem naaiv seix zangc haih bingx dongh zuqc buangh zuqc hoic nyei sic. Maiv gunv yiem ga'nyiec maengx maaih ziex nyungc mv baac se gorngv yiem biau gu'nyuoz maaih baengh orn, orn lorqc nor, gauh hungheic diev duqv dongh mbuo buangh zuqc nyei sic yiem naaiv seix zangc. Yie sienx gorngv maiv maaih haix dauh maaih hnyouv hngangv Ziouv yaac maaih hnyouv hnamv Ziouv nyei mienh maiv oix ceix ganh nyei jaa dingh fai ceix ganh nyei hmuangv doic, maiv daan gorngv ceix hngangv yaac oix goux longx ganh nyei jaa dingh caux hmuangv doic nyei. Se gorngv mbuo mangc Cong-mengh waa 31:10-31 mbuo buatc yietc laanh m'sieqv dorn, auv, fai maa dongh mbuo oix zuqc zuotc nyei. Maiv gunv mbuo maiv haih zoux nyungc nyungc dongh kuv nyungc zeiv nyei m'sieqv dorn zoux mv baac horpc zuqc maaih hnyouv zoux dongh mbuo haih nyei, maaih qiangx nyei.

Porv Mengh Ging-Sou:

A. Maaih hnyouv hngangv Ziouv nyei m'sieqv dorn maaih hnyouv ceix jaa dingh

1. Yiem Cong-mengh waac 14:1 gorngv, "*Cong-mengh nyei m'sieqv dorn ceix jiez ninh nyei jaa-dingh, mv baac hngongx nyei m'sieqv dorn longc ninh ganh nyei buoz caeqv njiec*" Cong-mengh nyei m'sieqv dorn hngangv haaix nor ceix jiez ninh nyei jaa-dingh? Longc waac ceix. Ninh gorngv nyei waac yiem biau haih bun ziangh biau nyei mienh maaih laanh hnamv fai nzauh. Maaih eix-leiz gorngv m'sieqv gorngv nyei fai maiv gorngv nyei gengh jienv haic. Maiv gunv nqox fai fu'jueiv cuotv mingh buangh zuqc ziex nyungc sic, nqox nzuonx daaih haiz auv nyei waac, fu'jueiv nzuonx daaih haiz maa nyei waac ziouc haih orn duqv hnyouv longx hngangv Cong-mengh waac 12:25 gorngv nor, "*Mienh hnyouv nzauh faanh haiz hngangv ga'naaiv ngatv jienv hniev nyei, mv baac yietc joux longx nyei waac bun ninh haiz hnyouv longx.*"
2. Cong-mengh nyei m'sieqv dorn hngangv haaix nor ceix jiez ninh nyei jaa-dingh? Ninh longc ninh nyei buoz ceix. Mienh lueic mienh maiv haih ceix maiv duqv kuv jaa dingh fai hmuangv doic. Ceix jiez jaa-dingh yiem naaiv ging-sou nyei eix-leiz se gorngv naaiv laanh m'sieqv dorn hnoi-hnoi muonz muonz zoux nyei gong ninh zoux nyei weic tengx ninh nyei hmuangv bun ninh nyei hmuangv doic haih duqv ziangh. Maaih eix-leiz gorngv m'sieqv zoux nyei gong gengh jienv haic. Mangc Cong-mengh m'sieqv dorn yiem 31 zangc 15-19 mbuo buatc naaiv laanh m'sieqv gengh jienh zoux gong, lungheic maiv gaengh njang zoux taux hmuangx, ninh zoux nyei weic oix ceix ninh nyei jaa dingh caux hmuangv doic.

3. Cong-mengh waac 31 zaang nyei m'sieqv dorn hnavg haaix nor ceix jiez ninh nyei jaa-dingh? Da'yietc naaiv nyungc auv maiv zeiz hungheic lorz duqv longc, ninh gengh maaih jaa zinh haic nyei auv. *“Haaix dauh haih lorz duqv ziangh horngh nyei auv? Ziangh horngh nyei auv gauh jaaix jiex la'bieiv-jaaix” (30:10)* Naaiv nyungc auv se nqox bangc duqv zuqc kaux duqv zuqc, naaiv nyungc auv se nqox bungx duqv hnyouv nyei mienh, *“Ninh nyei nqox kaux duqv zuqc ninh, yaac maiv ndortv buonv aqv.” (30:11)*. Ninh yietc seix zoux longx bun ninh nyei nqox, maiv zoux haaix nyungc hoic. Naaiv se ceix jaa dingh nyei m'sieqv dorn. *Ninh yietc seix zoux longx bun ninh nyei nqox, yietc liuz maiv zoux haaix nyungc hoic. (30:12)* Mienh lueic mienh maiv haih ceix kuv jaa dingh fai hmuangv doic, maaih cong-mengh nyei m'sieqv longc buoz zoux gong maaih eix-leiz gorngv ninh se maiv lueic nyei mienh *“Ninh lorz ba'gi yungh bie caux la'maah, a'hneiv longc buoz zoux gong” (30:13)*. Cong-mengh nyei m'sieqv dorn maiv gunv zuqc mingh gauh go deix gauh kouv deix ninh yaac mingh yaac zoux weic haih bun ninh nyei hmuangv doic duqv longx nyei nyanc hopv. *Ninh hnavg zoux saeng-eix nyei nzangv nor, wuonc ninh nyei nyanc hopv yiem go nyei daaih (30:14)*. Cong-mengh nyei m'sieqv dorn hnavg haaix nor ceix ninh nyei jaa dingh, *“Lungh maiv gaengh njang ninh jiez sin daaih mbenc nyanc hopv bun hmuangv doic, yaac paaiv gong bun ninh nyei m'sieqv bou (30:15)*. *Ninh samx mangc lings deic yaac maaiz daaih. Ninh longc ganh nyei buoz zornc daaih nyei nyaanh zoux huings zuangx a'ngunc biouv. Ninh cuotv qaqv zoux gong jienh, yaac bun ninh nyei buoz henv. Ninh hiuv duqv ninh zoux daaih nyei huox maaih jaax-zinh, ninh lungh muonz buov dang zoux gong lauh nyei. Ninh weic ganh baeng suix yaac weic ganh ndatv ndie (Cong-mengh waac 31:15-19)*.
4. Se gorngv haaix laanh m'sieqv dorn maiv ginv benx cong-mengh nyei mienh ceix ninh nyei jaa-dingh, wuov laanh se benx hngongx nyei m'sieqv dorn longc ninh ganh nyei buoz caeqv njiec ninh nyei jaa dingh. Maaih eix-leiz gorngv m'sieqv dorn haih ginv oix benx haaix nyungc mienh, haaix nyungc m'sieqv dorn. Maaih hnyouv hnavg Ziouv nyei m'sieqv dorn oix zuqc ginv cong-mengh, ginv ceix jaa dingh.

B. Maaih hnyouv hnavg Ziouv nyei m'sieqv dorn maaih hnyouv goux jaa-dingh

1. Maiv daan gorngv m'sieqv dorn maaih hnyouv hnavg Ziouv nyei mienh oix zuqc ceix jaa-dingh, mv baac ceix liuz yaac oix zuqc goux longx jaa-dingh, goux jienv jaa-dingh. Cong-mengh waac 31 zaang nyei m'sieqv dorn hnavg haaix nor goux ninh nyei jaa-dingh? *“Ninh zaangv longx ninh nyei jaa-dingh, maiv qopv jienv buoz yiem.” (Cong-mengh waac 31:27)*. Ninh longc Tin-Hungh bun ninh nyei cong-mengh.
2. Ninh zoux nyei sic bun mienh taaih ninh nyei nqox (Cong-mengh waac 31:23), Cong-mengh nyei m'sieqv zoux nyei gong zoux nyei sic yiem biau ceix ninh nyei nqox yiem zuangx camv mienh mbu'ndongx. M'jangc dorn oix maaih mengh dauh longx, maiv zeiz zoux longc mengh dauh mv baac oix maaih mengh dauh longx se oix zuqc jiex gorn yiem ganh nyei biau. Weic zuqc ninh nyei auv zoux nyei sic biux mengh gorngv ninh nyei auv taaih ninh, zuangx mienh ziouc taaih ninh. Maaih camv laanh m'jangc dorn, dorn zuangx oix zoux sic longc mengh daauh oix maaih mengh daauh, deix baav yiem zuangx mienh mbu'ndongx mienh zungv taaih ninh nyei, mv baac ganh nyei auv zungv maiv taaih ninh. Maaih deix se laaix auv, maaih deix se weic nqox, yiem biau zungv maiv hnavg ganh nyei auv mv baac cuotv wuov naah mingh zoux sic hnavg gor mienh. Yiem biau zungv maiv korh lienh ganh nyei auv

- mv baac cuotv laangz mingh zoux sic korh lienh gor mienh zoux bun ganh nyei auv mangc piex yaac maaih nyei. Weic naaiv zoux nqox nyei mienh oix zuqc hnamv ganh nyei auv, korh lienh ganh nyei auv, se gorngv meih hnavg naaiv nor zoux meih nyei auv zieqv duqv nor ninh ziouc zoux dau meih hnavg meih zoux bun ninh nor.
3. Goux jaa-dingh se maiv daan goux ga'naaiv mv baac gauh jienv jienv se goux mienh. M'sieqv dorn maaih hnyouv hnavg Ziouv maaih hnyouv goux ganh nyei jaa-dingh nyei mienh oix zuqc jiex gorn goux ganh nyei hmuangv doic ndangc. Cong-mengh nyei m'sieqv dorn goux ninh nyei fu'jueiv, *“Duih sornng nyei ziangh hoc ninh maiv nzauh ninh nyei biauv zong mienh, weic zuqc ninh nyei ziangh biauv mienh maaih lui-siouv zuqv.”* (Cong-mengh waac 31:21) Cong-mengh nyei m'sieqv hiuv duqv ganh nyei fu'jueiv, ganh nyei nqox qiex zuqc nyei. Maiv gaengh taux juangv nyei ziangh hoc ninh liuc leiz ziangx lui siouv. Mbuo oix benx cong-mengh nyei m'sieqv dorn ceix caux goux jaa dingh nyei mienh mbuo oix zuqc hiuv duqv mbuo ganh nyei hmuangv doic qiex longc nyei yiem mv baac zoux gauh camv deix ganh qiex zuqc longc nyei aengx dorh mingh maaic (31:24)
 4. Maaih hnyouv ceix maaih hnyouv goux ganh nyei jaa-dingh nyei mienh, mauv oix hnoi-hnoi ginv zoux nyungc dongh haih ceix fai biux mengh goux jaa-dingh longx nyei sic. Mangc gaax yiem mbuo nyei biauv gu'nyuoz fai ga'nyiec haaix nyungc meih haih zoux fai qiex zuqc zoux, zoux liuz ziouc haih tengx duqv meih nyei hmuangv doic. Maaih laanh baav mienh qiex zuqc yienc ninh mbuo nyei fiem fingx, nyungc zeiv gorngv ih hnoi yie oix mauv ziangh hnoi nyei mv baac maiv ngopv yietc nzunc fai ih hnoi ziangh hnoi nyei yie oix maiv qiex jiex yietc nzunce fai, ih hnoi yie oix gorngv orn yie nyei fu'jueiv, ih hnoi yie oix gorngv laengz zingh bun yie nyei nqox, lorz nyungc dongh longx nyei daaih cengx.

C. Maaih hnyouv hnavg Ziouv nyei m'sieqv dorn maaih hnyouv ceix hmuangv doic

1. Se gorngv zoux maa nyei mienh nyei nzuih gorngv cong-mengh waac. Ninh yaac longc suonc nyei hnyouv njaaux ninh nyei fu'jueiv naaiv se ceix hmuangv doic. (Cong-mengh waac 31:26). Se gorngv ninh zaangv longx ninh nyei jaa-dingh naaiv yaac ceix hmuangv doic (Cong-mengh waac 31:27) Se gorngv auv hnavg naaiv nor zoux mbuo mangc gaax fu'jueiv caux nqox hnavg haaix nor dau, *“Ninh nyei fu'jueiv jiez daaih gorngv ninh maaih fuqv, ninh nyei nqox yaac ceng ninh gorngv, “Maaih ziangh horngh nyei m'sieqv dorn camv nyei, mv baac meih gauh ziangh horngh jiex.” Mienh maaih yuoqc fei mv baac haih jaav nyei. Nzueic nyei jauv yaac haih jiex. Mv baac taaih Ziouv nyei m'sieqv dorn puis duqv ceng. Tov bun ninh duqv zingh nyeic ziux ninh nyei buoz zoux nyei gong, yaac bun ninh zoux nyei gong yiem wuov zingh gaengh duqv mienh ceng.”* (Cong-mengh waac 31:28-31) Fu'jueiv yaac ceng, nqox yaac ceng, naaiv nyungc m'sieqv dorn, naaiv nyungc auv, naaiv nyungc maa se puis duqv ceng. Maaih cong-mengh nyei nqox buac ninh auv taaih Ziouv, maaih hnyouv hnavg Ziouv maaih hnyouv ceix jaa-daing, maaih hnyouv ceix hmuangv doic oix zuqc zieqv duqv yaac oix zuqc ceng ninh auv nyei. Naaiv nyungc cengx se longx nyei ceng. Se gorngv haaix laanh m'sieqv dorn, haaix laanh auv, haaix laanh maa taaih Tin-Hungh ninh mbuo yaac taaih ganh nyei nqox, zieqv duqv benx maa nyei jaa zinh yaac maaih buangv hnyouv maengc.
2. **Maaih hnyouv hnavg Ziouv nyei m'sieqv dorn maaih hnyouv goux hmuangv doic**, Cong-mengh waac 31 zaang nyei m'sieqv dorn hnavg haaix nor eix ninh nyei

- hmuangv doic? Ninh zaangv longx ninh nyei jaa-dingh (31:27) fai mangc longx ninh nyei hmuangv doic naaiv se goux aqv. Mbuo buac hnavg jioqv maac goux ninh nyei dorn nor, cong-mengh nyei maa zanc-zanc goux ninh nyei fu'jueiv naaiv se Tin-Hungh paaiv nyei yietc nyungc gong. Mbuo hnavg haaix nor haih goux fai mangc jienv mbuo mbuo nyei hmuangv doic, goux jienv bun mbuo nyei fu'jueiv haih wange siangx, fioux ninh mbuo nzengc, goux jienv bun ninh mbuo maiv ndopc mun, ninh mbuo qiemx zuqc nyei. Maa gengh maaih gong camv haic, mv laengz zingh zoux maa nyei mienh zanc-zanc mangc longx ganh nyei hmuangv doic. Weic zuqc maiv gunv mbuo mangc ndongc haaix longx mbuo maiv haih zanc-zanc mangc taux dauh. Weic naaiv mbuo oix zuqc tov Ziouv tengx mbuo.
3. Mbuo hnavg haaix nor haih yiem Ziouv nyei nza'hmien hlo yiem sienx fim yaac benx kuv m'sieqv dorn maaih hnyouv goux jaa-dingh caux goux hmuangv doic? Mbuo haih liuc leiz mbuo nyei hnyouv mbenc mbuo nyei hnyouv hnavg cong-mengh nyei m'sieqv dorn yiem 31 wuov. Mbuo oix zuqc jiex gorn bieqc hnyouv gorngv taux zoux m'sieqv dorn nyei gong, hnavg haaix nor benx tengx nqox nyei mienh yaac hnavg haaix nor goux hmuangv doic nyei mienh. Oix zuqc zieqv duqv gorngv naaiv se maiv zeiz meih nyei die maa heuc meih zoux, maiv zeiz nqox heuc meih zoux, maiv zeiz zunh doz mienh heuc meih oix zuqc hnavg naaiv zoux mv baac dongh meih sienx nyei wuov dauh Tin-Hungh heuc. Se gorngv meih hnamv ninh yaac maaih hnyouv oix hnavg Ninh, meih oix zuqc ei jienv ninh nyei waac zoux (Yo^han 14:15 Yesu ganh gorngv, "*Se gorngv meih mbuo hnamv yie, meih mbuo ziouc ei jienv yie nyei lingc zoux.*") Mbuo oix zuqc benx cong-mengh mienh ceix mbuo nyei jaa-dingh ceix mbuo nyei hmuangv doic, maiv daaih heuc mbuo daaih benx cong-mengh m'sieqv dorn hnavg ninh heuc mbuo zoux ziangh horngh nyei auv (Cong-mengh waac 31:10). Ziangh horngh yiem Ging-sou nyei eix-leiz gorngv taux i nyungc jauv. Da'yietc gorngv taux sienx fim. Ziangh horngh nyei mienh sienx nyei zoux nyei doix-diuc. Ninh sienx nyei ninh ei jienv zoux, ninh souv wuonv yiem zien leiz, ninh nyei fiem-fingx se maiv dorngh daanh nyei mienh. Da'nyeic nyungc eix-leiz se gorngv caux zoux nyei gong, ninh longc qaqv longc buoz jienh zoux gong zoux weic haih bun ninh nyei hmuangv doic nyei maengc gauh sung. Naaiv yaac gorngv taux ninh goux longx ninh nyei buonh sin. Mbuo nyei maengc oix zuqc doix-dangc caux wange siangx yiem lingh wuonh nyei jauv fai sienx fim nyei sic oix zuqc ganh longx sienx wuonv Tin-Hungh, sin zangc oix zuqc goux jienv, maiv dan gorngv nyanc ga'naaiv dongh kungx haih tengx sin wange siangx nyei mv baac oix zuqc longc ziangh hoc hitv kuonx bun sin maaih ziangh hoc hitv. Mbuo nyei hnyouv yaac oix zuqc goux longx maiv dungx bun maaih camv nyungc daaih hoic, kuonx hnyouv bun hnyouv maaih laamh hnamv, maiv dungx bun hnyouv nzauh. Mbuo oix zuqc mbaaih horpc ziangh hoc fai longc duqv horpc ziangh hoc, maiv dungx guangc ziangh hoc. Ih jaax maaih mienh camv mangc gor TV ziouc maiv maaih ziangh hoc zoux dongh jienv nyei sic, se gorngv mbuo oix maaih hnyouv hnavg Ziouv, oix benx cong-mengh nyei m'sieqv dorn, oix benx ging-sou gorngv ziangh horngh nyei m'sieqv dorn oix zuqc jienh. Yietc nyungc mbuo haih zoux: norm norm leiz baaix se Hipv^lu sou gorngv heuc mbuo maiv dungx lueic, "*Oix zuqc gapv zunv zoux leiz-baaix, maiv dungx guangc hnavg maaih deix mienh guangc guenx nor. Daaux nzuonx laanh oix zuqc yietc zei kuinx laanh weic zuqc meih mbuo hiuv duqv Ziouv Siemv Zuiz nyei Hnoi taux fatv aqv.*" (Hipv^lu 10:25) Maiv daan

- gorngv norm-norm leiz baaix juangc jienv buoqc zangc Tin-Hungh hnavg, mv baac yiem ganh nyei maengc, hnoi-hnoi oix zuqc zorqv ziangh hoc caux Ziouv jiu-tong doqc ninh nyei caux ninh daux gaux gorngv waac. Zien-zien nor se gorngv meih oix ceix hmuangv doic oix ceix ganh nyei fu'jueiv fai nqox da'yietc oix zuqc ceix ganh. Se gorngv ganh zungv ngorc hnanx nyei mienh (nqorc Tin-Hungh nyei hnanx maiv doqc ninh nyei waac) meih fungc haih tengx ganh laanh mienh fai hmuangv doic? Oix zuqc goux ganh nyei lingh wuonh, ganh nyei maengc, ganh nyei sin, ganh nyei hnyouv bun wangc siangx liuz cingx haih tengx ganh nyei hmuangv doic.
4. Baulo mbuox hnyangx-jeiv gox nyei m'sieqv "oix zuqc njaaux auv-jaanx hnamv nqox caux fu'jueiv, haih gunv duqv ganh, maaih hnyouv cing-nzengc, zaangv longx jaa-dingh, zoux longx bun mienh yaac mbuoqc ganh nyei nqox weic maiv bun mienh maaih dorngc gorngv doqc Tin-Hungh nyei doz (Tidatc 2:3-5).

Dorh Ging-Sou Nyei Eix-Leiz Daaih Longc Yiem Maengc:

1. Maaih hnyouv hnavg Ziouv nyei m'sieqv dorn, maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv daux gaux, maaih hnyouv muangz Ziouv nyei waac, oix zuqc maaih hnyouv fu-sux Tin-Hung caux ganh nyei nqox yaac maaih hnyouv mbuoqc Tin-Hungh caux ganh nyei nqox, maaih hnyouv hnamv Tin-Hungh yaac hnamv ganh nyei nqox. Oix zuqc maaih hnyouv zieqv duqv benx maa nyei jaa zinh caux maaih maa nyei hnamv, oix zuqc maaih hnyouv goux caux ceix jaa dingh yaac goux caux ceix hmuangv doic.
2. Mbuo buac "Cong-mengh nyei m'sieqv dorn ceix jiez ninh nyei jaa-dingh, mv baac hngongx nyei m'sieqv dorn longc ninh ganh nyei buoz caeqv njiec" (Cong-mengh waac 14:1) mbuo yaac buac cong-mengh nyei m'sieqv dorn hnavg haaix nor ceix ninh nyei jaa-dingh, hnavg haaix nor ceix ninh nyei hmuangv doic yiem Cong-mengh waac 31:10-31. Mbuo ganh naaic gaax ganh, dongh naaiv deix i nyungc mienh, yie se dongh nyungc mienh? Yie hnavg haaix nor longc yie nyei ziangh hoc, yie ceix haaix nyungc?
3. Tin-Hungh ganh liepc hmuangv doic. Se gorngv meih maaih hnyouv gan ninh maaih hnyouv hnavg ninh ei ninh nyei za'eix, hoqc ninh nyei waac liuz dorh ging-sou nyei eix-leiz daaih longc yiem meih nyei maengc, ninh ziouc haih tengx meih ceix meih nyei hmuangv doic ceix meih nyei jaa-dingh nyei.
4. Mbuo lomh nzoih juangc jienv daux gaux yaac tov Ziouv koi nqoi mbuo hnyouv gaengh bun mbuo bieqc hnyouv taux mbuo nyei gong se ndongc haaix jienv, tov Ziouv bun mbuo nyei biauv zong hnavg Ziouv zeix daaih nyei mouz deic nor. Zoux m'sieqv dorn, zoux auv, zoux maa nyei mienh aac, meih mbuo hiuv duqv gorngv nyungc-nyungc meih zoux nyei gengh jienv bun meih nyei hmuangv doic yaac maaih jaa zinh nyei fai? Tov Ziouv orn meih mbuo nyei hnyouv bun meih mbuo hiuv gorngv meih mbuo zoux nyei nyungc-nyungc gengh tengx duqv yaac ceix meih mbuo nyei jaa-dingh caux hmuangv doic. Bun ga'nyiec nyei mienh buac meih mbuo nyei hmuangv doic haih zieqv duqv Tin-Hungh nyei en weic meih mbuo zaangv longx meih mbuo nyei jaa-dingh, bun meih nyei nqox haih zieqv meih zoux nyei gong haih taaih meih, bun meih nyei fu'jueiv haih zieqv duqv meih nyei en zingh weic meih za'gengh goux longx ninh mbuo. Tov Tin-Hungh bun mbuo haih benx ziangh hornh nyei m'sieqv dorn hnavg wuov laanh m'sieqv dorn yiem Cong-mengh waac 31.

**Da'Ziepc Zaang: M'sieqv Dorn Maaih Hnyouv Hnangv Ziouv Oix Zuqc
Maaih Hnyouv Jorm Taux Tin-Hungh Nyei Gong**

Doqc Nyei Ging-Sou: 2 Bide 3:18 “Oix zuqc yietc ze ihiuv duqv mbuo nyei Njoux Ziouv Yesu Giduc caux ninh nyei en ceix camv jienv faaux. Mbuo ih zanc oix zuqc ceng ninh yaac yietc liuz ceng taux maanc gouv maanc doic. Aamen”

1 Ko^lin^to 15:58 “Yie hnamv nyei gorx-youz aac, weic naaiv meih mbuo oix zuqc sienx wuonv, maiv dungx tuix. Oix zuqc zanc-zanc cuotv qaqv **zoux Ziouv nyei gong**, weic zuqc meih mbuo hiuv duqv meih mbuo weic Ziouv zoux gong, maiv maaih yietc nyungc maiv lamh longc.”

E^fe^so 4:12 “Ninh hnangv naaiv nor zoux weic liuc leiz ziangx Tin-Hungh nyei mienh zoux Giduc nyei gong weic ceix jiezc Giduc nyei sin”

Gorngv Jiex Gorn Nyei Waac:

Mbuo haih jorm hnyouv taux Ziouv Tin-Hungh nyei gong weic mbuo nyei lingh wuonh hlo benx domh mienh. Baulo gorngv “Yie zoux fu'jueiv nyei ziangh hoc, yie gorngv waac hnangv fu'jueiv, hnyouv yaac hnangv fu'jueiv, daav za'eix yaac hnangv fu'jueiv nyei za'eix nor. Mv baac yie benx domh mienh yie ziouc guangc, maiv zoux fu'jueiv nyei sic.” (1 Ko^lin^to 13:11). Mbuo siang sienx Yesu Giduc nyei ziangh hoc, mbuo hnamv mangc gaax Tin-Hungh haih tengx haaix nyungc yie, naaiv se lingh wuonh hnangv fu'jueiv nor kungx hnamv taux ganh nyei nza'hmien buonc oix duqv naaiv oix duqv wuov hnangv. Sienx lauh deix lingh wuonh hlo jienv mingh hnangv fu'jueiv hlo jienv mingh ziouc jiezc gorn hnamv mangc gaax yie hnangv haaix nor haih jorm hnyouv zoux Ziouv nyei gong. Weic zuqc mbuo zieqv duqv Ninh nyei en zingh hlo haic mbuo hnangv haaix nor haih winh bun ninh? Maiv haih mv baac yietc nyungc mbuo laanh laanh mienh haih zoux se fu-sux Ninh. Mbuo buatec cong-mengh nyei m'sieqv dorn yiem Cong-mengh waac 31:30 wuov laanh m'sieqv dorn taaih Tin-Hungh. Maa gengh maaih ziez nyungc zuqc zoux maiv gunv zuqc goux hmuangv doic ceix hmuangv doic liuc leiz ziez nyungc mv baac jienv nyei yietc nyungc se oix zuqc maaih hnyouv jorm taux Tin-Hungh nyei gong weic zuqc maaih hnyouv hnangv Ziouv nyei m'sieqv dorn oix zuqc maaih hnyouv jorm taux Ziouv nyei gong. Mbuo hnangv haaix nor jorm hnyouv taux Ziouv nyei gong? Mbuo jiezc gorn maaih hnyouv hnangv Ziouv maaih hnyouv hnamv Ziouv mbuo jiezc gorn ziouc jorm dongh ninh a'hneiv nyei, mbuo ziouc mauv dongh ninh mauv nyei. Hnangv Bide gorngv yiem 3:9 “Ziouv za'gengh ei ninh laengz nyei waac zoux, ninh maiv ngaih hnangv maaih deix mienh hnamv daaih ninh ngaih nor. Daaux nzuonx ninh zoux hnyouv ndaav zuov meih mbuo, maiv oix haaix dauh zuqc mietc. Ninh oix dauh dauh goiv hnyouv guangc zuiz.” Tin-Hungh nyei mauv se oix mienh dauh dauh goiv hyouv guangc zuiz, weic naaiv mbuo nyei gong se mingh mbuox mienh taux ninh nyei hnamv caux mauv. Mbuo haih jorm hnyouv taux ninh nyei gong se gorngv mbuo.

Porv Mengh Ging-Sou:

A. Maaih Hnyouv Jorm Taux Tin-Hungh Nyei Gong oix Zuqc Maaih Hnyouv Hoqc Ziouv Nyei Waac

1. Mbuo nyei maengc se maaih i diuc ginv gorngv mbuo oix hnangv haaix nor ziangh. Mbuo oix ziangh weic Yesu Giduc fai mbuo oix ziangh weic ganh. Ging-Sou gorngv

- “Tin-Hungh zoux zorn-g-zengx se dongh naaiv. Tin-Hungh bun mbuo duqv yietc liuz nyei maengc. Naaiv nyungc maengc se yiem ninh nyei Dorn daaih. Haaix dauh maaih Tin-Hungh nyei Dorn, wuov dauh ziouc maaih ziangh maengc. Haaix dauh maiv maaih Tin-Hungh nyei Dorn, wuov dauh maiv maaih ziangh maengc aqvhaaix dauh maaih”* (1 Yo^han 5:11-12) Ging-sou se gorngv maiv maaih Yesu zoux Ziouv yiem maengc nor, maengc gengh maiv maaih eix-leiz fai maiv maaih maengc. Mbuo maaih maengc yiem Yesu weic mbuo sienx kaux ninh. Mbuo ziev duqv gorngv mbuo zoux zuiz mienh, mbuo qiemx zuqc Njoux Ziouv. Yesu zoux mbuo nyei njoux Ziouv ei Lomaa 10:9-10 gorngv, *“Se gorngv meih nyei nzuih nyiemc, “Yesu zoux Ziouv,” meih yaac longc hnyouv sienx Yesu daic mingh, Tin-Hungh aengx bun ninh nangh daaih, meih ziouc duqv njoux aqv. Weic zuqc mbuo longc hnyouv sienx ziouc duqv caux Tin-Hungh horpc. Mbuo longc nzuih nyiemc Yesu zoux Ziouv, mbuo ziouc duqv njoux aqv”*
2. Maaih hnyouv jorm taux Ziouv nyei gong nyei mienh oix hoqc Ziouv nyei waac weic zuqc se gorngv *“Yie zorqv meih nyei waac zaangh jienv yie nyei hnyouv, weic bun yie maiv baamz zuiz dorngc meih.”* (Singx Nzung 119:11). Se gorngv mbuo maaih hnyouv hoqc yaac ei ziouc bun mbuo haih simv nqoi zuiz nyei jauv. Mbuo maiv haih sienx dongh mbuo maiv hiuv nyei weic naaiv sienx Tin-Hungh nyei mienh oix zuqc hoqc taux Tin-Hungh nyei fiem fingx, ninh biux mengh Ninh nyei fiem fingx yiem Ging-sou. Hoqc Ging-sou nyei waac bun mbuo haih hiuv duqv Ziouv nyei za'eix bun mbuo, hngv haaix nor zoux cingx horpc ninh nyei hnyouv. Maiv dan oix zuqc maaih hnyouv hoqc hngv mv baac oix zuqc a'hneiv Ziouv nyei waac *“Yie a'hneiv meih nyei leiz-nyeic, yie maiv haih la'kuqv meih nyei waac.”* (Singx Nzung 119:16)
 3. Weic haaix nyungc mbuo qiemx zuqc hoqc Tin-Hungh nyei waac? Weic zuqc Ziouv nyei waac haih tengx mbuo henv jiex daaih (Singx Nzung 119:28), weic zuqc Ziouv *“laengz nyei waac bun yie maaih maengc ziangh, yie zuqc naanc zingh nyei ziangh hoc ziouc orn yie nyei hnyouv”* (Singx Nzung 119:50), weic zuqc kaux Ziouv nyei waac maaih lamh hnamv dorngx (Singx Nzung 119:74), weic zuqc Ziouv nyei waac *“yiem lungh gu'nguaaic liepc wuonv taux yietc liuz* (Singx Nzung 119:89), Weic zuqc Ziouv nyei *“waac se hngv dang ziux yie nyei zaux-mbiec, yaac zoux yie jauv zaangc nyei njang”* (Singx Nzung 119:105), weic zuqc Ziouv nyei waac baav jienv mbuo bun mbuo duqv ziangh jienv (Singx Nzung 119:116), weic zuqc ei Ziouv nyei waac tengx mbuo biaux ndutv zeix mbuo wuov deix mienh (Singx Nzung 119:134), weic zuqc Ziouv hngv fiev Singx nzung mienh gorngv nor, Ziouv *“laengz nyei waac seix liuz, hiuv duqv kaux duqv wuonv nyei, yie, meih nyei bou, yaac hnamv haic.”* (Singx Nzung 119:140), weic zuqc Ziouv *“nyei waac nzutv zunv gorngv se zien leiz, meih nyei yietc zungv gong-fim nyei leiz yietc liuz yiem”* (Singx Nzung 119:160). Mbuo qiemx zuqc hoqc Tin-Hungh nyei waac weic zuqc ninh nyei waac se zien leiz. Yesu ganh gorngv, *“Tov Die longc meih nyei zien leiz bun ninh mbuo cing-nzengc daaih. Meih nyei waac se zien leiz”* (Yo^han 17:17), Mbuo qiemx zuqc hoqc weic Ziouv nyei waac heuc mbuo hoqc. *“Oix zuqc zaangh Giduc nyei doz buangv meih mbuo nyei hnyouv ziouc longc nyungc-nyungc cong-mengh laanh njaaux laanh, laanh kuinx laanh. Yaac oix zuqc baaux singx nzung, caux ceng Tin-Hungh nyei nzung, caux Singx Lingh bun mienh benx cuotv nyei nzung, longc hnyouv laengz zingh Tin-Hungh.”* (Ko^lo^{si} 3:16).

4. Yesu ganh gorngv, *“Se gorngv meih mbuo zanc-zanc ei jienv yie njaaux nyei waac zoux, meih mbuo za'gengh zoux yie nyei sai-gorx. Meih mbuo ziouc hiuv duqv zien leiz. Zien leiz yaac oix bungx nqoi meih mbuo.”* (Yo[^]han 8:31-32). Benx Yesu nyei sai-gorx fai sienx Yesu nyei mienh oix zuqc hoqc Ging-sou weic zuqc Ging-sou se Ziouv nyei waac, Se gorngv mbuo ei jienv Ziouv nyei waac zoux mbuo ziouc duqv bungz nqoi yiem zuiz duqv bieqc daaih buoqc zangc Tin-Hungh longx zien leiz (Yo[^]han 4:24).
5. Heuc sienx Yesu mienh oix zuqc hoqc Ging-sou fai Ziouv nyei waac se hnavg heuc gu'nquaaz hopv nyorx nor. Zien nor zungv maiv zuqc heuc ninh mbuo ganh zungv oix hopv. Bide gorngv, *“Meih mbuo oix zuqc hnavg coqv hoqc cuotv seix nyei gu'nguaaz oix hopv nyorx nor, zanc-zanc oix hopv yungz lingh wuonh nyei cing-nzengc nyorx. Meih mbuo ziouc haih hlo daaih duqv njoux”* (1 Bide 2:2). Mbuo maiv buatc biao hnyangx fai ziepc hnyangx nyei fu'jueiv hopv nyorx mv baac maaih deix sienx daaih lauh aqv corc hnavg gu'nguaaz nor corc hopv jienv nyorx. Se gorngv sienx daaih lauh aqv mv baac maiv kangv hoqc Ziouv nyei waac kungx oix bun mienh dorh hnaangx daaih uix se hnavg gu'nguaaz nor ganh maiv oix nyanc maiv oix hoqc. Hipv[^]lu gorngv naaiv nyungc mienh se, *“Haaix dauh oix zuqc hopv nyorx, wuov dauh corc zoux gu'nguaaz, maiv mengh baeqc zoux horpc nyei jauv.”* (Hipv[^]lu 5:13). Ninh mbuo sienx daaih lauh horpc zuqc hoqc duqv camv aqv mv baac maiv kangv hoqc, *“Taux ih zanc meih mbuo zungv horpc zuqc zoux fin-saeng, mv baac meih mbuo corc qiemx zuqc mienh aengx njaaux da'yietv kang Tin-Hungh nyei doz. Meih mbuo corc qiemx zuqc hopv nyorx nyei, maiv haih nyanc hnaangx.”* (Hipv[^]lu 5:12).

B. Maaih Hnyouv Jorm Taux Tin-Hungh Nyei Gong nyei mienh oix Maaih Hnyouv Hnamv Ziouv Nyei Waac

1. Maaih hnyouv hnamv Ziouv nyei mienh oix zuqc maaih hnyouv hnamv Ziouv nyei waac. Mbuo maiv haih hnamv Ziouv se gorngv mbuo maiv muangx fai maiv a'hneiv ninh nyei waac. Yesu ganh gorngv, *““Haaix dauh hnamv yie ziouc ei jienv yie njaaux nyei waac zoux. Yie nyei Die ziouc hnamv ninh. Yie caux yie nyei Die yaac oix daaih lorz ninh, caux ninh yiem”* (Yo[^]han 14:23) Yo[^]han gorngv, *“Haaix dauh ei jienv Tin-Hungh nyei waac zoux, wuov dauh za'gengh hnamv Tin-Hungh taux daauh aqv. Hnavg naaic, mbuo ziouc hiuv duqv mbuo caux Tin-Hungh juangc maengc ziangh.”* Mbuo hnavg haaix nor hiuv dinc gorngv mbuo gengh sienx Yesu nyei mienh? Mangc mbuo zoux nyei sic, mangc gaax mbuo ei fai maiv ei Tin-Hungh nyei waac. Mbuo fungc haih gorngv mbuo sienx mv baac maiv ei, hnavg Yaagorpc gorngv nor *“Maiv dungx nduov ganh laaic haiz liuz doz ziouc gauv aqv. Daaux nzuonx oix zuqc ei jienv zoux* (Yaagorpc 1:22) *Mienh hngongx mienh aah! Kungx sienx hnavg, maiv ei jienv zoux se maiv lamh longc* (Yaagorpc 2:20).
2. Maaih yietc laanh fiev Singx Nzung sou 119 zaang nyei mienh gengh maaih hnyouv hnamv Ziouv nyei waac. Mangc gaax ninh ndongc haaix hnamv. *“O yie za'gengh hnamv meih nyei leiz-latc, yie ziangh hnoi maiv dingh liouh nyei fei-fangv.”* (Singx Nzung 119:97), *“Maaih i diuc hnyouv nyei mienh yie nzornng haic, mv baac yie hnamv meih nyei leiz-latc”* (Singx Nzung 119:113) *“Meih zorqv lungv ndiev nyei orqv mienh funx hnavg hlieqv-nqaiiv nor, weic naaiv yie hnamv meih njaaux nyei waac.”* (Singx Nzung 119:119), *“Yie za'gengh hnamv meih nyei lingc gauv camv jiem, zungv gauv*

camv zien jiem” (Singx Nzung 119:127) “*Samx mangc gaax yie ndongc haaix hnamv meih hatc nyei waac. Tov ziux meih ziepc zuoqv nyei hnamv mienh beu yie nyei maengc.*” (Singx Nzung 119:159) “*Hnamv meih nyei leiz nyei mienh duqv baengh orn camv, yaac maiv maaih haaix nyungc haih bun ninh mbuo ndiqv zuqc ndorpc*” (Singx Nzung 119:165) “*Yie nyei hnyouv ei jienv meih nyei waac. Yie za'gengh! hnamv haic meih nyei waac*” (Singx Nzung 119:167). Oix maaih hnyouv hnavg Ziouv nyei m'sieqv dorn oix zuqc maaih hnyouv hnavg fiev Singx nzung sou 119 zaang wuov laanh mienh nor hnamv Ziouv nyei waac gauh hnamv jiex nyungc-nyungc.

3. Se gorngv mbuo oix maaih hnyouv hnavg Ziouv oix maaih hnyouv zoux horpc Ziouv nyei nyei hnyouv mbuo oix zuqc zuotc mbuo nyei Ziouv Yesu Giduc. Yiem Lugaa 2:52 gorngv, “*Yesu gunv hlo gunv maaih cong-mengh. Tin-Hungh a'hneiv haic ninh. Mienh yaac fih hnavg nyei a'hneiv haic ninh*” Maaih hnyouv oix hnavg Ziouv fai maaih hnyouv oix hlo yiem Ziouv gengh jienv haic bun mbuo Giduc mienh. Hnamv mangc gaax naaiv yiemc cong-mengh waac “*Haih mengh baeqc nyei mienh longc hnyouv lorz wuonh zaang, mv baac mienh hngongx mienh longc hngongx nyei jauv dorngx nyanc hopv*” (Cong-mengh waac 15:14). Gorngv zaqc nyei se maaih eix-leiz gorngv guai fai maaih cong-mengh nyei mienh baac baac lorc wuonh zaang. Se gorngv mbuo oix benx kuv m'sieqv dorn, kuv auv, kuv maa mbuo gengh oix zuqc baac baac lorz Tin-Hungh, tov ninh bun mbuo haih maaih wuonh zaang haih benx kuv m'sieqv dorn ei ninh zeix mbuo oix mbuo benx nyei m'sieqv dorn. Yesu hlo yiem cong-mengh, mbuo hlo yiem cong-mengh nyei jauv nyei fai? Mbuo maaih hnyouv hoqc Ziouv nyei waac nyei fai? Hoqc taux lungh ndiev nyei jauv nyei fai? Fai mienh hoqc mbuo maiv guen maiv goux nyei yiem fai? Yesu zoux sic bun Zangc Diex a'hneiv, Meih mbuo niv? Meih zoux nyei sic Tin dorng Diex a'hneiv nyei fai? Meih maaih hnyouv oix bun meih nyei Ziouv a'hneiv nyei fai? Yesu caux mienh horpc mienh a'hneiv. Mbuo buatc yiem Yesu nyei ziangh hoc, zoux horpc nyei mienh a'hneiv Yesu, mv baac zoux waaic nyei mienh nzorng Yesu weic zuqc Yesu biux mengh ninh mbuo zoux nyei zuiz. Ih zanc yaac fih hnavg nyei, meih a'hneiv gan longx Tin-Hungh nyei mienh nyei fai? Fai meih a'hneiv zoux waaic nyei mienh? Meih ganh hnavg haaix nor dau? Meih ganh hiuv duqv meih ganh nyei. Tov Ziouv bun mbuo laanh laanh m'sieqv dorn maaih hnyouv hnavg Ninh.

C. Maaih Hnyouv Njaaux Ziouv Nyei Waac

1. Yesu paaiv mbuo laanh laanh mienh “*Weic naaiv, meih mbuo oix zuqc mingh njaaux maanc fingx mienh zoux yie nyei sai-gorx.*” (Matv[^]tai 28:19) Maaih mienh oix gorngv yiem maiv haih njaaux lorqc? Yesu gorngv, “*Tengx Mienh Wuov Dauh, dongh Zaangc Diex oix dengv yie nyei mbuox paaiv daaih nyei Singx Lingh, oix njaaux nyungc-nyungc meih mbuo, yaac oix bun meih mbuo haih jangx duqv yie mbuox jiex nyei yietc zungv (Yo[^]han 14:26).* Weic mbuo sienx yaac ei Yesu paaiv nyei waac zoux, Singx Lingh oix tengx mbuo bun mbuo maaih qaqv yaac maaih banh zeic haih ei ninh nyei za'eix zoux.
2. Se gorngv mbuo maaih hnyouv hnavg Ziouv, maaih hnyouv hoqc Ninh nyei waac yaac hnamv Ninh nyei waac mbuo ziouc maaih hnyouv njaaux ninh nyei waac. Mbuo maiv zeiz gorngv zoux fin-saeng njaaux zuangx mienh mv baac laanh laanh m'sieqv dorn haih njaaux ganh nyei fu'jueiv, caux mbuo nyei doic dongh mbuo duqv

hoqc jiex daaih nyei, mbuo yaac ei jienv zoux nyei. Tin-Hungh nyei mauv se yietc doic njaaux jiec yietc doic. Tin-Hungh mbuox ninh nyei mienh I^{saa}^^{laa}^^{en} mbuo oix zuqc njaaux ninh jiu bun nyei leiz doic jiec doic “*Yie ih hnoi jiu bun meih mbuo naaiv deix leiz oix zuqc longc hnyouv jangx jienv. Oix zuqc jienh njaaux meih mbuo nyei fu'jueiv hiuv duqv naaiv deix leiz. Maiv gunv yiem biauvi fai yiem jauv zaangc, bueix njiec fai jiez sin, zungv oix zuqc buih jienv yiem. Oix zuqc zorqv naaiv deix leiz kou jienv meih mbuo nyei buoz yaac nyatv jienv meih mbuo nyei biorng h zoux jangx-hoc. Yaac oix zuqc fiev jienv meih mbuo nyei biauvi nyei gaeng h zouc caux meih mbuo nyei laatc gaeng* (Nzame Leiz Latc 6:7-9)

3. Baulo heuc gox nyei m'sieqv dorn dongh gan longx Tin-Hungh nyei m'sieqv dorn njaaux auv-jaanx “*Fih hhangv nyei, oix zuqc njaaux hnyangx-jeiv gox nyei m'sieqv dorn zoux sic puix sienx Tin-Hungh nyei mienh, maiv dungx gorngv waac-huv, maiv dungx hengx hopv diuv. Ninh mbuo kungx oix zuqc njaaux longx nyei sic hhangv. Hhangv naaic, ninh mbuo haih njaaux auv-jaanx hnamv nqox caux fu'jueiv.*” (Tidatc 2:3-4). Mbuo benx m'sieqv dorn maaih hnyouv hhangv Ziouv nyei mienh maiv gunv mbuo gox fai lunx se gorngv mbuo yiem puix Tin-Hungh nyei mienh mbuo maaih qiangx camv nyei njaaux. M'sieqv dorn haih njaaux fu'jueiv lunx, maa haih njaaux ganh nyei fu'jueiv, gox nyei haih njaaux lunx nyei m'sieqv dorn. Lunx nyei mienh oix zuqc haih nyiemc ganh zoux faix mbuoqc gox nyei njaaux, gox nyei oix zuqc zoux kuv nyungc zeiv. Hhangv Yesu gorngv nor, “*Meih weic haaix diuc buatc meih nyei gorx-youz nyei m'zing maaih la'fapv yaac maiv hnamv taux meih ganh nyei m'zing maaih nqanx ndiangx? Ganh nyei m'zing maaih nqanx ndiangx, meih fungc haih mbuox meih nyei gorx-youz, 'Gorx aac, yie tengx gorx ban cuotv m'zing nyei la'fapv oc.* (Matv^{^tai} 7:3-4) Meih ganh maiv ei meih maiv haih njaaux fai heuc mienh ei.
4. Se gorngv gong-zoh mbuo maiv njaaux mienh nor mbuo zungv maiv hiuv, weic ninh mbuo duqv zipv nyei ninh mbuo ziepc zuoqv nyei njaaux. Yiem Gong-zoh sou 5:17-42 doqc liuz nor mbuo buatc Gong-zoh mbuo gamh nziex Tin-Hungh maiv gun Yiutai mienh zoux doqc ninh mbuo hatc heuc ninh mbuo maiv dungx njaaux Yesu nyei jauv mv baac ninh mbuo njaaux jienv mingh weic zuqc ninh mbuo muangx Ziouv nyei waac heuc ninh mbuo zuh kuv fieng taux Yesu Giduc daic yaac panh nangh daaih nyei kuv fieng mbuox zuangx mienh. Mbuo ih hnoi duqv hiuv duqv hoqc nyei mbuo oix zuqc njaaux ganh dauh bun ninh mbuo haih benx Yesu nyei sai-gorx.

Dorh Ging-Sou Nyei Eix-Leiz Daaih Longc Yiem Maengc:

1. Weic mbuo sienx kaux Yesu Giduc, duqv Singx Lingh nyei qaqv tengx mbuo bun mbuo maaih hnyouv hnamv ninh yaac maaih hnyouv jorm taux dongh ninh paav mbuo zoux nyei gong. Mbuo laanh laanh mienh oix zuqc naaic gaax ganh: Tin-Hungh zeix yie yiem naaiv baamh gen weic haaix nyungc? Ninh oix meih maaih hnyouv hhangv Ninh, maaih hnyouv ziepc zuoqv bun Ziouv, maaih hnyouv bangc Ziouv nyei waac, maaih hnyouv daux gaux, maaih hnyouv muangz Ziouv nyei waac, oix zuqc maaih hnyouv fu-sux Tin-Hung caux ganh nyei nqox yaac maaih hnyouv mbuoqc Tin-Hungh caux ganh nyei nqox, maaih hnyouv hnamv Tin-Hungh yaac hnamv ganh nyei nqox. Oix zuqc maaih hnyouv zieqv duqv benx maa nyei jaa zinh caux maaih maa nyei hnamv, oix zuqc maaih hnyouv goux caux ceix jaa dingh yaac

- goux caux ceix hmuangv doic yaac maaih hnyouv jorm taux ninh paaiv meih zoux nyei gong, meih oix zuqc zoux taux daauh.
2. Maaih hnyouv oix hnavg Ziouv oix zuqc longc ziangh hoc, longc ziangh hoc hoqc Ziouv nyei waac, hnamv Ziouv nyei waac, yaac njaux Ziouv nyei waac. Gorngv taux kauv hoqc nyei mienh, yiem naaiv lung h ndiev maaih biei nzangh mienh. Da'yietv nzangh mienh ninh mbuo maiv hiuv, yaac maiv hiuv duqv ninh mbuo maiv hiuv yaac maiv oix hoqc hiuv. Da'nyeic nzangh mienh, ninh mbuo maiv hiuv, yaac hiuv duqv ninh mbuo maiv hiuv, ziouc oix hoqc hiuv. Da'faam nzangh mienh, hiuv duqv nyei, mv baac maiv hiuv camv, yaac oix jaa hoqc hiuv. Da'feix nzangh mienh hiuv duqv camv nyei yaac maaih hnyouv jaa oix hoqc camv jienv mingh yaac ei jienv hoqc nyei zoux. Mangc gaax mbuo se dongh haaix nzangh mienh. Mbuo nyei mauv se oix benx da'feix wuov nzangh mienh. Da'yietv nzangh mienh gengh maiv lamh kaux dorngx aqv, naaiv nyungc mienh maiv dan maiv oix hoqc hnavg, mienh yaac njaaux maiv duqv haaix nyungc ninh.
 3. Meih maiv haih bun dongh meih ganh maiv maaih nyei, meih maiv haih njaaux dongh meih ganh maiv hiuv nyei. Se gorngv meih maaih hnyouv hnavg Ziouv, maaih hnyouv hoqc liuz, ei jienv zoux, buatc ei jienv zoux nyei fuqv gengh longx haih, meih ziouc haih zoux zingh ginx fai njaaux taux ganh laanh mienh taux dongh meih duqv hoqc nyei weic meih duqv seix jiex mueiz mi' aqv.
 4. Se gorngv meih doqc taux naaiv norm dorngx aqv, maaih eix-leiz gorngv meih gengh maaih hnyouv oix hnavg Ziouv nyei, meih yaac zieqv duqv Ziouv nyei fuqv gengh liouc njeic bun meih camv haic. Se gorngv meih sauv ninh nyei en zingh nor gengh camv nyei. Meih oix zuqc zaah mangc gaax dongh Ziouv bun meih nyei maengc zengc njiec wuov deix meih oix hnavg haaix nor longc weic ninh. Meih hnamv mangc gaax meih nyei maengc hnavg haaix nor njaaux mienh, meih nyei nzuih hnavg haaix nor njaaux mienh. Meih nyei maengc, meih zoux nyei sic se benx yietc nyungc njaux nyei biux mengh gorngv meih hnavg haaix nor hnamv Tin-Hungh nyei waac, hnavg haaix nor hoqc. Meih gengh duqv hoqc longx nyei ih zanc hoqc nyei oix zuqc ei jienv zoux weic maiv bun mienh haih danh Ziouv nyei mbuox. Maiv gunv mbuo zoux ndongc haaix longx yaac maaih mienh gorngv daanh nyei. Mv baac mbuo nyei maengc oix zuqc zoux puix Tin-Hungh nyei waac bun maiv sienx nyei mienh gorngv yie maiv sienx ninh mbuo nyei Tin-Hungh mv baac naaic laanh m'sieqv dorn gengh ben kuv m'sieqv dorn, kuv auv, kuv maa nyei mienh.
 5. Maaih hnyouv hnavg Ziouv nyei m'sieqv dorn, maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv dauv gaux, maaih hnyouv muangz Ziouv nyei waac, oix zuqc maaih hnyouv fu-sux Tin-Hungh caux ganh nyei nqox yaac maaih hnyouv mbuoqc Tin-Hungh caux ganh nyei nqox, maaih hnyouv hnamv Tin-Hungh yaac hnamv ganh nyei nqox. Oix zuqc maaih hnyouv zieqv duqv benx maa nyei jaa zinh caux maaih maa nyei hnamv, oix zuqc maaih hnyouv goux caux ceix jaa dingh goux caux ceix hmuangv doic, yaac jorm hnyouv taux Ziouv nyei gong.

**Ziepc Yietv Zaang: M'sieqv Dorn Maaih Hnyouv Hnangv fai hnamv Ziouv
Oix Zuqc Maaih Hnyouv Cau-Fim Taux Mienh**

Doqc Nyei Ging-Sou: 2 Ko[^]lin[^]to 1:3-4 “*Mbuo oix zuqc ceng mbuo nyei Ziouv Yesu Giduc nyei Die, Tin-Hungh, dongh korv-lienh mienh nyei Zaangc Diex, yaac zanc-zanc orn mbuo nyei hnyouv nyei Tin-Hungh. Mbuo maaih nyungc-nyungc kuonx naanh, ninh orn mbuo nyei hnyouv, weic bun mbuo aengx haih orn buangh zuqc haaix nyungc kuonx naanh nyei mienh nyei hnyouv. Tin-Hungh hnangv haaix nor orn mbuo nyei hnyouv, mbuo yaac hnangv wuov nor haih orn mienh nyei hnyouv.*”

Gorngv Jiex Gorn Nyei Waac:

Mbuo laanh laanh Giduc nyei mienh oix zuqc gauh jaa tipv maaih hnyouv cau-fim taux, liuc leiz taux mienh. Mbuo laanh laanh Giduc mienh maiv dan qiemx zuqc mienh orn mbuo nyei hnyouv hnangv mbuo yaac oix zuqc orn mienh nyei hnyouv. Se gorngv meih mbuo maaih hnyov hnangv Ziouv meih mbuo nyei maengc se benx yiem kuaav fangx yietc norm nyungc zeiv dongh biux mengh gorngv meih cau-fim taux mienh weic meih maaih hnyouv orn mienh nyei hnyouv hnangv meih duqv Tin-Hungh fai ganh laanh mienh orn jiex meih nyei hnyouv. Tin-Hungh bun yietc kuaav fangx fai yietc norm nyungc zeiv mbuo zuotc taux hnangv haaix nor benx ziangh horngv fai cong-mengh nyei m'sieqv dorn yiem Cong-mengh waac 31:11-31 wuov.

Porv Mengh Ging-Sou:

A. Maaih hnyouv hnangv Ziouv nyei m'sieqv dorn maaih hnyouv cau-fim taux mienh

1. M'sieqv dorn maaih hnyouv hnangv Ziouv maaih hnyouv hnamv Ziouv nyei mienh oix zuqc maaih hnyouv cau-fim taux ganh dauh mienh. Weic haaix nyungc mbuo oix zuqc cau-fim taux mienh? Weic zuqc Yesu cau-fim taux mbuo. Hnangv 1 Bide 5:7 gorngv nor, “*Oix zuqc zorqv yietc zungv you-nzauh guangc bun ninh weic zuqc ninh goux jienv meih mbuo.*” Mbuo haih dorh mbuo nyei yietc zungv youh nzauh mingh mbuox Yesu weic zuqc ninh cau-fim taux mbuo buangh zuqc nyei sic.
2. Mbuo oix zuqc hoqc cau-fim taux mienh jomc mienh, naaiv nyungc gengh jienv zoux gong nyei mv baac maiv maaih gauh nyanc nyei mienh. Maaih mienh camv gorngv yie mbuo gengh jomc gor, mv baac zien nor ninh mbuo ganh maiv zieqv duqv Tin-Hungh nyei fuqv hnangv. Mv baac mbuo horpc zuqc samx mangc gaax haaix laanh mienh gengh zien jomc yaac horpc zuqc cau-fim taux ninh mbuo. Cong-mengh waac gorngv “*Kuv mienh hiuv duqv mienh jomc mienh horpc zuqc duqv nyei leiz, mv baac orqv mienh maiv bieqc hnyouv naaiv nyungc jauv.* (Cong-mengh waac 29:7). Cong-mengh nyei m'sieqv dorn yiem Cong-mengh waac 31:20 gorngv, “*Ninh cuotv fim nzie mienh jomc mienh, yaac sung buoz tengx dangx-donx mienh*” Yiem ih gitv lungv ndiev gengh maaih mienh camv zoux zoux gong jienh nyei mv baac ngorc hnaangx, se gorngv meih maaih qiangx yaac haih nor tengx ninh mbuo, Yesu ganh gorngv, “*Yie mbuox zien meih mbuo, haaix dauh bun zaanv wuom meih mbuo hopv weic zuqc meih mbuo guei Giduc, wuov dauh nyei zingh nyeic maiv haih ndortv.*” (Maako 9:41). Mbuo hiuv wuom se maiv jaix, mv baac bun nyei zingh nyeic Tin-Hungh zungv maiv la'kuqv wuov nyungc dongh meih cuotv fim caux cau-fim tengx mienh nyei maiv haih ndortv.

3. Maaih hnyouv cau-fim nyei m'sieqv oix zuqc hoqc benx hnyouv jangv nyei mienh, benx maiv njapv nyei mienh, maiv gatc nyei mienh. Meih jangx duqv nyei fai yiem meih nyei maengc maaih norm ziangh hoc dongh maaih laanh mienh zoux hnyouv longx cau-fim taux meih, ninh zoux nyei en zingh mbuo zungv maiv haih la'kuqv. Cong-mengh waac 3:27-28 gorngv, "*Meih maaih banh zeic tengx mienh nyei ziangh hoc, maiv dungx ngaengc zoux longx nyei sic bun qiemx zuqc tengx nyei mienh. Se gorngv meih ih zanc maaih jienv gaux tengx mienh nyei, maiv dungx gorngv mbuox juangc laangz mienh, "Mingh aqv, aengx daaih nzunc. Njang hnoi yie m'daaih bun meih."* Maaih camv nyungc meih mbuo haih zoux longx nyei sic tengx mienh. Meih mbuo haih longc buoz tengx (gong, zoux lai-hnaangx, lunh ga'naaiv, maaih camv nyungc zeiv nyei), longc nzuih tengx gorngv waac orn fai kuinx mienh fai gorngv laengz zingh mienh.
4. Maaih hnyouv cau-fim nyei m'sieqv dorn oix zuqc maaih m'zingh buatac dongh mienh qiemx zuqc nyei. Hnangv Cong-mengh waac 22:9 gorngv nor, "*Haaix dauh mangc maiv jiex mueic, zoux hnyouv jangv, ziouc duqv fuqv, weic zuqc ninh zorqv buonc ganh nyei nyanc hopv bun mienh jomc mienh.*" Maaih mienh buatac nyei mv baac zoux sic maiv guen maiv goux mv baac se gorngv mbuo oix maaih hnyouv hnangv Ziouv ziouc oix zuqc zuotc Ziouv nyei nyungc zoux. Yiem Lugaa 15 zaang mbuo buatac Yesu gorngv waac beiv bun mienh muangx, "*Se gorngv meih mbuo haaix dauh maaih yietc baeqv dauh ba'gi yungh, maaih dauh dingx laaih mingh, ninh hnangv haaix nor zoux? Ninh maiv zeiz guangc jienv wuov deix juov ziepc juov dauh yiem wuov miev-ciangv, mingh lorz taux buatac dingx laaih wuov dauh fai?* (Lugaa 15:4) Naaiv diuh waac beiv biux mengh gorngv Yesu ninh cau-fim ninh zanc-zanc mangc jienv ninh nyei naamh nyouz hnangv 2 Zunh Doic Douh 16:9 gorngv nor, "*Ziouv nyei m'zing mangc mingh mangc daaih gormx lungh ndiev weic ceix qaqv bun maaih hnyouv gan nzengc ninh wuov deix*". Yiem mbuo nyei fiuv-mungv fiuv-laangz, yiem mbuo nyei jiu-baang ndongc haaix zungv maaih m'sieqv dorn qiemx zuqc meih caux ninh mbuo gorngv waac, tengx ninh daux gaux, tengx ninh orn hnyouv. Maiv dungx maaih fiem fingx gorngv bun ganh laanh tengx fai zoux, meih oix zuqc liepc hnyouv koi m'zing buatac dongh mienh qiemx zuqc nyei.
5. M'sieqv dorn maaih hnyouv hnangv Ziouv oix zuqc maaih hnyouv fongc horc. Da'yietc fongc horc ganh nyei ziangh maengc, zingh ginc, ziangh hoc, zingh nyeic, caux zinh zoih bun Tin-Hungh. Da'nyeic oix zuqc maaih hnyouv tengx mienh

B. Maaih hnyouv hnangv Ziouv nyei m'sieqv dorn maaih hnyouv orn mienh nyei hnyouv

1. Mbuo maiv zeiz gorngv dongh mienh oix muangx nyei mv baac oix zuqc gorngv dongh ninh mbuo qiemx zuqc haiz nyei. Mbuo laanh laanh mienh maaih ziangh hoc haih gorngv orn mienh, maaih ziangh hoc qiemx zuqc mienh gorngv orn mbuo. Weic naaiv mbuo laanh qiemx zuqc laanh. Se gorngv haaix laanh mienh maaih hnyouv hnangv Ziouv oix zuqc maaih hnyouv gorngv orn mienh nyei hnyouv. Cong-mengh waac 12:25 gorngv, "*Mienh hnyouv nzauh faanh haiz hnangv ga'naaiv ngatv jienv hniev nyei, mv baac yietc joux longx nyei waac bun ninh haiz hnyouv longx.*"
2. Baulo gorngv maaih hnyouv oix hnangv Ziouv nyei mienh oix zuqc orn mienh nyei hnyouv weic Tin-Hungh zoux orn hnyouv nyei Ziouv, weic ninh orn mbuo nyei hnyouv dong mbuo buangh zuqc nyei kuonx naanh nyei ziangh hoc. "*Mbuo oix zuqc*

ceng mbuo nyei Ziouv Yesu Giduc nyei Die, Tin-Hungh, dongh korv-lienh mienh nyei Zaangc Diex, yaac zanc-zanc orn mbuo nyei hnyouv nyei Tin-Hungh. Mbuo maaih nyungc-nyungc kuonx naanh, ninh orn mbuo nyei hnyouv, weic bun mbuo aengx haih orn buangh zuqc haaix nyungc kuonx naanh nyei mienh nyei hnyouv. Tin-Hungh hnangv haaix nor orn mbuo nyei hnyouv, mbuo yaac hnangv wuov nor haih orn mienh nyei hnyouv” (2 Ko^{lin}to 1:3-4). Mbuo oix zuqc jangx jienv dongh mbuo maaih nyei sic Ziouv hnangv haaix nor orn mbuo nyei hnyouv weic bun mbuo aengx haih orn maaih kuonx hnyouv nyei mienh.

3. Maaih deix m’sieqv dorn oix gorngv, “yie maiv haih orn mienh nyei hnyouv lorqc”. Maaih mienh nzuonx seix yiem meih mbuo nyei laangz, nzunc baav maiv zuqc gorngv haaix nyungc orn, mv baac dorh m’zing mingh mangc mv baac benx orn nyei. Se gorngv meih za’gengh maaih hnyouv hnangv Ziouv, maaih hnyouv hnangv Maa^{li}yaa yiem Yesu nyei ga’glen hoqc, hoqc ninh nyei waac, bun Singx Lingh dorh, ninh haih dorh meih gorngv dongh meih qiemx zuqc gorngv nyei. Se gorngv meih nyaev maiv cuotv zuangx nyei mienh, meih haih hoqc haih zieqv duqv gorngv meih nyei jaa zinh se yiem Yesu Giduc daaih, meih oix ziangh weic ninh, meih nzauh taux zoux horpc ninh nyei hnyouv maiv nzauh taux ganh nyei mengh dauh meih ziouc gauh haih cuotv zuangx. Se gorngv ih zanc meih mbuo buangh zuqc yie nor meih mbuo maiv hiuv lorqc. Dongh yie maiv gaengh sienx Yesu Giduc nyei ziangh hoc yie (Yauzsing) nyaev maiv zuqc dorngx, maiv cuotv zuangx yietc deix, yie nyaev gor mienh liemh yie ganh nyei muoz doic nyei biauv yaac maiv oix mingh nyanc hnaangx. Mienh nyei dorngx nor nyanc maiv njiec aqv. Naaiv se nyaev dorngc. Dongh yie sienx liuz Yesu Giduc, hiuv duqv gorngv ninh zeix yie nyei nzuih daaih, nyungc-nyungc oix fungx bun ninh longx zoux ninh nyei gong, yie maaih nyei jaa zinh fai zic zinh se yiem Ziouv bun hnangv, gauh jienv bun yie se Tin-Hungh hnangv haaix nor buatc hnangv haaix nor gorngv maiv zeiz baamh mienh. Yie jiex gorn duqv qiangx yaac jiex gorn longc qiangx...ih zanc zungv gorngv camv jiex ndangc hnangv. Yie ganh nyei maengc yie hiuv duqv weic Tin-Hungh nyei en hnangv bun yie zieqv duqv gorngv oix zuqc gamh nziex Tin-Hungh ziouc bun yie maiv gamh nziex gorngv mienh hnangv haaix nor hnamv taux yie, yie ziouc gauh haih cuotv zuangx.
4. Maaih mienh naaic gaax yie hnangv haaix nor orn ganh laanh mienh. Maaih ziangh hoc meih mbuo haih orn meih nyei nqox, buatc ninh namx hnyouv taux Tin-Hungh nyei gong, gorngv mbuox meih mbuo nyei nqox, ninh mbuo zoux nyei gong gengh jienv weic ninh mbuo zunh nyei se Tin-Hungh nyei kuv fienx, maiv goiv yienc nyei kuv fienx. Naaiv haih orn duqv ninh mbuo nyei hnyouv. Buatc fu’jueiv leih go Tin-Hungh, orn ninh mbuo nyei hnyouv gorngv, mbuo qiemx zuqc Tin-Hungh gauh camv jiex nyungc-nyungc, gorngv orn fu’jueiv mingh buoqc zangc Tin-Hungh maiv zeiz gorngv mborqv haeqv ninh mbuo mingh. Meih mbuo nyei doic maaih laanh baav caux ninh mbuo nyei nqox maiv horpc fai maaih sic, orn ninh nyei hnyouv nunz ninh mbuo gan longx Tin-Hungh. Yiem go nyei mienh meih mbuo haih fiev fienx mingh orn. Maaih camv nzunc nyei yie mbuo i hmuangv duqv meih mbuo Janx ze i mienh nyei fienx, fienx yaac orn yie mbuo nyei hnyouv tengx yie mbuo aengx jorm hnyouv zoux jienv Ziouv nyei gong mingh.

C. Maaih hnyouv hnangv Ziouv nyei m’sieqv dorn maaih hnyouv gan Ziouv

1. Yie maaih hnyouv oix gan Ziouv nyei lorqc mv baac hngangv haaix nor gan Ziouv mingh? Yesu hngangv haaix nor heuc ninh nyei sai-gorx mbuo gan Ninh mingh. (Matv[^]tai 4:18-20 “*Yesu yangh jauv gan Gaa[^]li[^]li Koiv-Dorn hlen mingh, buatc maaih i muoz-dorn. Ninh mbuo zoux zorqv mbiauz nyei mienh, yiem wuov koiv borngz mbiauz. Maaih dauh heuc Simon, aengx maaih norm mbuox heuc Bide, caux jienv ninh nyei youz, An[^]ndaa[^]lu. Yesu mbuox ninh mbuo, “Meih mbuo daaih gan yie oc. Yie oix njaaux meih mbuo lorz mienh, hngangv ih zanc meih mbuo lorz mbiauz nor.” Ninh mbuo liemh zaih guangc ninh mbuo nyei mungz gan jienv Yesu mingh aqv.) Yesu ih jaax hnoi yaac heuc mbuo gan Ninh, heuc mbuo lorz mienh daaih Sienx ninh hngangv ninh njaaux ninh nyei sai-gorx mbuo nor. Yesu ganh gorngv mbuox mbuo hngangv haaix nor gan ninh yiem Matv[^]tai 16:24 gorngv, “*Yesu ziouc mbuox ninh nyei sai-gorx mbuo, “Haaix dauh oix gan yie mingh oix zuqc siev jienv ninh ganh, ndaam jienv ninh nyei ziepc nzaangc jaax gan yie mingh”*”*
2. Se gorngv mbuo maiv ginv gan Ziouv, mbuo m’daaih ginv ei baamh gen caux gunv baamh gen wuov dauh Mienv nyei jauv. Dongh mbuo maiv gaengh sienx Yesu nyei ziangh hoc, mbuo hngangv Baulo gorngv yiem E[^]fe[^]so 2:2 wuov nor, “*Wuov zanc meih mbuo kungx gan baamh gen orqv haic nyei za’eix hngangv. Meih mbuo muangx gunv ndaamv-lungh wuov dauh, dongh ih zanc yiem maiv muangx Tin-Hungh nyei waac wuov deix mienh nyei hnyouv zoux gong wuov dauh mienv.”*”
3. Maaih mienh oix gan Yesu mingh nyei mv baac se gorngv mbienc bun ninh mbuo nor gan hngangv. Yiem Lugaa 9:57-62 “*Ninh mbuo gan jienv jauv mingh gau, maaih laanh mienh mbuox Yesu, “Maiv gunv meih mingh haaix, yie oix gan meih mingh.” Yesu gorngv mbuox ninh, “Hieh juv maaih kuotv yiem, norqc yaac maaih lauz, mv baac yie, Baamh Mienh nyei Dorn, maiv maaih dorngx bueix hitv kuonx.” Yesu aengx mbuox laanh mienh, “Gan yie mingh maah!” Wuov laanh mienh dau, “Domh Gorx aah! Yie tov nzuonx mingh biopv yie nyei die ndaangc.” Yesu dau, “Sueih daic mingh nyei mienh ganh biopv ninh mbuo nyei daic mingh nyei mienh aqv. Meih gunv mingh zunh Tin-Hungh zoux Ziouv gunv mienh nyei kuv fienx.” Aengx maaih laanh gorngv mbuox Yesu, “Domh Gorx aah! Yie oix gan meih mingh mv baac yie tov nzuonx mbuox dangh yie nyei hmuangv doic.” Yesu gorngv, “Haaix dauh nanv jienv laih bieiv laih lingh mv baac ninh huin nzuonx mangc nqa’haav, wuov dauh maiv puix yiem Tin-Hungh nyei guoqv.” Mbuo buatc mienh maaih ziax nyungc sic dangv jienv bun ninh mbuo maiv haih bun Yesu Giduc zoux da’yietv yiem ninh mbuo nyei maengc. Maaih mienh laaix ninh mbuo nyei hmuangv doic maiv gan Yesu, maaih mienh laaix zinh nyanh fai gong nyei jauv maiv gan Yesu. Maaih mienh maaih camv nyungc jaev sin nyei sic gorngv ninh mbuo weic naaiv weic wuov, mv baac maaih hnyouv hngangv Ziouv nyei m’sieqv dorn ginv gan Yesu, ginv siev jienv ninh mbuo ganh. Hnoi-hnoi oix zuqc ndaam jienv ninh nyei ziepc nzaangc jaax gan Yesu mingh.*”
4. Yesu gorngv ninh nyei “*Ba’gi yungh yaac gan jienv ninh mingh weic zuqc ninh mbuo zieqv duqv ninh nyei qiex*” (Yo[^]han 10:4) Se gorngv mbuo benx Giduc nyei mienh, mbuo oix zuqc gan jienv ninh mingh.

Dorh Ging-Sou Nyei Eix-Leiz Daaih Longc Yiem Maengc:

1. Mbuo haaix mbuo nyei hnyouv hngangv haaix nor se gorngv mbuo buatc mienh qiemx zuqc nyei ziangh hoc? Mbuo maaih hnyouv jangv tengx fai mbuo gorngv sueih ganh dauh tengx weic zuqc ninh mbuo gauh haih fai dongh meih haih nyei mengh zoux.

2. Mbuo buangv hnyouv weic Tin-Hungh bun qiangx mbuo liouc ninh nyei fuqv tong taux mbuo nyei maengc bun ganh laanh nyei fai? Mbuo oix zuqc liouc ninh nyei fuqv taux dongh nitv fatv jiex mbuo nyei wuov deix mienh, mbuo ganh nyei hmuangv doic liuz liouc taux fiuv mungv doic. Mbuo oix zuqc jangx jienv, hhangv Baulo orn Ko^lin^to mienh nor, “*Yie hnamv nyei gorx-youz aac, weic naaiv meih mbuo oix zuqc sienx wuonv, maiv dungx tuix. Oix zuqc zanc-zanc cuotv qaqv zoux Ziouv nyei gong, weic zuqc meih mbuo hiuv duqv meih mbuo weic Ziouv zoux gong, maiv maaih yietc nyungc maiv lamh longc*” (1 Ko^lin^to 15:58) Yaac hhangv ninh aengx gorngv mbuo Gaa^laa^tie jiu-baang nor, “*Zoux kuv sic, maiv dungx hnyouv namx. Se gorngv mbuo maiv tuix nor, taux ziangh hoc mbuo ziouc maaih siou-sengh*” (Gaa^laa^tie 6:9). Tov Tin-Hungh bun mbuo jaa maaih hnyouv fu-sux Ninh yaac maaih hnyouv cau-fim taux ganh laanh mienh
3. Mbuo oix zuqc laanh orn laanh nyei hnyouv. Maaih ziex nzunc Tin-Hungh orn mbuo nyei hnyouv, maaih camv nzunc Tin-Hungh longc mienh daaih orn mbuo nyei hnyouv. Mbuo oix zuqc jangx jienv, maaih qiangx maaih ziangh hoc mbuo yaac oix zuqc orn mienh nyei hnyouv. Gorngv taux naaiv yie jangx taux yietc norm waac fangx, zinh ndangc maaih laanh mienh m’zing maengc nyei mv baac hnamv Ziouv yaac maaih Ziouv nyei fuqv zatv nzung yiem Piano kuv muangx haic. Norm norm buoqc zangc nyei hnoi ninh zatv nzeng ceng Tin-Hungh yaac orn duqv jiu-baang mienh nyei hnyouv gor, ziex nzunc ninh zatv baac nzung, mienh nyiemv nzengc. Weic ninh nyei m’zing maengh mingh ninh maiv buatc gorngv ninh zatv nyei nzung haaih tengx duqv mienh fai maiv duqv. Maaih hnoi nor, ninh gorngv mbuo jiu-baang mienh naaiv se ninh nyei ga’haav lai wuov norm buoqc zangc hnoi zatv nzung aqv, naaiv se ninh nyei ga’haav lai wuov diuh nzung, weic zuqc ninh mangc maiv buatc maiv hiuv duqv gorngv ninh zatv nyei tengx duqv mienh fai maiv duqv. Ninh zatv baac nzung liuz maaih laanh m’sieqv dorn daaih gorngv mbuo ninh, “*Yie korh fiqv haic weic naaiv se benx meih nyei ga’haav lai wuov norm hnoi*”. Zatv nzung mienh naaic gaax weic haaix nyungc meih korh fiqv?” Naaic laanh m’sieqv gorngv, “*Weic zuqc meih zatv nyei nzung gengh orn duqv yie mbuo nyei hnyouv haic.*” Zate nzung mienh gorngv, “*Wuov nyungc meih mbuo zoux haaix nyungc maiv gorngv mbuox yie, yie mangc maiv buatc, maiv hiuv duqv tengx duqv meih mbuo fai maiv tengx duqv. Yie mv baac qiemx zuqc mienh orn nyei niaa*”. Yie jangx taux naaiv norm waac fangx, yaac jangx taux gorngv mbuo laanh laanh mienh maaih ziangh hoc qiemx zuqc mienh orn mbuo nyei hnyouv, maaih ziangh mbuo yaac zuqc mingh orn mienh nyei hnyouv. Maiv dungx zuov ganh dauh, meih maaih qiangx nyei gunv mingh orn. Tov Tin-Hungh bun mbuo maaih hnyouv cau-fim taux mienh, maaih hnyouv orn mienh nyei hnyouv yaac maaih hnyouv ziepc zuoqv nyei gan longx Ninh, weic zuqc ninh zoux mbuo nyei Ziouv.
4. Maaih hnyouv hhangv Ziouv nyei m’sieqv dorn, maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv daux gaux, maaih hnyouv muangz Ziouv nyei waac, oix zuqc maaih hnyouv fu-sux Tin-Hungh caux ganh nyei nqox yaac maaih hnyouv mbuoqc Tin-Hungh caux ganh nyei nqox, maaih hnyouv hnamv Tin-Hungh yaac hnamv ganh nyei nqox. Oix zuqc maaih hnyouv zieqv duqv benx maa nyei jaa zinh caux maaih maa nyei hnamv, oix zuqc maaih hnyouv goux caux ceix jaa dingh goux caux ceix hmuangv doic, jorm hnyouv taux Ziouv nyei gong, yaac maaih hnyouv cau-fim taux mienh.

**Ziepc Nyeic Zaang: M'sieqv Dorn Maaih Hnyouv hnavg Ziouv Oix zuqc
Maaih Hnyouv Lorz Ndangc Tin-Hungh nyei jauv**

Doqc Nyei Ging-Sou: Singx Nzung 63:1

“Tin-Hungh aah! Meih zoux yie nyei Tin-Hungh, yie longc hnyouv zimh lorz meih. Yie nyei hnyouv ngorc haic meih, yie oix haic meih hnavg yiem deic-bung-haanz mborngx nqaai, maiv maaih wuom nyei dorngx nor”

Matv[^]tai 6:25-34 “Weic naaiv yie gorngv mbuox meih mbuo, maiv dungx weic yungz maengc nyei nyanc hopv kuonx hnyouv. Yaac maiv dungx weic sin zaangc nyei lui-houx kuonx hnyouv. Maengc gauh jaaix jiex nyanc hopv maiv zeiz? Sin yaac gauh jaaix jiex lui-houx maiv zeiz? 26 Mangc gaax, ndaix ndaamv-lungh nyei norqc! Ninh mbuo maiv zuangx haaix nyungc yaac maiv siou dapv lamz. Mv baac meih mbuo nyei tin-dorngx Diex uix ninh mbuo. Meih mbuo zungv gauh jaaix jiex norqc maiv zeiz? 27 Meih mbuo haaix dauh laaix kuonx hnyouv haih borqv duqv maengc ndaauv deix? 28 “Meih mbuo weic haaix diuc laaix lui-houx kuonx hnyouv? Hnamv mangc gaax, lomc nyei baeqc horqc biangh hnavg haaix nor ziangh! Biangh maiv zoux gong, maiv baeng suix ndatv ndie. 29 Mv baac yie mbuox meih mbuo, liemh Saa[^]lo[^]morn Hungh ndongc naaic butv zoih, yaac maiv maaih zorng-zuqc ndongc yietc dorv naaiv deix biangh nzueic. 30 Lomc nyei miev ih hnoi ziangh, njang hnoi kou nqaai, zuqc douz buov, mv baac Tin-Hungh zorng miev nzueic. Wuov nyungc, Tin-Hungh gauh oix zorng meih mbuo maiv zeiz? Meih mbuo sienx duqv hei haic weqv! 31 “Hnavg naaic, maiv dungx kuonx hnyouv gorngv, ‘Yie mbuo hnavg haaix nor haih lorz duqv nyanc lorz duqv hopv, lorz duqv lui-houx zuqv?’ 32 Maiv gaengh sienx Tin-Hungh wuov deix mienh haaix zanc yaac kungx lorz naaiv deix ga'naaiv hnavg. Meih mbuo nyei tin-dorngx Diex hiuv duqv meih mbuo qiemx zuqc longc naaiv deix ga'naaiv. 33 **Gauh longc jienv jiex, meih mbuo oix zuqc bun Tin-Hungh zoux Ziouv gunv meih mbuo ndaangc, yaac oix zuqc ei nzengc ninh nyei eix, naaiv deix yietc zungv nyei ga'naaiv ninh ziouc jaa tipv bun meih mbuo.** 34 Weic naaiv meih mbuo maiv dungx nzauh njang hnoi nyei sic. Njang hnoi nyei sic maaih gauh njang hnoi nzauh. Mouz hnoi maaih mouz hnoi nyei sic nzauh gauh aqv.

Gorngv Jiex Gorn Nyei Waac:

Weic zuqc ih gitv lungh ndiev, maaih hnyouv hnavg Ziouv nyei m'sieqv dorn maaih ziex nyungc zuqc zoux, zuqc liuc leiz gengh maiv kungx gor. Maaih ziex norm dorngx zuqc mingh, maaih hmuangv doic heuc tengx zoux naaiv zoux wuov, weic naaiv mbuo qiemx zuqc Tin-Hungh nyei cong-mengh bun mbuo haih mbaaih duqv horpc dongh mbuo oix zuqc zoux nyei yaac haih ei duqv horpc dongh Tin-Hungh paaiv mbuo nyei zoux. Tin-Hungh hnavg haaix nor oix mbuo norm-norm ziangh hoc, hnoi-hnoi zoux fai ginv. Mbuo nyei maengc se maiv kungx haic mbuo oix zuqc faix fim mangc gaax mbuo hnavg haaix nor longc duqv horpc ziangh hoc. Mbuo zoux nyungc-nyungc mbuo oix zuqc mangc gaax Tin-Hungh nyei waac hnavg haaix nor gorngv. Tin-Hungh maiv goiv yienc Ninh nyei waac yaac maiv goiv yienc mbuo haih kaux ninh nyei waac tengx mbuo haih maaih yietv maaih nyeic nyei ginv, zoux, caux ziangh yiem naaiv seix zangc.

Porv Mengh Ging-Sou:

A. Maaih hnyouv hnangv Ziouv nyei m'sieqv dorn maaih hnyouv lorz ndangc Tin-Hungh.

1. Yiem Matv[^]tai 6:33 “*Gauh longc jienv jiex, meih mbuo oix zuqc bun Tin-Hungh zoux Ziouv gunv meih mbuo ndaangc, yaac oix zuqc ei nzengc ninh nyei eix, naaiv deix yietc zungv nyei ga'naaiv ninh ziouc jaa tipv bun meih mbuo.*” Janx nyei waac gorngv mbuo oix zuqc lorz ndangc Tin-Hungh nyei jauv, Tin-Hungh nyei njoux en, Tin-Hungh nyei fuqv. Se gorngv meih zipv Tin-Hungh nyei njoux en nor meih ziouc duqv zipv Ninh goux meih.
2. Ndaawitv gorngv, “*Tin-Hungh aah! Meih zoux yie nyei Tin-Hungh, yie longc hnyouv zimh lorz meih*” (Singx nzung 63:1) Mbuo hnangv haaix nor ginv zoux se biux mengh haaix nyungc jienv bun mbuo. Mbuo oix zuqc ginv zoux longx maiv zeiz zoux orqv, ginv zoux horpc Tin-Hungh maiv gunv fai fai hlo nyei sic. Ih hnoi mbuo ginv zoux nyei mbuo benx wuov nyungc njang hnoi. Wuov nyungc mbuo naaic gaax ganh, ih hnoi yie zoux haaix nyungc ginv haaix nyungc dongh haih biux mengh gorngv yie se yietc laanh m'sieqv dorn gengh maaih hnyouv hnangv Ziouv, haaix nyungc dongh yie zoux nyei fai ginv nyei biux mengh gorngv yie se lorz ndangc Tin-Hungh nyei jauv fai gorngv Tin-Hungh se jienv bun yie. Mbuo maaih camv gor oix zuqc zoux haaix nyungc gauh jienv oix zuqc zoux wuov nyungc ndangc, yie hnangv haaix nor hiuv duqv haaix nyungc gauh jienv? Weic zuqc haaix nyungc Tin-Hungh nyei waac gorngv jienv se jienv bun yie.
3. Yiem Singx nzung 70:4 Ndaawitv gorngv, “*Tov bun yietc zungv daaih lorz meih wuov deix, njien-youh orn-lorqc, tov bun hnamv meih nyei njoux en wuov deix, zanc-zanc gorngv, “Tin-Hungh za'gengh hlo haic.*”

B. Maaih hnyouv hnangv Ziouv nyei m'sieqv dorn maaih hnyouv Maaih hnyouv kaux wuonv Tin-Hungh.

1. Mbuo mbuatc Ndaawitv maaih hnyouv kaux wuonv Ziouv, ninh gorngv, “*Yie nyei hnyouv kaux wuonv meih. Meih nyei mbiaauc jieqv buoz baav jienv yie* (Singx nzung 63:8) Mbuo yaac buatec ninh maaih hnyouv zoux horpc Ziouv nyei hnyouv, maaih hnyouv hnangv Ziouv, maaih hnyouv zoux ei jienv Ziouv nyei za'eix. Yiem Gongzoh 13:22, Baulo gorngv taux jiex daaih nyei jauv mbuox Yiutai “*Tin-Hungh tuix Saulo cuotv mingh, nqa'haav orn Ndaawitv zoux ninh mbuo nyei hungh. Tin-Hungh gorngv taux Ndaawitv. Ninh gorngv, ‘Yie buatec Jetc[^]si nyei dorn, Ndaawitv, horpc yie nyei hnyouv haic. Ninh yaac oix yiem maanc sic ei jienv yie nyei za'eix zoux*”. Maiv gunv Ndaawitv maaih ziangh hoc zoux dorngc Tin-Hungh nyei, mv baac camv nyei ziangh hoc ninh maiv zoux sic doix-dekc Tin-Hungh, ninh muangx Tin-Hungh nyei waac zoux horpc Ziouv nyei hnyouv zoux ei Ziouv nyei za'eix. Ninh zoux hungh nyei ziangh hoc ninh maaih hnyouv hnangv Ziouv (1 Saa[^]mu[^]en 13:14). Zoux dorngc nyei ziangh hoc, ninh maaih hnyouv nyiemc ganh zoux dorngc nyei zuiz (Singx Nzung 51).
2. Baulo gorngv mbuox Ko[^]lin[^]to nyei Siensex Yesu mienh “*Oix zuqc ging jienv hnyouv, yaac sienx wuonv. Oix zuqc daamv hlo, yaac henv*” (1 Ko[^]lin[^]to 16:13) Hnangv haaix nor ging jienv hnyouv? Weic haaix nyungc oix zuqc ging jienv hnyouv? **Mbuo oix zuqc ging jienv hnyouv**, weic zuqc maaih seix hnyouv nyei sic camv haih nduov mienh leih go Tin-Hungh, weic zuqc maaih waaic nyei sic camv,

- maaih zunh jaav leiz nyei mienh, maaih mienh oix zoux doqc ninh mbuo. Oix zuqc ging jienv hnyouv maiv oix bun sienx Giduc nyei mienh tuix bouc fai suei. Mbuo oix zuqc ging hnyouv mangc jienv mbungh jienv hnangv zoux baeng mienh ging jienv mbungh taux ninh mbuo nyei win-wangv nor. **Mbuo oix zuqc sienx wuonv.** Sienx wuonv kuv fienx, sienx wuonv Ziouv nyei waac, maiv dungx pienx Tin-Hungh nyei waac yaac maiv dungx pien Tin-Hungh nyei waac, bungx hnyouv Ziouv yaac bungx hnyouv Ziouv nyei waac. Baulo gorngv mbuox Ko[^]lin[^]to mienh yiem 1 Ko[^]lin[^]to 15:1 “*Zuangx gorx-youz aac, yie oix bun meih mbuo jangx jienv zinh ndaangc yie zunh mbuox meih mbuo nyei kuv fienx. Naav kuv fienx meih mbuo zipv daaih zoux gorn-ndoqv sienx duqv wuonv.*” Simv nqoi njaaux jaav nyei jauv, simv nqoi waaic nyei sic, bun mbuo haih benx yietc laanh mienh dongh gengh maaih hnyouv zoux ei Ziouv nyei za'eix nyei mienh. **Mbuo oix zuqc daamv hlo,** maiv dungx gamh nziex weic zuqc Tin-Hungh se zoux mbuo nyei qaqv. Hnangv Singx nzung 18:2 gorngv nor, “*Ziouv zoux yie nyei la'bieiv, yie kaux wuonv nyei dorngx caux njoux yie wuov dauh. Yie nyei Tin-Hungh, se yie nyei la'bieiv, dongh yie ndaauh kaux wuov dauh.*” **Mbuo yaac oix zuqc henv,** fai mbuo oix zuqc dingc, hnangv Baulo gorngv mbuox E[^]fe[^]so jiu-baang mienh nor, “*Setv mueiz yie kuinx meih mbuo, meih mbuo oix zuqc kaux Ziouv Yesu yaac longc ninh nyei domh qaqv benx mienh henv mienh*” (E[^]fe[^]so 6:10) Mbuo haih henv haih dingc se weic Yesu nyei qaqv bun mbuo.
3. Ndaawitv yiem Singx nzung 27:1-2 gorngv, “*Ziouv zoux yie nyei njang caux njoux yie wuov dauh, yie oix zuqc gamh nziex haaix dauh? Ziouv se yie nyei maengc kaux wuonv nyei dorngx, yie oix zuqc gamh nziex haaix dauh?*” Ndaawitv gorngv nyei waac se gorngv mbuo sienx wuonv Tin-Hungh kaux wuonv Tin-Hungh nor mbuo maiv zuqc gamh nziex haaix dauh. Weic maiv maaih haaix nyungc haih daaih hoic mbuo. Weic zuqc Ziouv dorh jienv mbuo, ninh se Njang, weic naav hmuangx nyei jaav daaih hoic mbuo mv baac Njang bun mbuo mangc duqv buatc. Ninh yaac benx mbuo nyei Njoux Ziouv, se gorngv ninh njoux mbuo fungc maaih haaix nyungc daaih hoic duqv mbuo? Mbuo maiv horpc zuqc gamh nziex se gorngv Ziouv se mbuo kaux wuonv Ninh. Hnangv Baulo gorngv mbuo Lomaa zingh mienh yiem Lomaa 8:31 wuov, “*Hnangv naaic, mbuo oix zuqc hnangv haaix nor gorngv? Se gorngv Tin-Hungh tengx mbuo, haaix dauh haih caux mbuo doix-dekc?*” Maiv maaih haaix dauh. Maiv maaih haaix dauh fai haaix nyungc haih goux mbuo hnangv Ziouv Yesu. Maaih hnyouv hnamv Ziouv nyei mienh kaux wuonv Ninh yaac duqv wuonv nyei dorngc kaux.

C. Maaih hnyouv hnangv Ziouv nyei m'sieqv dorn oix zuqc maaih mouz deic yiem maengc.

1. M'sieqv dorn maaih hnyouv hnangv Ziouv nyei mienh oix zuqc ziangh caux zoux ei Tin-Hungh zeix mbuo daaih nyei mouz deic. Meih hiuv duqv meih nyei mouz deic yiem maengc nyei fai? Da'yietv, Pou-tong nyei mouz deic se meih oix zuqc longc nzengc hnyouv hnamv Ziouv meih nyei Tin-Hungh. Da'nyeic, hnamv ganh nyei nqox, tengx ganh nyei nqox, caux fu-sux ganh nyei nqox. Da'faam, hnamv ganh nyei fu'jueiv, njaaux ganh nyei fu'jueiv taaih Tin-Hungh. Da'feix, ceix caux zaangv jaa-dingh, goux hmuangv doic bun biauv zong sung. Da'hmz ceix ganh nyei maengc weic bun ganh haih tengx mienh. Da'luoqc, jaa hnamv jaa fu-sux Tin-Hungh nyei mienh. Naav deix jienv nyei se mbaaih yiem da'yietv jienv mingh taux da'luoqc

- jienv. Se gorngv mbuo bieqc hnyouv taux mbuo nyei maengc nyei mouz deic mbuo gauh haih ginv duqv horpc. Nyungc zeiv gorngv mbuo oix zuqc ginv Tin-Hungh ndangc weic ninh zoux da'yietv, mbuo yaac oix zuqc ginv mbuo nyei nqox ndangc mbuo nyei fu'jueiv. Maaih auv camv nyei bieqc hnyouv dorngc ninh mbuo nyei mouz deic, dorh ninh mbuo nyei fu'jueiv zoux gauh jienv nqox fai Tin-Hungh. Fu'jueiv oix nyei nor zoux siepv gor, mv baac nqox oix nyei nor maiv kangv zoux, zoux deix ngopv jienv zoux fai.
2. Mbuo maaih ziangh hoc fih hngangv nyei, eix-leiz gorngv yietc hnoi mv daaih maaih 24 norm ziangh hoc bun laanh laanh mienh. Mv baac maiv zeiz laanh laanh mienh longc ninh mbuo nyei ziangh hoc fih hngangv. Maaih mienh longc ziangh hoc bueix camv nyei, maaih mienh longc ziangh hoc nziaauc camv nyei, maaih mienh longc ziangh hoc zoux gong camv nyei, maaih mienh guangc ziangh hoc camv nyei. Maaih hnyouv oix hngangv Ziouv nyei hnyouv nyei m'sieqv dorn hngangv haaix nor haih longc duqv horpc ziangh hoc? Baulo gorngv mbuo E^{fe}so zingh mienh gorngv, *“Hnangv naaic, meih mbuo yiem seix zaangc oix zuqc faix fim meih mbuo hnangv haaix nor yiem. Maiv dungx hnangv mienh hngongx mienh, oix zuqc hnangv cong-mengh nyei mienh wuov nor. Oix zuqc longc duqv horpc ziangh hoc, weic zuqc ih zanc nyei nyutc zeiv se orqv haic. Maiv dungx zoux mienh hngongx mienh. Oix zuqc mengh baeqc Ziouv nyei za'eix hnangv haaix nor.”* (E^{fe}so 15-17) Cong-mengh nyei m'sieqv dorn hiuv duqv Ziouv nyei za'eix weic ninh doqc Ziouv nyei waac Ging-sou. Meih mbuo hnangv haaix nor haih hiuv duqv Tin-Hungh oix meih mbuo hnangv haaix nor zoux se gorngv meih mbuo maiv doqc ninh nyei za'eix dongh Ninh biux mengh yiem Ging-sou.
 3. Maaih cong-mengh maaih hnyouv hnamv Ziouv nyei m'sieqv dorn hiuv duqv ninh mbuo caux nyei doic, haaix nyungc mienh horpc zuqc caux haaix nyungc mienh maiv horpc zuqc caux. Siensex Tin-Hungh caux duqv maiv siensex nyei mienh nyei mv baac oix zuqc faix fim maiv dungx bun ninh mbuo baeng meih mbuo mingh zoux zuiz, oix zuqc baeng ninh mbuo mingh zoux horpc nyei sic. Se gorngv mbuo maiv caux ninh mbuo, mbuo hnangv haaix nor maaih qiangx mbuox ninh mbuo taux kuv fiensex? Mv baac mbuo oix zuqc muangx Baulo nyei waac kuinx mbuo heuc mbuo *“Oix zuqc longc cong-mengh caux maiv siensex nyei mienh jiu tong. Yaac oix zuqc maiv dungx guangc ziangh hoc”* (Ko^{lo}si 4:5). Maaih mienh camv guangc ziangh hoc. Mbuo nyei ziangh hoc se yietc nyungc Tin-Hungh bun nyei fuqv dongh mbuo maiv haih yienc fai daux nqang. Weic naaiv mbuo zuqc hiuv duqv haaix nyungc jienv bun Tin-Hungh mbuo oix zuqc ginv ei Ninh nyei eix.
 4. Oix hiuv duqv ganh nyei mouz deic yiem maengc nyei mienh oix zuqc longc ziangh hoc caux Ziouv jiu-tong. Hnangv ngorc hnaangx nyei mienh, maiv doqc Ziouv nyei waac nyei mienh se ngorc Lingh Wuonh nyei hnaangx.

Dorh Ging-Sou Nyei Eix-Leiz Daaih Longc Yiem Maengc:

1. Maaih hnyouv hnangv Ziouv nyei m'sieqv dorn, maaih hnyouv ziepc zuoqv bun Ziouv, maaih hnyouv bangc fai ziangh yiem Ziouv nyei waac, maaih hnyouv daux gaux, maaih hnyouv muangz Ziouv nyei waac, oix zuqc maaih hnyouv fu-sux Tin-Hung caux ganh nyei nqox yaac maaih hnyouv mbuoqc Tin-Hungh caux ganh nyei nqox, maaih hnyouv hnamv Tin-Hungh yaac hnamv ganh nyei nqox. Oix zuqc maaih hnyouv zieqv duqv benx maa nyei jaa zinh caux maaih maa nyei hnamv, oix zuqc maaih hnyouv goux caux ceix

- jaa dingh goux caux ceix hmuangv doic, jorm hnyouv taux Ziouv nyei gong, maaih nyouv cau-fim taux mienh, yaac maaih lorz ndangc Tin-Hungh nyei jauv.
2. Maiv gunv ih zanc meih nyei maengc se hhangv haaix nor, mbuo laanh laanh mienh ganh oix zuqc zorqv ganh hnyouv fungx bun Ziouv, ginv zoux bun ninh a'hneiv, ginv zorc mbuo nyei hnyouv daaih zuangv Ziouv...Meih lorz haaix nyungc ndangc yiem meih nyei maengc? Se gorngv meih maiv gaengh lorz Tin-Hungh ndangc nor tov Ziouv koi nqoi meih nyei hnyouv bun meih haih zieqv duqv meih qiemx zuqc Ninh.
 3. Maaih hnyouv hnamv Ziouv nyei m'sieqv aac, maaih camv nyungc hoc-dauh mbuo maiv gaengh hoqc taux, mv baac hoqc taux nyei mbuo buatc duqv mengh nyei gorngv, Tin-Hungh nyei paaiv yiem meih mbuo nyei maengc, ninh paaiv meih mbuo m'sieqv dorn zoux nyei gong, Tin-Hungh liuc leiz ziangx meih meih mbuo nyei maengc, Tin-Hungh gorngv haaix nyungc se jienv yiem meih mbuo nyei maengc, yaac heuc meih mbuo daaih gan ninh nyei jauv. Meih mbuo nyei maengc yienc mingh yienc daaih, mv baac Ziouv nyei waac maiv goiv yienc. Hhangv Singx nzung 33:11 gorngv nor, "*Ziouv caangh laangh nyei waac yietc liuz yiem, ninh yiem hnyouv hnamv cuotv nyei za'eix yiem taux maanc gouv maanc doic.*" Tov Tin-Hungh bun meih mbuo ginv Ninh zoux da'yietv yiem meih mbuo nyei maengc. Meih mbuo doqc Ninh nyei waac, Singx Lingh ziouc biux mengh zien leiz yaac njaaux maaih hnyouv hhangv Ziouv nyei mienh haih yangh horpc ninh nyei jauv.
 4. Laengz zingh meih mbuo zoux m'sieqv dorn, zoux auv zoux maa nyei mienh. Yaac oix zuqc Laengz zingh meih mbuo nyei maa weic ninh mbuo maa liouc Tin-Hungh nyei hnamv njiec taux yie mbuo nyei maengc. Mbuo maa nyei hnamv gengh ndo, ndauv bun mbuo... maiv hhangv norqc. Norqc fai saengh kuv se maiv hhangv mienh, weic zuqc ninh mbuo maiv maaih Tin-Hungh nyei fangx zeiv yiem ninh mbuo nyei maengc. Yiem Tin deic douh 1:27 gorngv, "*Tin-Hungh ziouc ziux ninh ganh nyei fangx zeiv zeix cuotv baamh mienh, se ziux Tin-Hungh ganh nyei fangx zeix mienh daaih, ninh zeix cuotv benx m'jangc m'sieqv*" Norqc zoux lauz yiem yietc gueix fai yietc cun-ciou hhangv ninh biaux mi'aqv, dieh hnyangx ninh aengx zoux ganh norm norqc lauz. Yie gengh a'hneiv mbuo nyei maa se maiv hhangv norqc nyei maa. Meih mbuo hiuv nyei fai, se gorngv mbuo muoqv liuz norqc jaux yiem wuov norqc lauz nor, norqc maac maiv buoc aqv, se gorngv ninh mbuo nyei dorn maiv wangc siangx nor ninh mbuo yaac maiv goux guangc jienv biaux mi'aqv. Mbuo oix zuqc laengz zingh Tin-hungh bun mbuo nyei maa fai zoux maa nyei mienh maiv hhangv naaiv. Maiv gunv mbuo hhangv haaix nor buangh zuqc haaix nyungc maaih haaix nyungc baengc fai ninh yaac goux mbuo, maiv guangc jienv biaux. Mbuo maa nyei hnamv se yiem Ziouv daaih weic zuqc 1 Yo[^]han 4:7 gorngv, "*Hnamv nyei gorx-youz aah! Mbuo oix zuqc laanh hnamv laanh weic zuqc hnamv mienh naaiv nyungc hnyouv se yiem Tin-Hungh daaih. Haaix dauh hnamv mienh, wuov dauh zoux Tin-Hungh nyei naamh nyouz yaac hiuv duqv Tin-Hungh*" Mbuo nyei maa hnamv mbuo hhangv Tin-hungh hnamv mbuo nor. Hnamv gaax maa nyei gong ndongc haaix camv, goux mbuo, dorh mbuo, zoux lai-hnaangx uix mbuo, njaaux mbuo, kuinx mbuo donv mbuo. Mv baac mbuo corc zanc zanc heuc ninh tengx mbuo zoux naaiv zoux wuov. Norqc dorn yietc gueix fai yietc cun-ciou hhangv oix zuqc cuotv lauz aqv, norqc maac maiv zuqc cau-fim maiv zuqc gunv, maiv zuqc nzauh taux ninh nyei dorn aqv. Mv baac mbuo nyei maa, maiv gunv mbuo ndongc haaix gox ninh yaac cau-fim taux mbuo tengx mbuo. Mbuo nyei maa maiv maaih hnoi maiv hnamv mbuo, ninh yietc liuz cau-fiem taux ninh nyei fu'jueiv. Se gorngv mbuo maaih ziepc zuoqv bun Ziouv nyei maa, maaih

hnyouv bangc fai ziangh yiem Ziouv nyei waac nyei maa, maaih hnyouv daux gaux, maaih hnyouv muangz Ziouv nyei waac nyei maa, maaih hnyouv fu-sux Tin-Hung caux ganh nyei nqox nyei maa, maaih hnyouv mbuoqc Tin-Hung caux ganh nyei nqox nyei maa, maaih hnyouv hnamv Tin-Hung yaac hnamv ganh nyei nqox nyei maa, maaih hnyouv zieqv duqv benx maa nyei jaa zinh caux maaih maa nyei hnamv, maaih hnyouv goux caux ceix jaa dingh goux caux ceix hmuangv doic nyei maa, maaih jorm hnyouv taux Ziouv nyei gong nyei maa, maaih nyouv cau-fim taux mienh nyei maa, yaac maaih lorz ndangc Tin-Hung nyei jauv nyei maa nor mbuo gengh oix zuqc ceng Tin-Hung yaac laengz zingh mbuo nyei maa yaac ceng mbuo nyei maa. Hnangv **Cong-Mengh waac 31:28-29** gorngv, *“Ninh nyei fu’jueiv jie z daaih gorngv ninh maaih fuqv, ninh nyei nqox yaac ceng ninh gorngv “Maaih ziangh horng nyei m’sieqv dorn camv nyei, mv baac meih gauh ziangh horng jiex.”* Longc ziangh hoc laengz zingh meih nyei maa meih nyei gux weic Tin-Hung ceix ninh mbuo bun meih.

5. Maaih hnyouv hnangv Ziouv nyei maa oix zuqc hiuv duqv haaix nyungc jienv bun ganh yiem maengc. 1. Tin-Hung 2. Meih nyei nqox 3. Meih nyei fu’jueiv 4. Meih nyei biauv zong. 5. Ceix meih nyei sienx fim 6. Zoux nyei gong weic mienh 7. Camv nyungc dongh meih zuqc zoux nyei gong. Nzunc-nzunc meih zuqv ginv zoux meih oix mbaaih duqv horpc jienv sic yiem meih nyei maengc. Maiv dungx zoux faix-fiuv sic liuz la’kuqv maiv zoux jienv jiex nyei sic. Weic meih nyei gong gengh camv haic, maiv dungx zoux gong jienh gor liuz la’kuqv Tin-Hung. Naaiv se mbaaih dorngc meih nyei jienv, maiv dungx liuc leiz mienh gor liuz la’kuqv ganh nyei hmuangv doic ganh nyei nqox fai fu’jueiv naaiv yaac mbaaih dorngc meih mbuo nyei jienv.
6. Maaih hnyouv hnangv Ziouv nyei m’sieqv gengh duqv Ziouv nyei fuqv camv haic yiem naaiv norm seix zangc, duqv buangv hnyouv buangv eix nyei ziangh weic Ziouv. Tov Ziouv bun *“jaang nqaatv nyei mienh jaiv nqaatv, bun hnyouv sie nyei mienh duqv longx nyei ga’naaiv nyanc beuv.”* (Singx Nzung 107:9) Maiv gunv meih buangh zuqc nyei, yiem nyei dorngx, zuqc zoux nyei ndongc haaix kouv, yiem meih nyei hnyouv meih haih maaih orn lorqc weic meih zoux *“ei nzengc Ziouv nyei za’eix”* hnangv Ndaawitv nor. Tov Tin-Hung bun mbuo haih hnoi-hnoi maaih hnyouv hnangv Ziouv Yesu Giduc nor (Fi^lipv^poi 2:5).